

# MIOYO YINA KELE

## NA BOLOKO NTANGU YAYI



Matondo na beno. Beto kulumusa bayintu ya beto na mwa ntangu fioti.

Tata ya Mazulu, beto ke vutula matondo na Nge, bubu yayi, samu na bweso yayi ya kuvukana kintwadi mbala mosi dyaka, na kuzabaka ti kilumbu mosi beto ke vukana samu na ntangu ya beto ya nsuka, mutindu bantu ke kufwa, mpe na yina beto ke vukana na mutindu ya nkembo na Nge, mpe na bayina nionso ba vulusaka na bansungu nionso ke vukana kuna.

<sup>2</sup> Oh, bantima ya beto ke na kubula mingi, na . . . mpe na kuingila ya nene, na kuingilaka ngunga yina na kukwiza! Na yawu, boma nyonso ke zimbanaka na beto. Beto kele na kima ve ya kutina boma, kima ve ya kubanga. Beto ke tala na ntwala na nsilulu ti Nzambi ya Kukonda nsuka me sala beto, mpe beto zaba ti ya kele Kieleka. Ya kele samu na yina beto ke na kuzinga. Beto ke zinga samu na yawu, ngunga yina, ntangu yina, ntangu nzutu yayi ya lufwa ke soba, mpe beto ke vwanda mutindu Yandi, mpe ya ke vwanda diaka ve na kimbevo, mawa ke vwanda diaka ve, kyadi ya ntima. Oh, ya ke suka kuna. Mpe na kiese ya ntima, beto, na lukwikilu mpe na kikesa, beto ke vingila Kilumbu yina.

<sup>3</sup> Ya kele samu na yina beto me vukana awa bubu yayi, Mfumu, samu na kufunguna bayimbi ya beto mpe kulomba kyadi. Ya kele samu na yina beto ke kwisa na autel yayi na suka yayi, samu ti beto zaba ti beto kele bantu yina ke kufwa, mpe ya kele na bifu mingi na kati ya beto, mpe beto kele ya kufuluka na foti. Kasi beto me kwisa samu na kufunguna bayimbi ya beto, mpe na yina beto ke tala na Tata ya beto ya Mazulu na bantima ya kuzibula, samu na balusakumunu mpe ngolo ya malu-malu mpe lukwikilu, ti Yandi ke pesa beto na ngunga yayi, mutindu beto me vukana awa landila nsilulu, “na bisika ya Mazulu na kati ya Yesu Klisto.” Samu beto ke tubaka ti beto me luta lufwa na Luzingu, na nzila ya nsilulu ya Yandi, mpe beto me zanguka na atimosifere ya Mazulu, beto me vwanda na Yandi ntangu yayi. Bika ti Yandi longa beto na suka yayi bima yina Yandi ke zola ti beto zaba, mpe pesa beto Dimpa ya Luzingu, ti beto lendaka vwanda na lukengolo samu na bilumbu ke kwisa na ntwala ya beto. Pesa yawu, Mfumu. Yayi kele kisambu ya beto yina beto me lombamba na Nkumbu ya Yesu Klisto. Amen.

Beno lenda vwanda.

4 Mbote na muntu nionso. Mpe ya kele mbote mingi na kuvukana awa na beno dyaka na suka yayi, na atimosifere yayi ya Mazulu ya kusambila.

5 Kaka mwa ntangu fyoti na manima ya ngunga, beto kuzwaka. . . mwa bambokolo samu na mambu ya mpasi mingi, ya mpasi mingi kaka baminuti fyoti me luta; mwana mosi ya bakala vwandaka ya kulala kuna, yandi vwanda kufwa. Mpe kaka mutindu mu me telama awa, Mfumu simbaka nzutu ya yandi mpe fidisaka yandi na nzila. Na yawu. . .

6 Mpe mwana mosi ya bakala ya kutelama awa, yina kele mwana ya kisoni ya munu ya bakala. Bawu vwandaka kieleka bantu ya Katolika, na kubanda, kasi bawu kwendaka na misa na suka yayi mpe kima mosi tubaka na bawu na kukwiza awa. Mpe na yina yawu. . . Ya kele na nsobolo. Na yina bawu ke—bawu ke kwiza ntete na yinzo, mpe ke kubama samu na mbotika ya maza. Na yina yawu kele—yawu kele. . . kaka bima ya mbote yina Mfumu ya beto ke salaka ntangu nyonso. Yandi ke salaka bima ntangu nyonso. Bawu kwisaka samu na kukota, mpe bawu lendaka kota ve. Bawu tubaka ti bawu vwandaka ve na mutindu ya kukota.

7 Mu tubaka, “Mbote, kana beno zola tuba na munu,” mpe mu tubaka, “mbote, beno kwisa kaka na yinzo, mpe beto ke solula yawu kuna.”

8 Na yawu mu banzaka, na nzila ya munu na New York ntangu yayi, samu na balukutakanu yayi ke na kwiza, ti ya ke vwanda kaka mbote mingi. . . Mu zaba ti ya ke vwanda ntangu ya kupema samu na munu na kuluta kutala beno mpe—mpe mu ke kwisa pelisa dyaka tiya ya munu na tiya ya beno nyonso, mpe beto telemaka kilumbu mosi, na suka yayi. Mpe beto kumaka mazono, mazusi, na midi.

9 Mpe na yina beto fwana kwenda. Mu zolaka kwenda, na manima ya midi yayi, kasi mu banza ti mu ke kwenda. . . Mpe beto ke banda na suka, na ntangu ya mbote, na ntangu ya mbote. . . Beto lenda kuzwa mwa mvula ya mpembe na banzila, mpe bima, na kati-kati awa mpe na New York. Beto fwana luta na Virginie, na kati ya myongo, dyaka na kati ya ba-Alleghanys, mpe kaka na kisika ya yisi kuna ya—ya ba-Adirondacks.

10 Na yawu beto me banda, mu me zimbana, ya kele stade kuna, ya malu-malu. Ba panzaka ya ntama ya Santu Nicolas kuna, mu me bakula. Ba tungaka yayi ya malu-malu. Mpe mutindu mu zaba, beto ke zonzila bankokila yankaka ya ntete yina. . . yina ba zabisaka. Na yina beto ke vutula matondo samu na yawu, samu na ba-pentecotiste ya New York ya nene. Mpe mu banza ti beto kele na mabuundu mingi ke salaka kintwadi, mpe beto ke vingila ntangu ya nene.

11 Mpe beto ke vutuka, kana Mfumu kuzola, na kati ya sabala ke kwisa. Mpe—mpe kana ya ke vwanda luzolo ya Nzambi, na

yina, beto ke na kivuvu na kusukisa Lumingu, sabala mosi, samu—samu na lukutakanu ya Lumingu na suka.

<sup>12</sup> Mpe na yina mu ke vingila dyaka na pasteur ya beto, mutindu mu ke salaka ntangu nyonso, beno me mona, mpe—mpe mu banzaka ti kana mu kwisaka, mpe kukondwa kulomba na yandi. Mpe na yina ya kele na nkonga ya bantu ya kitoko awa, mpe bantu mu ke mona yina me katuka na ngaanda ya mbanza, kele awa; Mu banzaka ti, na nkokila yayi, kana pasteur kele ve na kima ya mfunu mingi, ti ya ke vwanda ti beto ke vwanda na lukutakanu mosi ya fyoti na nkokila yayi, kaka ya nkufi, mpe, mbote, mu banza kusambila samu na bambevo. [Dibuundu me tuba, “Amen.”—Mu.] Matondo na beno.

<sup>13</sup> Beto ke na kivuvu na kusambila samu na bambevo na nkokila yayi, kuzonzila na kubeluka ya Kinzambi mpe—mpe kusambila samu na bambevo. Kubanda na ntangu ya mbote samu beto basika na ntangu ya mbote. Mpe kana pasteur zola, yinki. . . Beno ke bandaka ntangu nionso na ngunga ya sambwadi na ndambu. Ya kieleka? Wapi mutindu samu na kubanda na ngunga ya sambwadi na nkokila yayi, sambwadi? [Mpangi Neville me tuba, “Amen.”—Mu.] Mpe bika mu kuma na ngunga ya sambwadi na ndambu, mpe yina ke sala munu kubasika pene ya ngunga ya nana to nana na ndambu, mpe ya me pesa na bantu ntangu na—na kukwenda, kana ya kele—ya kele nyonso—nyonso ya kulunga. Bantu nionso sekaka ntangu mu—ntangu mu tubaka na ngunga ya nana, to na ngunga ya nana na ndambu. Mu—mu—mu banza ti mu ke vwanda na ntangu yina. Na kusambilaka samu na bambevo, beno zaba, beto zaba ata mbala mosi ve.

<sup>14</sup> Na yawu beto me kuzwa ntangu ya nene kubanda ntangu beto ke bika beno na Automne yayi ya nsuka, na ntangu ya ntete, mpe Mfumu me sakumuna beto na bima mingi ya nene. Ti. . . Mpe na nkokila yayi, kana Mfumu zola, Mu zola kutuba na beno na kwenda tala ya nsuka yina mu kuzwaka, na Nzambi, na Colorado, na mwa basabala me luta. Mpe ya kele yina mu banzaka ti mu ke nata beno ntangu yayi, ya lendaka vwanda na lukwikilu na lukutakanu ya mbote ya kubeluka na nkokila yayi, samu na bambevo mpe bantu ya mpasi.

<sup>15</sup> Ntangu yayi, na suka yayi, samu na kukota na lukutakanu, mu. . . Kima mosi simbaka ntima ya munu pene ya ngonda mosi me luta. Mpe ya lendaka vwanda, ntangu yayi, mu banza ti ba kele. . . Ba ke na kubakaka yayi na bande? Ba ke na kubakaka yayi na bande? Yinga. Mbote mingi. Na yina mu ke zaba kisika, kana bande me basika na bantu yankaka. Mu lenda tuba ve yina mu ke tubila na suka yayi. . . Mu lenda tuba yawu ve—ya—ya kele. . . Mu zaba ti ya kele kieleka, beno me mona, Nsangu ke vwanda ya kusungama. Kasi kima, yina mu zola kusala, kele kyuvu na dibanza ya munu. Ya ke monana ya kieleka mingi. Mpe kubanda ntangu mu ke kuma, mpe kubanda mu. . . ya me

monisama na munu, Mu vwandaka na boma ti mu ke tuba kima ya yimbi mpe mu lendaka bika dibanza ya yimbi na zulu ya bantu. Mpe ya kele . . . Mpe mu . . .

<sup>16</sup> Yina mu sonikaka, na yina mu zolaka tuba, mu zengaka kitini ya yawu, samu ti mu pesa yawu ngolo mingi ve. Samu ti, beno me mona, kana—kana muntu . . . Mu—mu zola Mfumu Nzambi, mpe, mutindu kaka mu zaba ti mu zola Yandi, ya kele samu ti mu zola beno. Beno me mona? Ya kele kaka mutindu yina mu zaba. Mpe kasi mu—mu zola ve kuzwa kima yina me monisama na munu mpe na yina mu ke tuba na beno ve, kana ya kele samu na kutuba na beno. Mpe kuna mu kele na boma ti kana mu tuba kima mosi ya mwa ngolo mingi, ya lendaka sala muntu mpasi. Mpe, beno zaba, ya kele . . . Beno fwana kuma kaka na kisika ya malongi mpe na yina kuwa lutwadusu ya kutuba yina beno ke tuba. Kaka yina. Mpe na yina bantangu yankaka beno lendaka tuba kima mosi, mpe muntu mosi ke . . . muntu yankaka ke baka yawu na mutindu yankaka, mpe bawu ke kwenda na lweka *yina*; mpe na manima muntu mosi ke tuba, “Oh, yayi kele *yayi*,” beno me mona.

<sup>17</sup> Kasi mu zola ti beno zaba yina mu ke tuba kele kaka kubanza, mpe mpova *kubanza* zola kutuba “kusakana kukondwa kiyeka.” Na yawu mu kele . . . Mu—mu ke tuba ve ti yayi kele kieleka, kasi ya kele kaka mwa dibanza ti mu lendaka lutila kuna, ti beno lenda kuteza yawu mpe kumona yina beno ke banza samu na yawu. Mpe na yina ya ke vwanda, ya kieleka, ya ke—ya ke vwanda na Masonuku, samu ti mu ke longa kima mosi ve . . .

<sup>18</sup> Kasi ya kele dyaka ngunga? Yayi me kuma na ngunga yayi, mpe ya kele na bima yayi yina zola kutuba yawu? Mu ke sambila, na nionso yina kele na kati ya munu, ti ya kele ve. Beno me mona? Mu ke sambila ti ya kele mbote ve, ti ya kele ngunga yina ve. Ya ke vwanda, kasi ya me kuma ntete na ntangu yina? Beno me mona, ya kele yina mu ke kukiyufula. Ntangu yayi, muntu nyonso yina ke na kubakula, na mutindu ya kulunga, ti mu zaba ve? Mu kaka . . . Ya kele ntangu yayi? Kana ya kele, Nzambi tala beto kyadi. Kasi, kana ya kele ve ntangu yina, ti . . . ya ke kwiza.

<sup>19</sup> Ntangu yayi, na yina beto lenda, beto kele na nkunga ya nene na ntwala ya beto, kana Mfumu zola. Mpe mu fwana kwenda na bayinsi ya nzenza, kaka na manima ya Nowele, na Europe mpe na Asie; Europe, mingi-mingi. Mpe na manima mu me vutuka awa na Etats-Unis, samu na mwa balukutakanu, mpe kuna mu ke vutuka na Afrique du Sud. Mu bandaka na kilumbu ya zole ya—ya Ngonda ya yivwa, na Durban, mpe kukatuka na kilumbu ya zole, mu banza, tii pene ya kilumbu ya kumi, mpe na yina mu ke na bilumbu tatu samu na kukwenda kuna na Johannesburg mpe kubanda dyaka. Kasi mu banza ti ya kele ngonda ya Yiya, beto ke bandaka na bayinsi ya Scandinave, na Norvège mpe na Suede mpe—mpe na Finlande, mpe—mpe Holland mpe Suisse

mpe na Allemagne, mpe—mpe na Europe kuna. Na yawu beno vwanda na bisambu samu na beto.

<sup>20</sup> Beto kele na mwa balukutakanu awa, na ntangu ya Nowele ntangu yayi, kaka na manima ya Nowele. Na nzila ya yina, beto zola kuvwanda awa na nzila ya Nowele, na yinzo. Bana zola kukwiza na yinzo, na nzila ya Nowele. Mpe beto—beto zola Arizona, kasi beno zaba kima yina beto ke kondwa, mpe beto lenda kaka ve kubasika na yawu, kele dibuundu yayi mpe beno bantu. Ata kisika beto ke kwendaka, yina beto ke salaka, ya kele kaka . . . Bana, munu, kento mpe nyonso. Ya kele kaka na kisika mutindu yayi ve. Ya kele kieleka. Ya kele kaka na kisika ve.

<sup>21</sup> Mu me zyeta bamubu nyonso sambwadi, mpe mu—mu me vwanda bisika nyonso, kasi ya kele ve na kisika yina ke monana ya kukangama na munu mutindu mwa ditona yayi kaka awa. Yayi kele yawu. Beno kwenda kaka ntama na yawu mbala mosi, kana beno zola kuzaba. Ya kele kaka na kima na zulu awa. Mu me longa yinza ya muvimba, na kutala, mpe mu me vwandaka ata fioti ve, na konso ntangu yina, konso kisika yina, mu me kuwaka ntete ve Mpeve ya Nzambi, na kimpwanza mpe nyonso, mutindu mu me telama kaka awa. Yayi kele yawu.

<sup>22</sup> “Nzambi, bika yawu . . .” Mutindu kilumbu mu tulaka ditadi yina ya nsongi kuna, mu tubaka, “Mfumu Nzambi, kubika yawu ve kubwa.”

Bantu tubaka, “Na bangonda zole, ya ke vwanda yinzo ya kubongisa matoma.”

<sup>23</sup> Mu tubaka, “Kubika yawu kubwa ve, Mfumu. Ti ya vwanda ya kutelama, mpe bantu na kati awa ke kembila Nge ntangu Yesu ke vutuka.” Mu ke na kivuvu ti ya ke vwanda mutindu yina.

<sup>24</sup> Ntangu yayi beto baka Biblia ntangu yayi, mpe—mpe beto vingila ti Mfumu kupesa beto balusakumunu ya Yandi. Mpe beto zola kutanga mwa Masonuku. Mu kele na mwa Masonuku ya kusonika awa yina mu zola kutala, mpe mwa banoti. Mpe mu zola kutanga bisika tatu na Biblia, mpe mu ke pesa yawu na beno, ntete. Mu zola kutanga na Jude 5 mpe 6. Jude kele kaka Buku mosi, beno zaba. Mpe na yina mu zola kutanga Pierre ya Zole kapu ya 2, 4 mpe 5. Na yina mu zola kutanga Pierre ya Ntete, 3:18 na 20.

<sup>25</sup> Mpe dilongi ya munu na suka yayi, kana Mfumu kuzola, kele: *Mioyo Yina Kele Na Boloko Ntangu Yayi*. Uh-huh. *Mioyo Yina Kele Na Boloko Ntangu Yayi*, ya kukanga, ba me fundisama kukondwa nsuka. Ata fioti ve, ya kele ve na mutindu ya kuzwa mpulusu, beno me mona, mioyo yina kele na boloko na ntangu yayi.

<sup>26</sup> Ntangu yayi beto tanga na Buku ya Jude, ntete. Mu banza ti mu me sonika yawu awa samu na kisika ya ntete, na Jude; mpe kuna na Pierre ya Zole, mpe kuna—kuna na Pierre ya Ntete. Ntangu yayi, Jude, mu zola kutanga yawu nyonso; kasi kaka

samu na kulungisa ntangu, samu ti ya kele na ngunga kumi na ndambu yimeni, mu ke banda na nzila ya 5. Ntangu yayi, Jude vwandaka mpangi ya bakala, mpangi ya lundi, ya Yesu Klisto, mutindu beto nyonso zaba. Benó me mona? Yandi vwandaka mwana ya Joseph.

*Na yawu mu ke bambuka beno moyo, ata ti beno zabaka yayi mbala mosi, wapi mutindu ti Mfumú, vulusaka bantu na yinsi ya Egypte, na manima bebisaka bawu yina kwikilaka ve.*

27 Vulusaka bawu, ntete, basisaka bawu na Egypte, mpe na manima ya zolaka bebisaka bawu samu ti bawu vwandaka landila ve na nsangu ya bawu, beno me mona.

*Mpe bawanzio yina kebaka ve nkadulu ya bawu ya ntete, kasi bikaka kisika ya bawu mosi, yandi me keba na nsobolo ya kukondwa nsuka na nsi- . . . miniololo na nsi ya mudidi samu na lufundusu ya kilumbu ya nene.*

28 Bawanzio yina vwandaka ntete na Mazulu, mpe bumbaka ve nkadulu ya bawu mpe nzila yina bawu vwandaka, kubwaka, mpe ntangu yayi kele na kati ya miniololo ya Kukonda nsuka ya mpimpa, miniololo ya kukondwa nsuka ya mpimpa, yina ba me bumba na mutindu yayi tii na Lufundusu ya Kilumbu ya nene ntangu ba ke fundisa bawu na bantu yankaka nionso ya kukondwa lukwikilu.

29 Ntangu yayi na Pierre ya Zole, kapu ya 2, kubanda na nzila ya 4, yina ke vwanda kaka buku to zole na manima ya yawu, beno me mona.

*Samu ti kana Nzambi kubikaka ve na kupesa kitumbu na bawanzio yina kusumukaka, kasi losaka bawu na yisi na difelo, mpe vulusaka bawu na miniololo ya mpimpa, yina ba me bumba samu na lufundusu;*

*Mpe kukebaka ve yinza ya ntama, kasi vulusaka Noé, mpe bantu nana, mulongi ya ludedomo, na kunataka kufuluka ya maza na zulu ya yinza ya kukondwa busantu;*

30 Kubikaka ve Bawanzio; tulaka bawu na miniololo ya mpimpa, mpe pesaka kitumbu na yinza ya muvimba na nzila ya kubeba, ya—ya Noé.

31 Ntangu yayi na Pierre ya Ntete, kapu ya Ntete mpe . . . Pierre ya Ntete, kapu ya 3, mpe kubanda na nzila ya 18, beto ke tanga diaka. Ntangu yayi, beno kuwa na bukebi ntangu yayi.

*Samu ti Klisto mpe mbala mosi talaka mpasi samu na masumu, muntu ya kudedama samu na muntu ya kudedama ve, ti yandi lendaka nata beto na Nzambi, na kuvwandaka ya kufwa na nsuni, kasi yina ba me kindisa na nzila ya Mpeve: . . . ya kufwa na nsuni, kasi yina ba me kindisa na nzila ya Mpeve:*

*Na yina mpe yandi kwendaka mpe longaka na bampeve na boloko; yandi longaka na bantu yayi na boloko;*

*Bayina na bantangu ya ntama kutumamaka ve, ntangu mbala mosi mvibudulu ya Nzambi kuingilaka na bilumbu ya Noé, na yina nzaza vwandaka kukubama, na kati ya yina bantu fioti, ya kele, myoyo nana kuzwaka mpulusu na maza.*

*. . . mutindu kifwanikisu ya mbotika yina ke vulusa beto ntangu yayi (ve samu na mvedolo ya nsuni, kasi kupesa mvutu ya konsiansi ya mboti na ntuala ya Nzambi,) na mvumbukulu ya Yesu Klisto:*

*Bayina me kwenda na mazulu, mpe kele na diboko ya kibakala ya Nzambi; bawanzio mpe biyeka mpe bangolo me salama samu na yandi.*

Beto sambila diaka.

<sup>32</sup> Ntangu yayi, Tata ya Mazulu, mutindu nzila ya Masonuku awa, bambangi tatu, bisika tatu na kati ya Masonuku ke pesa kimbangi. Mpe Nge me tuba na Ndinga ya Nge, ti, “Na yinwa ya bambangi zole to tatu, ti konso dyambu kundimama.” Ntangu yayi mu ke sambila Nge, O Nzambi, ti Nge ke kwiza na bantu mpe ke tendula Ndinga yayi, Nsangu yayi, na nsemo yina ya zolaka vwanda, ti bakala nyonso, kento, mwana ya bakala, to mwana ya kento, lendaka bakula na ntalu yina Nge tumaka bawu na kubakula, mpe ntangu yayi na kuzabaka ti bambangi tatu yayi ke pesa kimbangi ya Kieleka.

<sup>33</sup> Mpe mu ke sambila ti Nge ke fidisa Mpeve–Santu na zulu ya beto ntangu yayi. Mpe beto ke tala na Yandi Yina kele Ntinu ya beto, na kati ya beto na suka yayi, Mfumu Yesu Klisto; kisika beto me vumbuka ntangu yayi na lukwikilu, beto me vwanda na bisika ya Mazulu na kati ya Yandi. Beto ke vingila Nsangu ya Yandi. Tuba yawu na nzila ya beto, Mfumu, kuwa yawu na nzila ya beto, na yina beto ke lomba Nge na kuyotisa bikoba yina ke zonza mpe makutu yina ke kuwa, ti ya lendaka vwanda samu na lukumu mpe nkembo ya Yandi Yina kele Masonuku. Samu beto ke lomba yawu na Nkumbu ya Yandi. Amen.

<sup>34</sup> Ntangu yayi, beno bambuka moyo na balukutakanu ya nkokila yayi, lukutakanu ya kubeluka ya nzutu. Mu banza ve ti ya ke vwanda mfunu na kukabula bakalati ya bisambu, na yina beto ke sambila kaka samu na bambevo. Mu ke na kima yina mu zola tuba na beno, mpe mu—mu banza ti ya ke nata kaka dibuundu na kisika mosi tii kisika ya ke vwanda kaka na kubeluka ya nzutu ya mutindu na mutindu. Mu zaba ti ya ke vwanda kana beto ke kwikila yawu kaka mutindu yina.

<sup>35</sup> Ntangu yayi yayi, mioyo ntangu yayi na boloko, mioyo yina kele ntangu yayi na boloko!

<sup>36</sup> Ntangu yayi, moyo ya muntu kele ve nzutu ya muntu, ya kele moyo. Beno me mona? Mpe moyo kele kima yina kele nkadulu ya mpeve. Mpe na yina ntangu nkadulu ya muntu. . . Ntangu yandi tubaka, “Beto kele ya kufwa,” Masonuku me tuba pwelele na beto yawu, “beto kele ya kufwa, mpe baluzingu ya beto kele ya kubumbama na kati ya Nzambi na nzila ya Klisto, ya kutula kidimbu kuna na nzila ya Mpeve–Santu.” Ntangu yayi, ya vwandaka ve ti nzutu ya beno kufwaka; ya vwandaka ve mpeve ya beno kufwaka. Ya vwandaka nkadulu ya mpeve ya beno yina kufwaka; beno me mona, nkadulu, yina kele moyo. Nkadulu ya moyo ya beno kele—kele Nzambi, kana beno kele ya kubutuka mbala zole. Kana ya kele ve, ya kele ya yinza. Nionso yina ke bandaka kele na nsuka, na yawu mutindu kaka ti beno lenda kuzwa Luzingu ya Kukonda nsuka kele kuzwa Luzingu yina me bandaka ntete ve. Mpe na yina luzingu ya beno bandaka ntangu beno butukaka, ntangu Nzambi pemaka pema ya luzingu na kati ya mabulu ya mbombo ya beno mpe beno kumaka moyo yina ke zinga, na yina beno ke banda kuna. Kasi ntangu beno. . .

<sup>37</sup> Nkadulu yina vwandaka na kati ya beno, na nzila ya nkadulu beno vwandaka ya yinza, ntama na Nzambi, beno vwandaka mutindu kibulu. Ya kele kaka kieleka. Muntu nionso me zaba ti beto kele ba-mammifère. Bantu yikwa me zaba yawu? Beto, beto kele ba-mammifère, beto kele baniamya ya menga yina ba me yoka, kasi yawu yina beto kele na nzila ya kivangu ya beto ya ntoto. Kasi, beno me mona, yina salaka beto ya kuswaswana na ba-mammifère yankaka, ti—ti Nzambi tulaka moyo na zulu ya beto. Beno me mona? Ntangu yayi, ba-mammifère yankaka ke vwandaka ve na bilele ya kulwata. Ata kibulu yankaka ve fwana kulwata bilele samu na kuzitisa nsoni ya yandi, kasi beto. Beto kele bayina kaka ke salaka, samu ti beto kele na moyo. Kasi, beno me mona, Nzambi, na mbandukulu, zabaka yina muntu ke vwanda mutindu. Mpe Yandi vangaka ntoto, mpe telemisaka mitindu nyonso ya bibulu, katuka yisi mingi na ya zulu mingi; mpe kibulu ya zulu mingi basikaka, vwandaka muntu.

<sup>38</sup> Mpe na yina, ntete, ba salaka muntu, yandi vwandaka mpeve muntu, na kifwani ya Nzambi.

<sup>39</sup> Na yina, “Nzambi kele Mpeve,” Santu Jean 4. Ntangu yayi, “Yandi kele Mpeve. Mpe bayina ke sambilaka Yandi, ke sambilaka Yandi na Kimpeve mpe na Kieleka. Mpe Ndinga ya Nge kele Kieleka.” Ntangu yayi, beto ke sambila Yandi na Kimpeve mpe na Kieleka. Yandi kele Mpeve ya Moyo.

<sup>40</sup> Na yina ya vwandaka ve na muntu samu na kubundula ntoto, mpe kuna Nzambi salaka muntu na fundu-fundu ya ntoto.

<sup>41</sup> Na manima Yandi bakaka na lweka ya yandi, kima na nzila ya kima, lumpanzi; mpe, na yina, kabulaka muntu yayi yina vwandaka na nkadulu ya konso ntangu, yina vwandaka nionso zole bukento mpe bakala ya bakala. Mpe Yandi basisaka kento,



samu ti ya vwandaka zola, mpe Yandi tulaka yawu na kati ya muntu yina ba bokilaka Eve, ti Adam bokilaka Eve, yina vwandaka kento ya yandi. Ya kele kisika zola ya yandi, zola ya kimuntu, zola ya phileo, yandi vwandaka ya kukangama na kento ya yandi. Ya kele mutindu yina bakala fwana vwanda bubu yayi, mpe kento samu na bakala ya yandi. Bakala, bubakala; kento, bukento.

<sup>42</sup> Mpe na yina, beno me mona, na manima Yandi salaka muntu na kifwani ya Yandi Mosi, “Yandi vangaka, bakala mpe kento,” ya vwandaka ve na muntu samu na kubundula ntoto. Mpe Yandi tulaka yandi na fundu-fundu ya ntoto, mpe na yawu yandi kumaka . . . yandi vwandaka muntu yina. Muntu yayi ya kimuntu vwandaka mammifère, beno me mona, yandi vwandaka kibulu; kasi Yandi tulaka mpeve yayi ya Nzambi, luzingu, na kati ya yandi, mpe salaka yandi na lufulu yina yandi lendaka sala nsodolo. Mpe na yina ntangu muntu yayi . . .

<sup>43</sup> Ntangu yayi beto ke banza ti beto kele kima mosi. Beno bambuka kaka moyo, yinki beto kele? Kitini ya ntoto. Kaka yina. “Mpe samu nge kele putulu, nge ke vutuka.” Na yawu ntangu beno ke mona bakala yayi ke tambula na bala-bala, yandi ke banza ti yandi kele muntu, beno zaba, mpe me kuzwa mwa ndongosolo mpe nyonso, beno ke bambuka moyo, ya kele kitini ya putulu ya Indiana. Kaka yina. Mpe kento yina yina me lwata bakupe, mpe ke kunwa makaya mpe ke denda kuna na bala-bala, na kuningisaka nzutu nyonso mutindu yandi kele mfumu ya yinsi ya muvimba, ya kele kinkuku ya putulu ya Indiana, mpe ya kele mutindu ya ke na kuvutuka manima. Na yawu beno kele mingi ve na kubanda, beno me mona. Na yawu yina, ya kele kieleka, ya kele yina beno kele.

<sup>44</sup> Kasi, moyo yina kele na kati kuna, beno me mona, moyo yina kele yina Nzambi ke na kusalaka, beno me mona. Kana Yandi lenda kaka kuzwa nkadulu yina, mpeve yina, samu na kuwisana na Yandi, kuna yinza yango ke kufwa, nkadulu mpe zola ya yinza ke kufwa, mpe bima ya yinza ke kufwa. Beno me mona? Samu ti, “Kana beno zola yinza, to bima ya yinza, zola ya Nzambi kele ve na kati ya beno.” Beno me mona? Mpe muntu fwana butama dyaka. Na yawu, nkadulu yayi fwana kufwa, mpe nkadulu ya Nzambi ke kwiza mpe ke zinga na kati ya beno. Mpe Nzambi kele kaka kima yina me bandaka ata fioti ve to yina ke sukaka ata fioti ve.

<sup>45</sup> Na yina, kuna, Yandi vwandaka ya kuvukana, beno me mona, mpe bakaka muntu yayi, ya ntoto, mpe Mpeve yayi ya Kukonda nsuka, mpe tulaka yawu kintwadi. Samu ti, Nzambi kutalanaka Yandi mosi na kati ya yawu, ti Yandi kumaka Muntu ntangu Yandi kumaka Klisto Yesu, mpe Yandi vwandaka Nzambi, beno me mona. Nzambi vwandaka na kati ya Klisto; ti, beno me mona, zingaka na kati ya Yandi, na kuvutulaka yinza na ngwisani na Yandi mosi. Mpe, na nzila ya Muntu yina ya

kulunga, mosi na mosi ya beto kulunga ve bayina ke kwikilaka na Nzambi mpe me ndima Yawu, me kuma kulunga ya Yandi.

<sup>46</sup> Mpe Yandi bikaka ata fioti ve nzutu ya Yandi kumona kupola, to Yandi bikaka ve moyo ya Yandi na difelo, kasi vumbulaka Yandi na lufwa na kilumbu ya tatu, mpe Yandi kele moyo kukonda nsuka. Mpe beto ke vwanda na nzutu mutindu nzutu ya Yandi Mosi ya nkembo.

<sup>47</sup> Ya kele samu na yina beto kele ya kubotama na Nkumbu ya Yandi, ti beto lendaka kwiza na Nkumbu ya Yandi, na lufwa ya Yandi, na mvumbukulu ya Yandi, ti beto ke telama dyaka, ke pesa kimbangi na yinza ti beto kele na Luzingu ya malu-malu, ti muntu ya ntama me kufwa. Beto me zika yinza yina ya ntete. Beno me mona? Yinza yina ya ntete me kwenda, mpe ntangu yayi beto kele nkadulu ya Yandi. Yandi ke zingaka na kati ya beto, mpe beto ke salaka ve luzolo ya beto mosi. Beto ke salaka luzolo ya Yandi. Beto ke banza ve mabanza ya beto mosi. Mabanza, dibanza kele yina ke banzaka. Dibanza yina vwandaka na kati ya Klisto Yesu kele na kati ya konso mukwikidi. Beno me mona, ya— ya kele na moyo, mpe ya kele yina beto ke na kuzonzila. Ntangu yayi, yina kele kitini yina mu ke na kubanza ntangu yayi, yina kele na kati ya beto, moyo.

<sup>48</sup> Ntangu yayi, kana beto tala, na yayi, ya kele na bima mingi yina ke salama na ntangu mosi, mpe beto ke kukiyufula samu na yinki yawu ke salama, mpe beto ke kukiyufulaka beto mosi, mpe beto ke yufulaka bantu yankaka. Kasi na nsuka, na manima ya mwa ntangu fyoti, beto ke tala ti, kana beto kele Miklisto, ya ke sala kaka mbote, na mutindu nyonso. Beno me mona yawu. Baklisto nyonso beno me mona yawu. Beto ke kukiyufula samu na yinki beto salaka yawu.

<sup>49</sup> Mu vwanda kukiyufula bantangu yankaka, ntangu mu tangaka ntete Biblia, “Samu na yinki Nzambi bikaka Abraham, muntu yina ya nene, telemaka kuna mpe tubaka ti Sarah vwandaka ve kento ya yandi?” Mpe mutindu Yandi bikaka yandi kutelama kuna mpe kuvuna na yina, mpe bima yina yandi salaka, mpe na yina wapi mutindu Yandi bikaka Abraham kubika yinsi ya nsilulu kisika Yandi tubaka na yandi na kukwenda ve. Juif nionso yina ke bikaka yinsi ya nsilulu kele retrograde, samu ti Nzambi pesaka yawu na bawu mpe pesaka bawu nsilulu ya kuvwanda kuna, beno me mona, mpe bawu bikaka yawu. Na yawu yandi kwendaka na Guérar. Kasi kana ya vwandaka ve samu na yina . . .

<sup>50</sup> Mpe kuna Abimélec, ntotila yango kuna na yinsi ya ba-Philistin, yandi kubwaka na zola na Sarah mpe zolaka kwelana na yandi, mpe vwandaka muntu ya mbote, muntu ya kusungama. Mpe na manima yandi kukondwa ntembe . . . Yayi ke monana buzoba, kasi samu na kukumisa yawu kieleka samu na beno. Na manima kuyobila ya yandi ya mpimpa mpe yandi lwataka

pyjama ya yandi, mpe tubaka bisambu ya yandi mpe kwendaka lala, Mfumu kumonikaka na yandi mpe tubaka, “Nge kele kaka mbote mutindu muntu ya kufwa,” mpe bakala yango salaka kima ve. Beno me mona? Kieleka ba vunaka yandi, na nzila ya Abraham mpe Sarah. Ya kele kieleka. Yandi tubaka, “Nge kele na kento ya bakala yankaka, beno me mona. Mpe mu—mu ke kuwa ve bisambu ya nge, ata wapi mutindu nge ke sambila. Nge kele kaka ya kufwa. Kasi bakala yina kele profete ya Munu.” Beno me mona?

<sup>51</sup> Beno me mona, ya kele mpasi na kubakula yawu, beno me mona. Kasi kana ya vwandaka yawu ve, beto zolaka zaba ve yina lemvo vwandaka.

<sup>52</sup> Samu na yinki yandi kwendaka mpe kwelaka Agar, na manima ya kuzwa kento ya luzolo mutindu Sarah? Mpe yandi zolaka ve kusala yawu, beno me mona, kasi Sarah tubaka na yandi. Mpe kuna Mfumu tubaka na yandi, “Nge kuwa yina Sarah tubaka na nge.” Samu na yinki? Ya zolaka vwanda na Ismaël, “ti kento ya mpika mpe mwana ya yandi ke vwanda ve kilandi na kento ya kimpwanza mpe mwana ya yandi.” Beno me mona yina mu zola kutuba?

<sup>53</sup> Bima yayi nionso kele bifwanusu. Samu na yinki profete yina fwana kukwela kento ya kindumba mpe kuzwa . . . na bana yayi, kuzwa bana zole na nzila ya yandi? Bonso kidimbu. Samu na yinki mosi me lala na lweka ya yandi ya kibakala bilumbu nkama tatu na makumi yiya, mpe na yina ya vwandaka na bilumbu mingi na lweka yankaka mutindu yina? Mutindu kidimbu. Mosi vwandaka katula bilele ya yandi mpe vwandaka tambula na ntwala ya Israel. Mpe, ntangu yayi, bima nyonso yina, ya vwandaka bifwanusu mpe bivudi, beno me mona; mpe beto fwana kuzwa bima yango, samu na kufulusa na kati.

<sup>54</sup> Mpe, bambala mingi, bima ke salamaka na beto ti beto ke kukiyufulaka samu na yinki ya kele. Ya kele Nzambi lakisaka beto kima na ntwala.

<sup>55</sup> Ntangu yayi, mutindu mwana-bakala ya fioti, mpe beno zaba disolo ya luzingu ya munu, mu—mu ke kwikilaka ntangu nionso, kubanda mu lenda bambuka moyo ntete. . . Mosi ya bima ya ntete yina mu ke bambuka. . . Ntangu yayi yayi, ntangu yayi, ya lendaka vwanda ti beno me tuba na munu kima mosi mazono, mpe mu ke zimbana yawu bubu yayi. Kasi ya kele na bima yankaka, kuna, yina salamaka na bilumbu ya beto ya bantwenya, mingi ya beto kele mutindu yina, ti beto ke bambuka ntangu nyonso. Mpe yayi lendaka monana buzoba samu na kutuba mutindu yayi, kasi mu ke bambuka ntangu mu vwandaka komvula, na robe ya yinda. Ba-bébé ya fioti, ntangu yayi bayankaka na kati ya beno bantu ya bamvula ya munu ke bambuka moyo na yawu, ba-bébé vwandaka lwata ba-robe ya yinda. Mpe mu ke bambuka moyo ti mu vwandaka komvula,

mpe mu vwandaka katula mvula-mpembe na makulu ya munu ya noko mpe mu vwanda dia yawu, ntangu yandi kotaka mpe vwandaka ya kutelama na lweka ya tiya.

<sup>56</sup> Mpe na yina kima ya kulanda mu ke bambuka moyo na kubaka kisika na luzingu ya munu, ya vwandaka vision, ya ntete yina mu me kuzwaka ntete ve, mpe tubaka na munu ti mu ke zinga kitini ya nene ya luzingu ya munu pene-pene ya mbanza yina ba ke bokilaka New Albany. Mpe mu vwandaka mwana mosi ya fioti ya mongo kuna na zulu, ya vwandaka na dokotolo ve ntangu mu butukaka. Mpe—mpe mu—mu . . . Beno zaba, bawu . . . Mu me zinga awa pene-pene ya bamvula makumi tanu, kaka awa; vision.

<sup>57</sup> Mpe na yina wapi mutindu mu ke zabaka ntangu nionso ti ya vwandaka na Nzambi kisika mosi kuna, mpe mutindu mwana-bakala ya ntwenia Yandi tubaka na munu, “mu ke kunwaka tabaka ata mbala mosi ve, to kunwa ve, to kutula mvindu na nzutu ya munu,” yina ke sala yimbi na bakento mpe nyonso. Mu ke vwandaka ntangu nionso na boma ya yawu, mpe mu vwandaka ntwenia ya bakala.

<sup>58</sup> Mpe na yina mu kwendaka kuzomba kilumbu mosi, yina ke monana mutindu nkadulu ya zole samu na munu, samu na kuzola kuzomba. Mpe mu kwendaka kuzomba na mwana mosi ya bakala, Jim Poole, mwana mosi ya luzolo. Mu banza ti mwana ya yandi ya bakala ke kwizaka na dibuundu awa, Jim ya ntwenia, mpe dibuta ya mbote ya bantu. Mu zaba ba-Pool. Jimmy mpe munu lalaka kintwadi mpe beto vwanda zinga kintwadi kubanda beto vwandaka bana ya fioti ya babakala na lukolo. Beto kele pene ya bangonda sambanu, na mvula. Mpe Jimmy bikaka munduki ya yandi kukwenda, mpe yandi bulaka munu masasi na makulu nionso zole, pene-pene ya munu, na munduki mosi. Ba nataka munu na lupitalu, mpe, kuna, ya kulala kuna ke kufwa, na penicilline to kima mosi ve na bilumbu yina. Mpe, ntangu yayi, ba vwandaka na lele ya kitende na yisi ya munu, mpe mu zaba na nkokila yina . . . Ba zolaka kupasula na suka yina vwandaka landa.

<sup>59</sup> Bawu bakaka kaka mpe sukulaka bamputa, mpe bitini ya nene ya nsuni me pasuka, mpe bawu me baka ba-ciseaux mpe me zenga yawu, mpe mu vwanda simba maboko ya muntu. Mpe bawu vwandaka na Frankie Eichmann, yandi me kudifwa ntama mingi ve, mpe bawu bendaka na ngolo, maboko ya munu na binkoso ya yandi, ntangu—ntangu bawu manisaka. Mu bokaka mpe mu dilaka, mpe kangamaka na mutindu yina, mpe bawu kuzenga kitini yina ya dikulu. Mu vwandaka na bamvula kumi na yiya, kaka mwana ya bakala.

<sup>60</sup> Mpe na nkokila yina mu mekaka na kulala, mpe bawu . . . Mu vumbukaka, kima mosi tiamukaka. Mpe awa vwandaka menga, pene ya ba-litre zole na zulu ya tanu, mu banza, yina

katukaka na misisa ya bawu. Mpe bawu vwandaka . . . bawu bakaka rayon x, mpe bawu tubaka ti ba bulaka munduki pene-pene mingi na artère yina, na lweka mosi to yankaka, ya ke kaka mwa ditono ba ke zenga yawu na bitini zole, mpe mu ke banda kubasisa menga. “Mbote,” mu banzaka, “yayi kele nsuka ya munu.” Mpe mu tulaka maboko ya munu na nsi mutindu *yayi* mpe mu telemisaka yawu, mpe menga vwandaka kulumuka na maboko ya munu, ya vwandaka menga ya munu mosi yina mu vwandaka ya kutandama na kati. Mu bokilaka, mu bulaka ngunga. Infirmier kwisaka, mpe yandi ningisaka yawu na zulu ya kitambala samu kima mosi ve bawu lendaka sala.

<sup>61</sup> Mpe na suka yina landaka, na bankadulu ya bawu ya kulemba, bawu vwandaka vutula menga ve na ntangu yina, beno zaba, na yina bawu—bawu salaka munu lipaso. Mpe ba pesaka munu ether. Mpe ntangu mu . . . Kiboba ya kudasuka, mu banza ti beno ke bambuka moyo, ya kele anesthésie ya ntama. Mpe na nsi ya ether yina, ntangu mu basikaka, mu basikaka na ether yina na manima ya bangunga nana. Ba zolaka pesa munu mingi, ba banzaka ti mu lendaka ve . . . Mu lendaka ve kuvumbuka. Ba lendaka ve kuvumbula munu.

<sup>62</sup> Mu ke bambuka moyo na Mama Roeder telemaka pene-pene ya munu, kuna na lupitalu. Mu ke zimbanana ata fioti ve kento yina. Ata nionso yina ke salama, mu lendaka ata fioti ve kuzimbana yandi. Yandi vwandaka kaka kento ya ntwenia kuna. Bakala ya yandi vwandaka surveillant général awa na kompani ya matoma. Mpe mu—mu ke bambuka moyo ti yandi telemaka pene-pene ya munu, yandi na Mama Stewart. Mpe ya vwandaka yina futaka facture ya lupitalu ya munu. Mu . . . Beto vwandaka ve na madia ya kudia, na yinzo, na yina wapi mutindu beto lendaka futa facture ya lupitalu, bankama ya ba-dollars? Kasi yandi, na nzila ya kimvuka ya lutondo ya dibuundu ya yandi mpe ya Ku Klux Klan, futaka mbongo ya lupitalu samu na munu, ba Francs-maçons. Mu lenda ata mbala mosi ve kuzimbana bawu. Beno me mona? Ata yina bawu ke sala, to yina, mu kele kaka . . . ya kele na kima mosi, mpe yina ke vwanda na munu, beno me mona, yina bawu salaka samu na munu. Mpe ba futaka facture ya Docteur Reeder. Yandi ke na kuzinga dyaka, ke na kuzinga awa na Port Fulton, lendaka tuba na beno disolo.

<sup>63</sup> Ntangu mu basikaka na yisi ya kudasuka yina, ya vwandaka na kima kusalamaka na munu kuna. Mu ke kwikilaka yawu ntangu nionso mutindu vision. Samu, mu vwandaka ya kulemba mingi, mpe munu . . . Bawu banzaka ti mu ke kufwa. Yandi vwanda dila. Ntangu mu zibulaka meso ya munu, mu lendaka tala, mu lendaka kuwa yandi kutuba, mpe na manima mu vutukaka samu na kulala, mpe vumbukaka, bambala zole to tatu. Mpe kuna mu kuzwaka vision. Mpe kuna mu vwandaka . . .

<sup>64</sup> Pene ya bangonda sambwadi na manima, mu zolaka kwenda kubasisa na makulu ya munu bitini ya bampusu ya munduki

mpe bilele ya kuzomba na batasi ya mafuta; dokotolo lendaka ve kukatula yawu. Mpe na yawu mu vwandaka na pwazo ya menga, makulu nyonso zole kukatukaka mpe salaka ntembe na yisi ya munu, mpe ba zolaka kukatula makulu nyonso zole na luketo ya munu. Mpe mu kaka. . . Mu tubaka, “Ve, ya me kuma kaka mingi na zulu mpe me katula yawu *awa*.” Mu lendaka ve kundima yawu, beno me mona. Mpe na yina na nsuka, Docteur Reeder mpe Docteur Pirtle, ya Louisville salaka lipaso, mpe mu me zenga yawu kuna mpe mu me basisa yawu; mpe bubu yayi mu me kuzwa makulu ya kitoko, na lemvo ya Nzambi.

Kasi na yisi ya vision ya nsuka yina mu kuzwaka. . .

<sup>65</sup> Vision ya ntete, ntangu mu kumaka kuna, mpe na manima mu kwendaka na kati ya vision yayi. Mpe mu banzaka ti mu vwandaka na difelo, kaka pwelele. . .

<sup>66</sup> [Mpangi mosi ya bakala me tuba, “Lemvokila munu, tata.”—Mu.] Uh-huh. [“Ya kele na kento mosi awa yina me kufwa, kaka *kuna*.”] Mbote mingi, muntu mosi ke tentika maboko ya yandi na zulu ya yandi, mpe yandi. . . kukondwa ntembe beno nata yandi kuzwa mupepe. Ntangu yayi muntu nyonso yina kele ya kutelama kuna, beno tentika maboko ya beno na zulu ya yandi.

Beto sambila.

<sup>67</sup> Mfumu ya luzolo Yesu, ti mpangi ya beto ya kento yina kele ya kubela na suka yayi, mpe yandi kubwaka ngambu na kati ya kivinga, ti lemvo mpe ngolo mpe ngolo ya Nge. . . ya kele na maboko ya kutentika na zulu ya yandi ntangu yayi, yina ke talisa Nge. Mpe Masonuku me tuba, “Bidimbu yayi ke landa bayina ke kwikila. Kana bawu tentika maboko ya bawu na zulu ya bambevo, bawu ke beluka.” Mpe ntangu yayi bika ti mpangi ya beto ya kento kubasika na kimbevo yayi, mpe kubeluka samu na nkembo ya Nzambi. Na Nkumbu ya Yesu Klisto beto me lomba yawu, mpe me pesa yandi na Nge. Amen.

<sup>68</sup> Ntangu yayi beno nata yandi kuzwa mupepe. Ya kele—ya kele kima mosi ya yimbi. Mu lenda kuwa yawu awa, kieleka, kieleka yimbi. Ya ke kaka nsatu mosi ya kukangama pema, awa na estrade. Mu kuwaka yawu, bambala yiya to tanu awa. Kana ya kele. . . na ntangu yandi ke kuwa mwa mbote, na yina, beno nata yandi na kisika yandi lenda kuzwa mupepe. Ya kele mbote. Uh-huh. Beno me mona, ya kele kaka kima mosi ya yimbi mingi, beno zaba. Bantu ke vanga, mosi na mosi ya beto, ya kele na bametele ya kubela. Kana beno ke na yawu, muntu mosi ke na masa kuna, to kima mosi samu na kutula na zulu ya mpangi-kento. Yandi ke—yandi ke kuma, mbote mingi ntangu yayi. Beno me mona? Mbote mingi. [Mpangi-bakala mosi me tuba, “Beto zibula bielo, Mpangi Branham.”—Mu.] Yinga, ya lendaka vwanda kana beno lendaka zibula bielo, ntangu yankaka, to kupesa kaka mwa mupepe, mutindu beto lenda sala yawu, na mutindu nionso, beno me mona.

69 Ntangu yayi na ntangu yayi, mutindu mu kuzwaka vision yayi, mpe mu vwandaka banza ti mu—mu me luta luzingu yayi na kati ya nkwasumu.

70 Mpe bangonda sambwadi na manima, awa na Clark County Memorial Hospital, ba salaka munu lipaso ya zole. Mpe na ntangu yina, ntangu mu basikaka, mu banzaka ti mu vwandaka ya kutelama kuna na Wesete. Mu kuzwaka vision yankaka. Mpe ya vwandaka na kulunsi ya nene ya wolo na kati ya mazulu, mpe Nkembo ya Mfumu vwandaka kusema na kulunsi yina. Mpe mu telemaka kuna na maboko ya munu mutindu *yayi*, mpe Nkembo yina vwandaka kulumuka na ntulu ya munu. Mpe munu . . . Vision bikaka munu. Tata ya munu vwandaka ya kuvwanda kuna ke tala munu, ntangu vision kwizaka.

71 Mu ke vwandaka ntangu nionso na kidi-kidi, beno . . . Bantu nionso yina me zaba munu bamvula nionso yayi, me zaba ti mu ke zolaka ntangu nionso kukwenda na Weste. Beno zaba mutindu ya kele. Ya ke vwandaka ntangu nyonso kima na Wesete. Kasi samu muntu yina ke longukaka bambwetete tubaka na munu kilumbu mosi, kima mosi, ti mu fwana kwenda na wesete. . . Bambwetete, ntangu bawu lutaka bansungi ya bawu mpe nionso, mu butukaka na nsi ya kidimbu yina, mpe mu ke kwenda na ntuala ata fioti ve na Este; mu fwana kwenda na Weste. Mpe mvula me luta mu kwendaka, na Wesete, samu na kulungisa yina nsatu ya luzingu ya muvimba me vwanda, beno me mona, samu na—na kusala yawu.

72 Samu na yinki mu kele kuna? Ya kele kima ya kulutila buzoba. Yandi vwandaka kuna na ntoto ya kuyuma, yandi vwandaka futa ba-dollars nkama mosi na kumi na ngonda mosi, na kufuta, mpe awa kele na yinzo ya kuvwanda na zulu awa, yinzo ya pasteur, me pesa munu, beno me mona. Kasi ya ke na kulandaka Mfumu, beno me mona, ya—ya kele nyonso yina mu zaba na kusala. Mpe beno zaba ba-vision mpe yina me salama kuna. Ntangu yayi—ntangu yayi na yayi mu zola kutuba na . . .

73 Ntangu yayi kana mpangi ya beto ya kento ke na kuwa mwa ya kulemba, Mpangi Roy, mpe yandi ke . . . mu zola kunata yandi kisika mosi kuna mpe kutula yandi na kivinga na lwaka awa, kisika yandi ke kuzwa mingi mupepe to kima mosi, mpe ya kele kieleka nyonso ya kulunga, samu ti, mu ke tala ti yandi ke vwanda mbote ntangu yayi, beno me mona. Ya kele mbote. Yandi ke lemba kaka, ke bela. Mpe na yawu mu—mu ke tuba na beno, kana yandi . . . kana beno zola kunata yandi awa kisika mupepe . . . beno telemisa banela yayi, Mpangi Roy, mpe kana mpangi ya kento zola kukwiza, ya—ya ke vwanda mbote. Beno me mona, kana yandi zola ku—kukwisa awa, mbote, beno vwanda na boma ya yawu ve.

74 Mu zola kutentika maboko na zulu ya yandi ntangu yandi ke luta awa. Beno nyonso lemvokila munu kaka mwa ntangu

fyoti. Mpe Nzambi lemvokila munu samu . . . Ti, ya kele kieleka, mpangi.

<sup>75</sup> Tata ya Mazulu, mwana ya Nge ya kento awa kele ya kuvwanda awa na suka yayi, mpe yandi me kwiza na kuwa Nsangu, mpe me kuzwa . . . Satana ke na kumeka na kubula yandi na yawu, kasi yandi lenda ve kusala yawu. Yandi lenda ve kusala yawu.

Lusakumunu na nge, mpangi ya kento, na Nkumbu ya Yesu Klisto.

Mbote mingi. Mbote, kielo yango, mu banza kana fyoti . . . ? . . . bampangi, kuna mupepe lenda kwiza awa, na beno.

<sup>76</sup> Oh, beno ke zonzila na bima mingi, beno fwana kota na bisika yankaka ya bayinsi ya nzenza kisika ba vwandaka fulusa yawu na zulu ya mosi na yankaka, na kimbevo ya wazi mpe cancer. Mpe, oh, la la, na mpasi beno lenda kuzwa mpema ya beno, beno zaba, na bima ya mutindu yina. Ya vwandaka na bayinzo ya nene ya nene, ya vwandaka kaka na mikolobo na—na bimbevo. Mpe beno zaba yinki kimbevo ya wazi lendaka vwanda. Kuna, ya kutandama kuna kukondwa makutu, mpe ndambu ya bizizi ya bawu vwandaka ya kudia, mpe kukondwa maboko, mpe mwa bansongi ya makulu ya kuzenga, mpe bima mutindu yina, ya kutandama, ya kutentika na zulu ya mosi na yankaka. Mpe mingi ya bawu ke na kufwa kaka kuna, ke tandama kuna, ke kangama na zulu ya mosi na yankaka, na kumekaka na kukota kisika mosi, beno zaba, samu na kuwa Nsangu.

<sup>77</sup> Mpe ntangu yayi—ntangu yayi na yayi, mu ke tuba na beno yina kusalamaka. Na vision yina mu kuzwaka, mu ke vutuka, samu ti mu me nata yawu, ba-vision zole na kati, samu na kulakisa beno yawu na zulu ya mosi ya yawu. Mu zolaka vwanda kuna na Wesete. Mu ke vwandaka ntangu nionso na nsatu ya yawu.

<sup>78</sup> Mpe ntangu yayi, lukanu ya Nsangu na suka yayi kele kutula dibuundu na kisika ya yawu, na nyonso yina Yandi ke bika munu kutula dibuundu na kisika ya yawu, landila mutindu mu zaba, tii . . . na yina mu ke kwenda na ntwala. Mpe yayi me bula munu, na yina mu zolaka tula dibuundu na kisika ya yawu. Ntangu yayi, yayi kele kaka samu na tabernacle yayi, beno me mona, awa. Ntangu yayi, mpe na vision yayi, ya ntete, awa kele yina salamaka.

<sup>79</sup> Na manima vision me bula munu, mpe mu vwandaka ya kulemba mingi, mpe mu me zimbisa menga yina nionso, mpe kwendaka . . . Mu banzaka ti mu vwandaka ya kufuka na Seko ya kukondwa nsuka. Mingi na kati ya beno me kuwa munu kutuba yayi na ntwala, mpe—mpe kukota na Seko yina ba lenda kondwa ve. Ya ntete, mu vwandaka luta mutindu matuti, mpe na manima na nzila ya mpimpa, mpe mu vwandaka kulumuka, kulumuka, kulumuka. Mpe kima ya ntete beno zaba, mu me



kwenda na bizunga ya bantu ya kuzimbana, mpe kuna na kati mu—mu vwanda boka. Mpe mu talaka, mpe kuna, kaka nyonso, ya vwandaka ve na lufulu samu na yawu. Mu lendaka ata mbala mosi ve kusutope na kubwa. Samu ti Seko, ya vwandaka talana mutindu, mu zolaka kubwa. Ya vwandaka ve na kima ya kutelama, kisika mosi ve.

<sup>80</sup> Mpe na yina wapi luswaswanu ya vwandaka na vision mu vwandaka awa, ntama mingi ve, na kuvwandaka na Nkembo na bantu, luswaswanu! Kasi na kati ya yayi, mutindu mu vwandaka kulumuka, na nsuka, mu—mu me bokila papa ya munu. Na yina, na kuvwandaka kaka mwana ya fioti, yawu yina mu ke sala. Mu bokilaka papa ya munu, mpe papa ya munu vwandaka kuna ve. Mpe mu bokilaka mama ya munu, “Muntu mosi me simba munu!” Ya vwandaka ve na mama kuna. Mu vwandaka kwenda kaka. Mpe mu bokilaka Nzambi kuna. Ya vwandaka ve na Nzambi kuna. Ya vwandaka ve na kima kuna.

<sup>81</sup> Mpe na manima ya mwa ntangu fyoti mu kuwaka makelele ya kulutula mawa yina mu me kuwaka ntete ve, mpe ya vwandaka kuwa ya mpasi mingi. Ya kele ve na mutindu. . . Mpe tiya ya kieleka ke yokama ke sepela na lweka ya yina yayi vwandaka. Ntangu yayi ba-vision yina me vwandaka ata fioti ve na kifu. Mpe ya vwandaka kaka mosi ya bansatu ya kulutula boma yina mu me kuzwaka ntete ve, mpe yinki. . .

<sup>82</sup> Mu kuwaka makelele, kuwakana mutindu kisika ya bantu ya kufwa. Mpe ntangu ya vwandaka, mu talaka, ke kwisa, mpe ya vwandaka bakento. Mpe bawu vwandaka na kima ya vert, bawu lendaka kaka kumona kizizi ya bawu, mpe bawu vwandaka na bima ya vert na nsi ya meso ya bawu. Mpe meso ya bawu vwandaka mutindu na manima, mutindu bakento bubu yayi ke na kuyema meso ya bawu, ke vutuka na manima mutindu *yayi*, mpe kaka meso ya bawu mpe kizizi. Mpe bawu vwandaka kwenda, “Ooh, ooh, ooh, ooh!” Oh, la la!

<sup>83</sup> Mu bokaka, “O Nzambi, wila munu mawa. Wa munu mawa, O Nzambi! Wapi Nge kele? Kana Nge ke bika kaka munu kuvutuka mpe kuzinga, mu ke sila na Nge, na kuvwanda mwana-bakala ya mbote.” Ntangu yayi, ya kele kaka kima yina mu lendaka tuba. Ntangu yayi, Nzambi zaba, mpe na Kilumbu ya Lufundusu, Yandi ke fundisa munu samu na nsamunu yina. Yawu yina mu tubaka, “Mfumumu Nzambi, bika mu vutuka, mpe mu ke sila na Nge ti mu ke vwanda mwana-bakala ya mbote.”

<sup>84</sup> Mpe ntangu mu bulaka munduki, mu tubaka baluvunu, mu salaka kaka nionso yina mu lendaka sala, kaka kima mosi yina mu zolaka tuba. . . Mu ke sala mbote na kusukula yawu na yina mu kele kaka awa ntangu yayi. Mpe ntangu mu talaka na nsi mpe mu monaka ti mu vwandaka na ndambu ya kupanzana na bitini zole, pene-pene, Mu tubaka, “Nzambi, wa munu mawa. Nge zaba ti mu me salaka pité ata fioti ve.” Ya vwandaka kaka kima yina

mu lendaka tuba na Nzambi. Mu me ndimaka ntete ve pardo ya Yandi, mpe bima nionso yayi. Mu ke tuba kaka, mu lenda tuba, “Mu me salaka ntete ve pité.”

<sup>85</sup> Mpe na yina ba basisaka munu kuna. Mpe na yina, na yina, mu bokaka, “Nzambi, wila munu mawa. Mu ke vwanda mwana-bakala ya mbote, kana Nge ke bika kaka mu vutuka,” samu ti mu zabaka ti ya vwandaka na Nzambi kisika mosi. Mpe na yawu sadisa munu, bivangu yina ya kulemba bisika nionso, mu vwandaka me kuma kaka ya malu-malu. Mpe nsatu ya kulutila boma, ya boma, ya yimbi na kati ya yawu. . . Ya vwandaka mutindu meso ya nene, na mansala ya meso yina vwandaka basika mutindu *yina*, mpe meso ya kuyema mutindu niawu, ya vwandaka landila mutindu *yayi*; mpe bima ya vert, mpe mutindu yawu vwandaka pola to kima mosi.

Mpe bawu vwandaka—bawu vwandaka kwenda, “Ooh, ooh, ooh!” Oh, wapi nsatu! Ntangu yayi ntangu mu. . .

<sup>86</sup> Na yina na ntangu ya fyoti, mu vutukaka dyaka na luzingu ya yinza. Kima yango me kwamisa munu. Mu banzaka, “Oh, bika ya vwanda ti mu ke kwenda ata fioti ve na kisika ya mutindu yina; muntu yankaka ve ke kwenda na kisika ya mutindu yina.”

<sup>87</sup> Bangonda sambwadi na manima, mu kuzwaka vision ya kutelama na Wesete, mpe na kumonaka kulunsi ya wolo yina kukwiza na zulu ya munu. Mpe mu—mu zabaka ti ya vwandaka na bizunga ya bantu ya kufundisa kisika mosi kuna.

<sup>88</sup> Ntangu yayi, mu me talaka yawu mingi ve tii pene ya basabala yiya me luta. Kento ya munu. . . Mu me banzaka yawu ata fioti ve na bampova yayi. Pene ya basabala yiya me luta, kento ya munu na munu kwendaka kuna na Tucson, samu na kusala mwa shopping. Mpe na yina beto vwandaka ya kuvwanda. . . Kento ya munu, beto kwendaka na kitini ya yisi, mpe—mpe ya vwandaka na nkonga ya babakala-kento vwandaka na bansuki ya bawu ya kubwa, beno zaba, mutindu bakento ke salaka yawu, mpe—mpe mwa bansuki vwandaka kulumuka bawu na mbunzu, mpe ba vwandaka me lwata bapantalon yayi ya nkufi mingi, mutindu yayi, mu banza babeatnick, to nionso yina beno ke bokilaka yawu. Mpe bawu vwandaka kuna na kati, mpe bantu nionso vwandaka tala bawu, mpe bayintu ya bawu vwandaka nene mutindu *yina*, mutindu bakento yina beto ke lwata bayayi awa “bansuki ya kuzenga”, beno zaba. Mpe bawu vwandaka kuna.

<sup>89</sup> Mpe ntwenya mosi ya kento kwizaka, mpe yandi tubaka, “Yinki nge ke banza samu na yawu?”

<sup>90</sup> Mu tubaka, “Na yina nge fwana vwanda na nsoni ya nge mosi, kana nge lenda banza yawu.” Mu tubaka, “Yandi kele kaka na muswa ya kusala yawu mutindu beno ke salaka. Ata mosi ya beno kele na muswa.”

<sup>91</sup> Na yawu mu mataka na etaze ya zulu, mpe mu kwendaka vwanda. Mpe ntangu mu salaka mutindu yina, ya vwandaka na kimatinu mosi, ya vwandaka na kati ya kibumbulu ya J. C. Penney, mpe kimatinu vwandaka nata bantu na zulu. Mbote, kieleka mu me baluka na kifundu ya munu, na kumonaka bakento yina kukwiza kuna; ntwenya, ya kukula, mpe yina ke kukipeke ve, na mifutu, mpe na mutindu nyonso, ya kulwata mwa kupe; nzutu ya bawu ya mvindu, mpe bakento yina me lwata bilele ya kuvukisa banzutu, na bayintu ya nene mutindu yina, mpe awa bawu me kwiza. Mpe mosi yina mataka na zulu ya kimatinu, kwisaka mutindu yayi, kisika mu vwandaka ya kuvwanda kuna na kiti, ya kuvwanda kuna na yintu ya munu ya kukulumusa.

<sup>92</sup> Mpe mu balukaka mpe talaka. Mpe mosi ya bawu vwandaka mata bimatini vwandaka tuba, “Ooh,” Espagnole vwandaka tuba, na kento yankaka. Yandi vwandaka kento ya mundele yina vwandaka tuba na kento ya Espagne. Mpe ntangu mu talaka, [Mpangi Branham me fina misapi ya yandi—Mu.] na mbala mosi mu sobaka. Kuna, mu monaka yawu na ntuala. Meso ya yandi, beno zaba mutindu bakento ke na kusalaka ntangu yayi, ke na kuyema meso ya bawu, ntama mingi ve, mutindu niawu, beno zaba kutula yawu mutindu *yayi*, mpe kulwata maneti ya niawu mpe nyonso, beno zaba, na meso ya kumata mutindu *yayi*, mpe kima ya vert na nsi ya meso ya bawu. Ya vwandaka na kima yina mu monaka ntangu mu vwandaka mwana. Ya vwandaka kaka na kento yina. Mpe mu vwandaka me kondwa kaka nionso, mpe mu bandaka na kutala na nziunga-nziunga, mpe ya vwandaka na bantu yina vwandaka baluka na mbangu, beno zaba, na kuzonzilaka bantalu mpe bima na kati ya kivinga. Mpe munu kaka . . .

<sup>93</sup> Ya monanaka ti mu me soba mwa ntangu fioti. Mpe mu talaka, mpe mu banzaka, “Yawu yina mu monaka na difelo.” Ba vwandaka kuna, na mutindu yina ya kupola. Mu banzaka samu ti bawu vwandaka na difelo yinki salaka bawu mutindu yina, bleu ya ntinta ya vert na meso ya bawu. Mpe awa vwandaka bakento yayi ya kupakula na ntinta ya vert, kaka mutindu vision yina tubaka pene ya bamvula makumi yiya me luta.

<sup>94</sup> Beno me mona, pene ya bamvula makumi yiya me luta, ya kele yina ya vwandaka. Mu kele na makumi tanu na yiya; mu vwandaka na kumi na yiya. Na yawu pene ya bamvula makumi yiya me luta, mu . . . Mpe ya kele . . . Ya kele lutangu, na mutindu nyonso, ya lufundusu, beno me mona. Ntangu yayi ya vwandaka . . .

<sup>95</sup> Mu monaka yawu mpe mu lendaka tuba ve na kento ya munu ntangu yandi kwisaka. Yandi vwandaka kuna vwanda meka na kubaka Sarah mpe bana kima, mutindu ya robe to kima samu na lukolo, mpe mu—mu lendaka mpe ve . . . Mu lendaka tuba na yandi ve. Yandi tubaka, “Bill, yinki diambu na nge?”

Mu tubaka, “Cherie, mu kele mutindu... Mu me kuma mutindu muntu ya kufwa.”

Mpe yandi tubaka, “Wapi dyambu? Nge kele ya kubela?”

Mu tubaka, “Ve. Kima mosi me salama.”

<sup>96</sup> Ntangu yayi yandi zaba ve. Yandi ke na kuingila bande yayi kuvutuka. Mu me tubaka yawu ntete ve na muntu mosi. Mpe mu banzaka ti mu ke vingila, mutindu mu silaka, na kunata yawu na dibuundu. Beno me mona? Beno nata yawu na dibuundu. Yina vwandaka nsilulu ya munu. Mpe beno ke bakula, na manima ya nokila yayi, ya kele samu na yina mu ke meka na kuzitisa nsilulu ya munu. Beno me mona?

<sup>97</sup> Na yina mu banzaka, ntangu mu monaka meso yina kuzwaka bakento yayi mutindu ya kupola. Ya vwandaka na bantu ya Espagne, ya France, mpe na ba Indien, mpe mindele, mpe nionso kintwadi, kasi na bayintu ya bawu ya nene, beno zaba, na meso ya kufika, na bansuki awa mpe kuna, mutindu ba ke salaka yawu, ba ke kombaka yawu na mutindu ba ke bendaka mika, ba ke bendaka yawu na manima. Beno zaba, beno zaba mutindu bawu ke salaka yawu, ke bongisaka yawu mutindu bawu ke salaka yawu. Mpe na yina meso ya bawu mutindu ya kupola, mpe na meso ya kupakula, mpe meso ya bawu vwandaka landila mutindu meso ya niawu. Mpe bawu vwandaka zonza, mpe kuna mu vwandaka dyaka, ya kutelama kuna na yinzo ya J. Lacy Penney, kuna dyaka na difelo.

<sup>98</sup> Mu—mu—mu vwandaka na boma mingi. Mu banzaka, “Mfumu, ya kieleka mu me kufwa ve, mpe Nge me bika munu kukuma na kisika yayi na manima ya nionso.”

<sup>99</sup> Mpe kuna bawu vwandaka, na kusalaka... kaka pene-pene mutindu yina, na vision yina mutindu, beno lendaka kaka kuwa yawu na makutu ya beno, beno zaba. Kaka kuzonza mpe kukwenda na ntwala, ya bantu, mpe bakento yina vwandaka basika kisadi ya escorc yina mpe vwandaka tambula kuna, mpe yina, “Ooh, ooh!” Ya vwandaka na meso ya ntinta ya vert, ya ngitukulu, mpe ya mawa.

<sup>100</sup> Mpe kento ya munu kwizaka. Mpe mu tubaka, “Bika kaka munu swi mwa minuti, cheri.” Mu tubaka, “Kana nge kipe ve, mu—mu—mu zola kwenda na yinzo.”

Mpe yandi tubaka, “Nge kele ya kubela?”

<sup>101</sup> Mu tubaka, “Ve, kwenda kaka na ntwala, cherie, kana nge zola kusumba bima.”

Yandi tubaka, “Ve, mu me manisana.”

<sup>102</sup> Mpe mu tubaka, “Bika mu baka nge na diboko.” Beno me mona? Mpe mu basikaka.

Yandi tubaka, “Wapi dyambu?”

Mu tubaka, “Meda, mu—mu—mu... Kima mosi salamaka kuna.”

<sup>103</sup> Mpe na yina mu vwandaka na yisi ya yawu, mu banzaka yayi, “Na wapi kilumbu beto ke na kuzinga? Yayi lenda vwanza Kubenda ya Tatu?” Ntangu yayi mu kele na mwa banoti awa.

<sup>104</sup> Yesu. Beto ke mona ti, Yesu, na ministere ya Yandi, na manima Yandi longaka na bantu... Ntangu yayi beto ke vwanza Masonuku ya kieleka na zulu ya yayi. Na manima Yesu manisaka ministere ya Yandi, mpe ba mangaka ministere ya Yandi na bantu. Ntangu yayi beno ke tanga na kati-kati ya banzila, beno sala dibanza ya beno mosi. Beno bambuka moyo na yina mu tubaka na beno na mbala ya ntete. Na manima Yandi longaka...

<sup>105</sup> Yandi kwizaka mutindu Mosi ya nsilulu samu na kilumbu yina. Beto nyonso zaba yawu. Masonuku me talisa Yesu Klisto mutindu Mesiya. Ya kieleka. Na mutindu ya kulunga, me siamisama na nzila ya Nzambi mpe Ndinga ya Yandi, ti Yandi vwanza Mesiya. Ya kele na ata kyuvu ve. Kana muntu mosi ke tula ntembe na yawu, kana beno sala yawu, na yina beno fwana kwisa na autel, ti, “Yandi vwanza ve Mesiya.” Yandi talisamaka pwelele mutindu Mesiya. Kasi na manima Yandi me talana pwelele... Nzambi talisaka Yandi.

<sup>106</sup> Mutindu Pierre tubaka na Kilumbu ya Pentecote, ntangu yayi tubaka na Sanhédrin kuna, na yiya... pene ya bilumbu yiya na ntwala. Yandi tubaka, “Yesu ya Nazareth, Muntu yina Nzambi me siamisa na kati-kati ya beno na nzila ya bidimbu mpe mambu ya ngitukulu, yina Nzambi salaka na nzila ya Yandi na kati-kati, yina beto nyonso kele bambangi. Beno me mona? Beno me baka, mpe na maboko ya bantu ya yimbi, mpe me koma na kulunsi Mwana ya ntinu ya Luzingu; yina Nzambi me zangula, mpe me basisa bima yayi yina beno ke mona.” Beno me mona? Klisto zingaka na zulu. Ya kieleka, ke zinga kaka bubu yayi.

<sup>107</sup> Ntangu yayi na manima Yesu me kwisa, me talisama Yandi mosi, Nzambi me kukitalisa Yandi, mpe Yandi pesaka profesu. Mpe na manima ya bilumbu ya profesu ya Yandi, ata ti Masonuku me talisama, bantu me manga Yandi. Ya kieleka. Mpe Yandi longaka kuna na manima bawu losaka Yandi awa, bayina kuzwaka bweso ya kuzwa mpulusu. Beno bambuka moyo, ntangu Yandi vwanza longa, ya vwanza na bweso samu na muntu nyonso na kuzwa mpulusu. Beto zaba ve nani bawu kele. Ba zabaka bawu na ntwala. Kasi Yandi ke longaka ntangu nyonso.

<sup>108</sup> Kasi na manima ya bilumbu ya malongi ya Yandi, ministere ya Yandi landilaka, samu kimvuka ya nsuka Yandi longaka vwanza mioyo yina vwanza na difelo, yina ba lendaka ve kulolula. Mu me tanga yawu pwelele na Biblia awa, na Pierre ya Zole. Beno me mona? Yandi kwendaka mpe longaka na myoyo

yina vwandaka na boloko, yina kele difelo, ya kukangama tii Kilumbu ya Lufundusu.

<sup>109</sup> Samu ti, beno me mona, Lufundusu kele ve ntangu yayi, mpe ya kele ve na difelo yina ke na kupela ntangu yayi. Muntu mosi ke tuba na beno, “Muntu yina kele na difelo yina ke na kupela ntangu yayi,” ya kele luvunu. Beno me mona? Zuzi ya ntoto yayi me lunga samu na kufundisa muntu ata fioti ve tii kuna yandi ke luta na lufundusu. Mpe Nzambi ke losa ata mbala mosi ve muntu na kati ya dibulu ya tiya tii ntete yandi ke fundisama na nzila ya misiku ya Nzambi Yandi mosi. Yandi mangaka kyadi, na yawu, beno me mona, yandi zolaka vwanda ntete na lufundusu, mpe lufundusu kele Kiti ya Nene ya Lufundusu ya Mpembe. Kasi ntangu yayi yandi kele na kisika ba ke bokilaka yinzo ya boloko.

<sup>110</sup> Mutindu mu monaka vision ya bisika nionso zole, mpe na lemvo ya Nzambi. . . Mu ke tuba yayi kele ve samu na kuvwenza, mpe, kana ya kele luvunu, Nzambi lemvokila munu. Mu banza ti mu me vwandaka na bisika zole, beno me mona, na bisika nionso zole. Mpe mu monaka bantu ya kuvulusa, bantu ya kusakumuka; mpe mu monaka bayina vwandaka ya kuzimbana, mpe kisika bawu vwandaka. Mpe ya kele samu na yina mu me telama mutindu mpangi ya beno ya bakala, bubu yayi, samu na kupesa beno malongi na kukima ntama na nzila yina. Beno kwenda ata fioti ve na nzila yina. Mpe beno me kuzwa bima nionso samu na kuzinga, nzila yina ya lusakumunu, kisika bantu ya kuvulusa kele na kyese mpe ngemba, mpe bawu lenda sumuka ve. Ba lenda ve—ba lenda lemvokila bawu ve. Ba lenda ve. Kuna, ya kele na kima mosi ve; ba kele ya kulunga. Mu me mona bisika nionso zole! Mu zaba ti ya kele nsamunu ya boma samu na muntu na kusala, kasi, Nzambi na kuvwandaka Zuzi ya munu, mu ke kwikila kieleka ti mu me mona bisika zole. Mu—mu ke kwikila yawu.

<sup>111</sup> Mpe, oh, ntama na kati ya muntu mosi kotaka na bizunga yina ya bantu ya kuzimbana! Kana ba ke kotisa beno basinga ya kisengo ya tiya na kati ya nzutu ya beno, ya me kwamisa beno na mutindu nyonso, ya ke vwanda ve mutindu lukwamusu ya dyabulu yina kele na kisika yina. Ya lenda vwanda ve na kima yina lenda. . . Dibanza ya muntu lenda ve, dibanza ya muntu lenda bakula ve yina bizunga yina ya kuzimbana kele. Ya kele ve na mutindu ya kutendula yawu. Mpe ya kele ve na mutindu ya kubangula yina bizunga ya kusakumuna kele, ya kele nene mingi. Ya kele ya boma mingi, mpe Yayi kele ya nkembo mingi—mingi, ya me katuka na nsoni na kitoko. Na yawu kana muntu kuwa munu. . .

<sup>112</sup> Mpe mu ke kuma kiboba ya bakala. Mu zaba ve bantangu yikwa mu ke vwanda. Mu ke vwanda na bamvula makumi tanu na tanu. Mpe mu—mu zaba ve, landila yinza, mu lenda vwanda na bamvula mingi ve. Mu zaba ve kisika bande yayi ke kwenda. Kasi bika ti muntu nionso kuwa, awa mpe na bande,

to konso kisika yina ya lendaka kwenda. Kukwenda ata fioti ve na bizunga yina ya bantu ya kuzimbana. Beno lendaka ve kutalisa wapi mutindu difelo kele mpasi. Mpe nyonso yina beno ke sala, beno zimbana ata mbala mosi ve . . . beno zimbana yayi, ti bizunga ya kusakumuna . . . Mu ke tuba yayi, na Santu Paul, “Yina disu me monaka ve, dikutu me kuwaka ve, to dyaka ya lenda kota na ntima ya muntu, yina Nzambi kele na yawu samu na bawu na kibumbulu bayina ke zolaka Yandi.” Na yina beno telama, kana beno ke na kuwa bande, beno kanga masini, mpe beno balula ntima kana beno me kuzwaka ve mpulusu, mpe beno sungama na Nzambi.

<sup>113</sup> Mu ke tuba yayi na nzila ya nzingulu ya ntete, mutindu mu ke kwikilaka na kati ya ntima ya munu. Mpe mu ke tuba, kana bayayi, kana ba-vision me vuna munu, Nzambi lemvokila munu na kusala nsamunu ya mutindu yina. Kasi na kieleka na kati ya ntima ya munu, na kuzabaka ti mosi ve ya ba-vision yina me kubwaka ntete ve, Mu ke kwikila ti mu me vwandaka na bisika nionso zole. Ntama na beto dibanza ya yawu ntama!

<sup>114</sup> Ntangu yayi, Yesu, na manima Yandi manisaka ministele ya Yandi, longaka na myoyo yina yina vwandaka me vuluka ve, bayina zolaka ve kuzwa mpulusu. Ntangu yayi Biblia ke tuba na beto yawu. “Yandi kwendaka mpe longaka na myoyo yina vwandaka na boloko, bayina balulaka ntima ve.” Ntangu ba pesaka kyadi na bawu, bawu mangaka kyadi, mpe ntangu yayi bawu ke na kulingilaka na Lufundusu. Oh, wapi ntangu ya zolaka vwanda! Oh, mu ke zola ti ya vwanda na mutindu mosi mu lendaka ningisa yinza na yawu, samu na kubika bawu kumona yina kele kieleka.

<sup>115</sup> Mpe Yesu tubaka, Yandi mosi, “Mutindu Tata fidisaka Munu, Munu mpe ke fidisa beno.” Mpe mutindu Tata fidisaka Yandi na kulonga na bantu ya moyo, na bayina vwandaka na kivuvu, mpe na manima beto talisa Nsangu mosi na bayina vwandaka ve na kivuvu, ya ke monana ya kulunga, na ntangu yayi, ti ya fwana salama, samu ti Mpeve ya Klisto na kuzingaka na kati ya beto ke sobaka ve nkadulu ya Yandi, to ke sobaka ve sysiteme ya Nzambi. Yandi fwana vwanda mutindu mosi na konso nsungi. Yandi fwana vwanda mutindu mosi. Yandi tubaka, “Mutindu Tata fidisaka Munu, Munu mpe ke fidisa beno.”

<sup>116</sup> Ba-ministere fwana vwanda mutindu mosi, na mutindu ti Yandi tubaka . . . Mu ke mona bayankaka na kati ya beno ke sonika Masonuku. Santu Jean 14:12, “Yandi yina ke kwikila na Munu, yandi mpe ke sala bisalu yina Mu ke sala.” Beno me mona, “bisalu,” na kulongaka na bantu ya kuzimbana, na kubelusaka bantu ya kubela, mpe kuna na lenda kuzwa mpulusu ve. Beno me mona? Kisalu me landila kaka mutindu mosi. Na yawu, yayi vwandaka, (yayi vwandaka?) ti mu tula yawu mutindu yayi, ministele ya Yesu Klisto kuvutuka dyaka na Dibuundu ya Yandi na kilumbu ya nsuka yayi. Ya kele yina mingi ya beto ke

kwikilaka. Mu ke kwikilaka na beno. Mu ke kwikila yayi. Kana mu ke kwikila yawu ve, mu ke sala kima yankaka samu na yawu. Samu ti, na manima ya nyonso, yayi kele munu yina kele bu- . . . yina kele na kati awa. Mpe kana Mpeve ya Nzambi kele na kati ya beno, beno ke kipe bantu.

<sup>117</sup> Ya vwandaka na Masonuku yina vwandaka yangisa munu ntangu nionso, wapi mutindu Moise lendaka tuba na Nzambi dibanza ya kulutila mbote na yina Nzambi vwandaka na yawu, tii mu monaka ti ya vwandaka Mpeve ya Klisto na kati ya Moise. Beno me mona?

<sup>118</sup> Nzambi tubaka, “Moise, kabuka nge mosi na bawu. Mu ke bebisa nyonso, mpe ke banda na nge.”

<sup>119</sup> Yandi tubaka, “Mfumu!” Yandi kukilosaka yandi mosi na kati-kati, yandi tubaka, “Katula munu. Katula nkumbu ya munu.” Na kati ya bantu yayi yina me tumama ve, ntima ya yandi me kwenda samu na bawu. Beno me mona?

<sup>120</sup> Mpe ntangu longi yina kele na bantu na ntima ya yandi. . . Wapi mutindu mu lendaka vwanda ya kunungisama na munu. . . na ntuala ya Nzambi, mpe na munu mosi, samu na kubumba kima mosi na bantu yina beno ke zolaka mingi kulutila beno ke zolaka beno mosi. Wapi mutindu muntu lendaka nata muntu na dibuundu na diboko ya yandi mosi, to kumwangisa mwa masa, to mwa mbotika ya luvunu, to kima mosi, mpe ti bawu lala na yisi ya kubendama ya luvunu mpe kuzaba ti Biblia kele ya kuvwanda kuna, mpe kutuba ti yandi zola muntu?

<sup>121</sup> Ata ti mu fwana lomba samu na luzingu ya munu, nyonso yina ya kele, bika mu vwanda ya kusungama na Nzambi mpe bantu, samu na kutuba na bawu Kieleka. Beno bika munu ata mbala mosi ve kuvwanda muntu ya luvunu. Wapi mutindu mu lenda vuna yina mu zola? Ata ti mu fwana kotalisa bawu mpasi, kasi mu zola bawu. Ya kele samu na yina beno ke bula fimbu na mwana ya beno, ya kele samu ti beno zola yandi. Ve samu ti beno ke zolaka yandi ve; samu ti beno zola yandi. Kana yandi kele na foti, yandi ke kufwa kana beno sungika yandi ve.

<sup>122</sup> Ntangu yayi, mutindu mosi ministere me vwanda. Mutindu ya vwandaka, mutindu mosi ya kele bubu yayi. Yawu me longama, mpe me siamisama na mutindu ya kulunga na nzila ya Ndinga ya Nzambi, ti ya lenda vwanda ve muntu, ya fwana vwanda Nzambi. Ya fwana vwanda. Beno tala, bidimbu mosi ya kimpeve yina Yesu salaka, me salama na zulu ya ntoto na bilumbu ya nsuka. Kidimbu mosi ya kimpeve yina Yandi kukitalisaka Yandi mosi mutindu Mesiya, me talisama na Yandi bubu yayi. Yandi kele kaka Mesiya! Bidimbu mosi yina ya kimuntu monikaka na zulu ya ntoto, yina monikaka na nzila ya Yandi, yina Yandi vwandaka. Dikunzi ya Tiya mosi yina Santu Paul monaka, Mosi, nyonso yina me salama na nkadulu mosi na yawu, na kusalaka kima mutindu mosi.



123 Yesu tubaka ti Yandi me sala kima mosi ve tii kuna Tata talisaka Yandi. Mpe Tata kele Mpeve-Santu, beto zaba yawu. Ya kele kaka kosalu ya Nzambi. Kana ya kele ve, na yina nani ya bawu kele Tata ya Yesu Klisto? Yesu tubaka ti Nzambi vwandaka Tata ya Yandi, mpe Biblia ke tuba ti Mpeve-Santu vwandaka Tata ya Yandi. Ntangu yayi, beno lenda ve kusala Yandi kuvwanda mwana ya makangu, na yawu Mpeve-Santu kele Nzambi, mutindu mosi Yesu Nzambi vwandaka. Na yawu, Nzambi, Tata, Mwana, mpe Mpeve-Santu kele... Ya kele... Yina kele binama tatu ya Nzambi mosi. Ya kele binama tatu, Nzambi mosi.

124 Beno kele kitini ya Nzambi, mpe mu kele kitini ya Nzambi, beno me mona; kasi mu kele ve nyonso ya Nzambi, mpe dyaka ti beno nyonso kele ya Nzambi. Beno me mona? Beno me mona? Ya kele binama ya Nzambi na zulu ya beto, mutindu bana ya babakala yina ba ndimaka na nzila ya Yesu Klisto. Na yina, Nzambi Yandi mosi kumaka nsuni, samu na kufwa samu na beto.

125 Ntangu yayi, Mpeve-Santu ke talisaka Yandi ntangu nionso bima yina ke kwisa, mpe Yandi vwandaka na yimbi ata fioti ve. Ya vwandaka ntangu nionso ya kulunga. Ya kieleka? Yandi bakaka ve lukumu samu na Yandi mosi. Yandi pesaka lukumu na Nzambi. Yandi tubaka, "Mwana lenda sala kima ve na Yandi mosi kasi yina Yandi ke mona Tata kusala yawu." Mpe Tata, Mpeve-Santu, vwandaka Tata ya Yandi. Ya kele kieleka? "Joseph, nge mwana ya David, kuvwanda na boma ve na kubaka Marie mutindu kento ya nge, samu ti kivumu yina kele na yandi kele ya Mpeve-Santu," yina vwandaka Tata ya Yandi. Mpe Mpeve-Santu talisaka bima ya Yesu yina ke kwisa, tubaka na Yandi bima yina vwandaka.

126 Mpe Yandi vwandaka Profete ya Nzambi. Samu, Ndinga ya Mfumu ke kwisaka kaka na profete; na kulakisaka ti Bandinga kwizaka, na mutindu ya fyoti, bapofete sonikaka yina Mfumu tubaka na bawu. Kasi Yandi sonikaka kima mosi ve, samu Yandi vwandaka Ndinga. Yandi vwandaka Ndinga.

127 Beno tala, Mpeve-Santu mosi yina zingaka na kati ya Yandi, "Dyaka ntangu fyoti, mpe yinza ke mona dyaka Munu ve; kasi beno ke mona Munu, samu Mu ke vwanda na beno, ata mpe na kati ya beno, tii na nsuka ya yinza. Mu ke kwiza na nge," Yandi tubaka. "Mu," vwandaka Tata yina vwandaka na kati ya Yandi, "yina ke kwiza na nge." Mpe Yandi tubaka, "Ntangu Mpeve-Santu ke kwisa na zulu ya beno, Yandi ke monisa bima yayi yina mu me longa beno, mpe ke lakisa beno bima yina ke kwiza." Beno bawu yayi ntangu yayi.

128 Ntangu yayi beto ke tala, ti mutindu Mpeve-Santu salaka na kati ya Dibuundu kuna, mutindu mosi Mpeve-Santu me sala kieleka bima mutindu mosi bubu yayi; ke samuna na nzila ya Dikunzi ya Tiya, kaka kieleka vwandaka na mbandukulu,

kima mutindu mosi. Mpe na kumonaka yayi kukwiza na zulu ya Yesu, Jean samunaka yawu na nzadi ya Jourdain. Mpe me lakisa nyonso, mpe mutindu science me lakisa yawu na bafoto. Ba lenda manga yawu ve. Ya vwandaka landila science. Ya vwandaka kima ya kieleka. Ya vwandaka ve dibanza ya disolo. Ya vwandaka ve psychologie. Mutindu George J. Lacy tubaka, “Disu ya mekaniki ya camera ke baka ve psychologie. Nsemo bulaka objectif.”

<sup>129</sup> Mpe wapi mutindu samu na beno, dibuundu, ti pene ya bangonda sambanu to nana me luta awa, mpe mu telamaka awa, mu tubaka, “Ya kele MUTINDU ME TUBA MFUMU, ti mu ke kwenda na Tucson, na Arizona. Ya ke vwanda na kupasuka, mpe Bawanzio sambwadi ke monana.” Beno ke bambuka moyo? [Dibuundu me tuba, “Amen.”—Mu.] Mpe ve. . . Nzambi salaka yawu ya kieleka tii magazine *Look* bakaka bafoto ya yawu. Kimpeve, yina ba monaka na ntwala, me kuma nzutu kaka mutindu mosi, Bawanzio sambwadi, yina basisaka kulungisama ya Masonuku nionso. Samu ti, mansweki nyonso ya Biblia ya muvimba kele na kati ya Bidimbu Sambwadi. Beto zaba ti Yina kele Buku, kidimbu ya Yawu, na Yawu yina me basika. Ya kele dinsweki ya Buku ya muvimba, yina vwandaka na kati ya Bidimbu Sambwadi yina, ti Mfumu bikaka beto kulonga.

<sup>130</sup> Mpe ya kele na bantu ya kuvwanda awa, bubu yayi, yina vwandaka kaka kuna na munu ntangu yawu kusalamaka. Magazine *Look* me talisa kima ya mutindu mosi, ti ya—ya kieleka ya salamaka. Samu, Ya vwandaka Nzambi yina tubaka yawu. Ya vwandaka Nzambi yina kele na manima ya Ndinga ya Yandi, samu na kulungisa Yawu ntangu Yandi tubaka ti Yandi ke sala yawu. Na yawu, ya kele ve muntu mosi, muntu ya nsuni mutindu munu mosi, yina kele na kati-kati ya beno bantu. Ya kele Nzambi ya Kukonda nsuka.

<sup>131</sup> Yandi ke sadilaka bantu. Ya kele kieleka. Yandi ke salaka kima ve na ngaanda ya yina Yandi ke salaka na nzila ya bantu. Beto me bakula yawu. Yandi, ya kele ya Yandi—ya kele lutumu ya Yandi. Ya kele yina Yandi soolaka. Mbote, mu zaba ve. Yandi lendaka, sala mwini samu na kulonga Nsangu ya mbote. Yandi lendaka sala mupepe samu na kulonga Nsangu ya mbote. Yandi lendaka sala mupepe samu na kusala bima, kasi Yandi soolaka bantu.

<sup>132</sup> Yina vwandaka dibanza ya Yandi, ti muntu ke tuba, na nzila ya muntu; yandi mosi ve, kasi, “Ndinga ya Mfumu ke kwizaka na baprofete,” bayina ke pesaka profesi, milongi. Mpe muntu yina ke pesaka profesi yina ke manga Ndinga ya kisina, wapi mutindu yandi lenda vwanda profete ya kieleka? Beno me mona? Yandi lenda vwanda ve, samu yandi ke manga Kieleka ya Ndinga. Mpe na yina kana ya me salama ve, na yina Ndinga yayi, Yawu mosi, mutindu ba me longi Yawu na nzila ya kukwikama ya Ndinga mpe na nzila ya kukwikama ya Mpeve-Santu, Yawu ke talisa

konso nsilulu yina Yawu silaka. Ya kele mutindu beto zaba kana ya kele kieleka to ve. Ya kele yina Yesu tubaka, “Kana Mu sala yawu ve yina kele ya kusonama na Munu na kusala, na yina beno kwikila Munu ve.” Beno me mona? Ntangu yayi beto ke mona bima yayi.

<sup>133</sup> Beno bambuka moyo, Bidimbu Sambwadi sukaka, mpe ntangu Kieleka sambwadi yina monisamaka . . .

<sup>134</sup> Mosi ya bawu, Yandi zolaka ve kupesa beto muswa ya kuzaba. Beto . . . Bantu yikwa vwandaka awa na Bidimbu Sambwadi, mpe kuwaka? Beno nyonso, mu banza. Beno me mona, Kidimbu ya Sambwadi, Yandi zolaka ve kupesa muswa na yawu.

<sup>135</sup> Yandi telamaka kaka kuna na kati ya kivinga mpe monikisaka mosi na mosi ya yawu. Mpe kana mu me longa kima mosi na luzingu ya munu, mu me twadisama na kimpeve, yawu vwandaka mutindu yina. Mpe yawu lendaka vwanda kieleka, samu na beno. Beno telama awa mpe beno tuba na beno ti ya ke salama, mpe beno kwenda kaka kuna, mpe na science mpe nionso yina, kusosa-sosa ya bantu ya science mpe nionso yina, mansweki samu na bantu, ya me talisa ti ya me salama kuna. Mpe mu vutukaka mpe beno kuwaka kumonisa yawu, kusiamisa kieleka ya konso Ndinga. Wapi kilumbu beto ke na kuzinga? Wapi kisika beto kele?

<sup>136</sup> Mpe beno bambuka moyo, na Kidimbu yina ya Sambanu, kisika, Bampungi Sambwadi nionso ke wakana na yisi ya Kidimbu yina ya Sambanu. Ntangu beto ke kuma na yawu, beno ke mona yawu. Konso (sambwadi) Mpungi me salama na Kidimbu yina ya Sambanu.

<sup>137</sup> Sambwadi kele ntangu nyonso dinsweki. Beno tala mbote yawu sambwadi, yina kele nsuka. Yina vwandaka Nkwizulu ya Mfumu. Mazulu vwandaka pima, swi, muntu mosi ve vwandaka ningana. Samu ti, Yesu tubaka Yandi mosi, “Ata Wanzio ya Mazulu zaba ntangu mu ke vutuka. Mu zaba mpe yawu ve, Munu mosi, na wapi ntangu. Tata me tula yawu na dibanza ya Yandi.” Nzambi kaka zaba yawu, Mpeve. Yandi tubaka, “Mu zabaka yawu ve.” Na yina, ya vwandaka ve ya kumonisama. Ntangu Mpungi ya Sambwadi yina wakanaka . . . to Wanzio ya Sambwadi, Kidimbu zibukaka, na yina ya vwandaka vwanda swi na kati ya Mazulu. Beno me mona, ba bikaka yawu ve, yina zolaka salama.

<sup>138</sup> Kasi na nsi ya Kidimbu ya Sambanu, kisika Bampungi yayi kuzibukaka, beno bambuka moyo, na nsi kuna, beto ke mona ti Mwana-dimeme basikaka, monikaka na kisalu. Yandi bikaka Kiti ya Kyadi. Kisalu ya Yandi ya mpulusu kumanisaka. Mpe Yandi kwizaka mpe bakaka Buku na diboko ya kibakala ya Yandi yina vwandaka na zulu ya Kiti ya kimfumu, mpe “ntangu vwandaka dyaka ve.” Mpe na mbala mosi wanzio mosi monikaka

na kapu ya sambwadi, to na kapu ya 10 mpe na nzila ya 7, na kutubaka. . . Wanzio yayi kulumukaka mpe zengaka ndefi, ti, “ntangu vwandaka dyaka ve.”

<sup>139</sup> Kasi, beno me mona, na kati ya Buku yayi vwandaka yina ba vulusaka. Ya vwandaka Buku ya Mpulusu. Mpe nyonso yina Yandi vulusaka vwandaka na kati ya Buku yina. Nyonso yina Yandi kufwaka vwandaka ya kusonama na kati ya Buku, mpe Yandi zolaka bika ve Kiti ya Yandi ya muvukisi tii Yandi zolaka vulusa na mutindu ya kulunga. Mpe Yandi lendaka vulusa yawu ve na kulunsi, samu ba zabaka bawu na ntwala na Buku ya Luzingu ya Mwana-dimeme, mpe Yandi zolaka vwanda na zulu ya Kuna samu na kulomba tii muntu yina ya nsuka zolaka manisa. Nkembo!

<sup>140</sup> Kasi kilumbu mosi Yandi vumbukaka Kuna, me basika. Wapi kisika vwandaka Buku? Ya vwandaka dyaka na na maboko ya Mfumu yina ba lendaka telemina ve, Nzambi ya Ngolo nyonso. Mpe Jean talaka na nziunga, mpe yandi dilaka, samu ti ya vwandaka ve na muntu ya kulunga na kutala na Buku mpe, mingi-mingi, beto zibula Bidimbu, samu na kutalisa yina vwandaka dinsweki ya kubumbama.

<sup>141</sup> Mansweki vwandaka na kati ya Bidimbu Sambwadi. Ntangu Bidimbu Sambwadi yayi kuzibukaka, yina zibulaka Biblia ya muvimba. Bidimbu Sambwadi; Ya vwandaka ya kukanga na Mansweki Sambwadi, mpe na kati ya Bidimbu Sambwadi yayi me simba dinsweki ya muvimba ya Yawu. Mpe ya vwandaka Buku ya Mpulusu, Ngwisani ya Malu-malu.

<sup>142</sup> Ya Ntama ve. Ya vwandaka samuna kaka Ngwisani ya Malu-malu. “Ba me sala yawu. . . ba lenda vwanda ve ya kulunga kukondwa beto,” Hébreux 11. Beno me mona? Beno me mona? Ntangu yayi, mpulusu ke kwizaka kaka ntangu Mukudi ke kufwaka. Mpe bawu vwandaka kieleka na nsi ya menga ya bana-mameme, Mukudi ve; me vulusa ntete ve, tii kuna Mukudi kwisaka.

<sup>143</sup> Beno tala ntangu yayi ntangu Mukudi yayi. . . Jean talaka na ziunga, mpe awa vwandaka Nzambi na zulu ya Kiti ya kimfumu, na Buku na diboko ya Yandi, yina vwandaka ya kukanga na Bidimbu Sambwadi, mpe dikani nyonso ya mpulusu vwandaka na kati ya Yawu.

<sup>144</sup> Mpe Yawu zimbanaka na nzila ya dikanda ya bantu, Adam. Mpe Nzambi. . . Ya vutukaka wapi kisika? Satana zolaka baka Yawu ve; yandi salaka kaka ti yandi zimbisa Yawu. Kasi wapi kisika Buku kwendaka kuna? Ya vwandaka ve na dikanda ya bantu. Masakumunu vwandaka ve awa; awa dikanda ya bantu me zimbisa Yawu. Na yawu Yawu vutukaka kaka na Mfumu ya Yawu ya ntete, yina vwandaka Nzambi.

<sup>145</sup> Awa Yandi kele ya kuvwanda na Yawu, mpe Yandi me bokila muntu mosi, muntu mosi, na kukwisa mpe lomba Yawu.

146 Jean talaka na ziunga, mpe ya vwandaka ve na muntu na Mazulu, muntu ve na zulu ya ntoto, muntu ve, Wanzio ve, kima mosi ve lendaka baka Buku to kubuka Bidimbu, to mpe kutala Yawu. Muntu ve vwandaka ya kulunga. Jean tubaka ti yandi dilaka na mawa.

147 Na yina Wanzio kwizaka na yandi, tubaka, “Kudila ve, Jean, samu ti Nkosi ya Dikanda ya Juda me nunga, mpe Yandi kele ya kulunga.”

148 Mpe Jean talaka samu na kumona mwana-dimeme . . . to kumona nkosi, mpe yinki yandi monaka? Mwana-dimeme, mpe ya vwandaka Mwana-dimeme ya Menga, Mwana-dimeme yina ba kufwaka. Bilumbu yikwa? Kubanda mbandukulu ya yinza.

149 Mwana-dimeme basikaka, tambulaka na Yandi yina vwandaka na Buku na diboko ya Yandi ya kibakala, mpe kuzwaka Buku; mataka na zulu ya Kiti ya kimfumu mpe vwandaka ya kuvwanda na yisi. Kaka yina. Ya sukaka (ntangu?) ntangu Bidimbu monisamaka. Ntangu yina ya nsuka, yina vwandaka nyonso yina Yandi vulusaka, ya vwandaka na kima ve . . .

Yandi kwizaka samu na kuvulusa.

150 Yandi tubaka, “Samu na yinki Yandi kuulaka bawu ve bamvula makumi yiya me luta? Bamvula mafunda zole me luta?”

151 Beno me mona, bankumbu ya bawu kele na Buku ya Luzingu, na kati ya Buku yango. Mpe Yandi zolaka telama awa, samu ti ya vwandaka lukanu ya Nzambi samu na kuvulusa bawu. Ba tulaka bankumbu ya bawu na Buku ya Luzingu ya Mwana-dimeme ntete mbandukulu ya yinza. Ba tulaka Mwana-dimeme kuna na yawu, samu na kufwa. Awa me kwiza Mwana-dimeme, ntangu ba kufwaka Yandi, me vutuka samu na kulomba.

152 Beno tala Yandi mbote! Ya ke vwanda na kumekula mingi, bima nyonso yankaka, kasi ya kieleka ya vwandaka na muntu yina zolaka kuzwa mpulusu, samu ti Yandi . . . Dibundu vwandaka yina ba soolaka na ntwala samu na kuvwanda kukondwa ditono to mifutu. Yandi ke vwanda kuna. Mpe Mwana-dimeme kufwaka samu na lukanu yina. Mpe na yina ntangu nkumbu ya nsuka na Buku yina vulukaka, Mwana-dimeme kwizaka mpe bakaka Buku, “Mu kele Yandi yina salaka yawu!”

153 Bawanzio, Ba-cherubin, Bakuluntu yiya mpe makumi zole, Bibulu, nyonso, na kukatulaka bayimpu ya kimfumu ya bawu mosi, kubwaka na ntwala ya Kiti ya kimfumu, mpe tubaka, “Nge kele ya kulunga!”

154 Jean tubaka, “Nyonso na Mazulu mpe na ntoto kuwaka munu kuboka, ‘Amen,’ na kubokaka, ‘Alleluia,’ mpe balukumu na Nzambi.” Kuboka mataka. Samu na yinki? Bankumbu ya

bawu vwandaka na kati ya Buku yango, kumonisama pwelele, mpe Mwana dimeme monisaka yawu.

<sup>155</sup> Mwana-dimeme vulusaka yawu, kasi Yandi lendaka ve kubasika tii kuna konso nkumbu ke monisama, mpe yina vwandaka salama na yisi ya Kidimbu ya Sambanu, na ntwala ya Sambwadi kuzibuka. Na yina muntu ya kukondwa ditono. . . Na yina Mwana-dimeme kwizaka samu na yina Yandi vulusaka. Yandi kwizaka samu na kulomba yina Yandi vulusaka. Yandi me kuzwa yawu yimeni, kaka awa na kati ya Buku, me baka Yawu na diboko ya Yandi. Ntangu yayi Yandi ke kwiza samu na kuzwa yina Yandi me vulusa. Yina kele kisalu ya Yandi. Yandi me sala. Yandi me kwiza kuzwa yawu. Oh, wapi—wapi ntangu! Me lakisa yawu, Kidimbu ya Sambwadi me siamisa yawu. Yandi vutukaka mpe bakaka Buku ya Mpulusu!

<sup>156</sup> Beno tala, ya zolaka vwanda Nsangu ya wanzio ya sambwadi yina zolaka monikisa ya sambwadi, Bidimbu Sambwadi. Apocalypse 10:7, ntangu yayi, beno ke tala yawu. Beno me mona?

<sup>157</sup> “Mpe yandi monaka Wanzio yayi kukulumuka, kutula dikulu ya Yandi na ntoto mpe na mubu,” yina vwandaka Klisto, “vwandaka na mukyama na zulu ya yintu ya Yandi.” Beno tala Yandi, beno ke tala Yandi na Apocalypse 1, dyaka, “na mukyama na zulu ya yintu ya Yandi; vwandaka tala na zulu mutindu jaspe mpe sardoine,” mpe nyonso yankaka. Awa Yandi me kwiza, me tula diboko mosi. . . “Dikulu mosi na zulu ya yinsi, mosi na zulu ya maza; me telemisa diboko ya Yandi. Yandi vwandaka na mukyama na zulu ya yintu ya Yandi,” dyaka. Ya kele ngwisani. Yandi vwandaka Wanzio ya Ngwisani, yina vwandaka Klisto; yina salaka mwa yisi kulutila Bawanzio, samu na kutala mpasi. Kuna Yandi ke kwiza, “Mpe tulaka maboko ya Yandi na Mazulu, mpe zengaka ndefi na Yandi ti ke zinga ntangu nyonso mpe ntangu nyonso,” Mosi ya Kukonda nsuka, Tata Nzambi, “ntangu yina ke vwanda diaka ve,” ntangu yayi ke salama. Ya me suka. Ya me suka. Ya me suka.

<sup>158</sup> Mpe kuna Masonuku ke tuba, “Mpe na—na Nsangu ya wanzio ya sambwadi ya ntoto,” munati-nsangu na zulu ya ntoto, Nsungi ya sambwadi mpe ya nsuka ya Dibuundu, “na mbandukulu ya ministere ya yandi,” ntangu yawu ke banda na ntoto, na ntangu yina, “dinsweki ya Nzambi, ya Bidimbu Sambwadi yayi, ke zabana na ntangu yina.” Ntangu yayi beto ke mona kisika beto kele. Ya lenda vwanda, bankundi, ya lenda vwanda? Beno tala, nyonso lenda salama.

<sup>159</sup> Bayina nyonso ba vulusaka na kati ya Buku, Yandi kwizaka samu na mpulusu. Nyonso yina zolaka kuvuluka vwandaka na kati ya Buku, ya kusoola na ntwala ya mbandukulu ya yinza. Yandi kwizaka samu na kuvulusa Yawu. Nyonso yina Yandi vulusaka vwandaka ya kusonika na kati kuna.

160 Mu zola kuyufula beno kyuvu ntangu yayi. Mpe beno bantu yina kele na bande, beno kuwa mbote. Meso ya bawu ya boma, yintu ya boma, ya lenda vwanda samu na yinki ti Nsangu yayi me telemina mingi bakento ya bilumbu yayi? Yayi lenda vwanda Nsangu ya wanzio ya nsuka yina? Yinki Yandi tubaka kuna na nzadi, pene ya bamvula makumi tatu na tatu me luta? “Mutindu ba fidisaka Jean,” beno me mona, “samu na kuzabisa nkwizulu ya ntete ya Klisto, Nsangu ya beno ke zabisa Nkwizulu ya zole.” Na yinza ya movimba, mpe yawu yina ya me sala, na yina Nkwizulu fwana kuma pene-pene. Beno tala yina ke salama ntangu yayi.

161 Samu na yinki? Mu me kalata yintu ya munu. Mu me sukula na kuse ya munu. Mu me tambula na ntoto. “Wapi dyambu na nge?”

162 Mwa bilumbu fioti me luta, mu yufulaka babakala zole mu vwandaka tambula na mpunda. Mu yufulaka Jack Moore kilumbu mosi. Mpe beno nionso zaba Mpangi Jack Moore. Mu ke kwenda na yandi na Shreveport. Mu tubaka, “Mpangi Jack, nge me vwanda pene-pene ya nkundi mosi mutindu mu vwandaka na yawu na zulu ya ntoto.” Mpe ntete mu yufula yandi, mu yufulaka kento ya munu.

163 Kana muntu zaba kima na zulu ya munu, yimbi ya munu mpe—mpe nyonso, kele kento ya munu, beno me mona, muntu ya luzolo. Mpe mu tubaka na yandi kilumbu mosi, mu tubaka, “Cherie, mutindu bakala ya nge, mu ke longi ya Nsangu ya mbote. Mu zola ve kunata nsoni na zulu ya Yandi yina mu zola. Ve. Mu zola kunyongisa beno ve. Mu ke nata ve nsoni na beno. Nzambi kukeba munu na kusala nionso yina ke niongisa beno. Mpe wapi mutindu kima ya kulutila yimbi yina lendaka sala Nzambi mpasi, wapi mutindu mu zola Yandi! Nge kele kento ya munu; Yandi kele Mvulusi ya munu mpe Nzambi ya munu. Mu zola kuyufula nge kiuvu mosi. Kubaka banzila yankaka ve. Tuba na munu kieleka.” Mu tubaka, “Mu me longuka mingi. . .”

164 Mpe mu vwanda kukiyufula. Mu kele, mu—mu kele na nkadulu ya ngitukulu, ya ngitukulu, ya kuyitukisa. Mu zaba yawu. Muntu nyonso tubaka, “Wapi mutindu ya muntu!” Mbote, beno me mona, beno lenda ve kusala beno mosi. Beno kele yina beno kele, na lemvo ya Nzambi.

165 Mpe mu—mu—mu tubaka, “Mu me zimbisa mabanza ya munu kaka mwa ntangu fyoti, beno zaba, mpe—mpe mutindu ya kulemba?” Mu tubaka, “Samu na yinki mu ke na kufundisa bakento yango, ntangu nyonso, ntangu mu zola bawu?”

166 Ba ke bokilaka, ba ke tubaka ti mu vwandaka “muntu yina ke yinaka bakento,” mu ke yinaka kaka ve. . . Mu ke yinaka kaka “bakento yina.” Beno me mona? Ya kele luvunu. Mu zola bakento, mu zola kutuba, mutindu bampangi ya munu ya bakento.

<sup>167</sup> Mu ke lutisa beno ve na manima, samu beno me sala yimbi. Mu lenda tuba na beno yawu. Mu zola beno mingi samu na yawu. Bantu yankaka yina ke sala yawu, ya kele mutindu yankaka ya zola. Beno me mona? Mu zola beno samu ti mu zola yina beno kele; beno kele kisadisi samu na mwana ya Nzambi, mpe beno kele kitini ya yandi. Beno me mona? Mpe mu—mu zola beno samu ti—ti ba salaka beno na kizizi ya muntu, mpe ba salaka muntu na kifwani ya Nzambi, na yina, kintwadi, beno kele mosi kati na Klisto. Ya kele samu na yina mu zola beno. Kima nyonso, kima yankaka, kele kima ve na yawu. Nzambi zaba yawu, luzingu ya munu nyonso. Beno me mona? Ya kele kieleka. Mu zola beno. Samu na yinki mu lendaka telama mpe ntangu nionso. . .

<sup>168</sup> Ntangu ba ke tuba, “Tuba na bakento nionso, na yina, kana bawu ke kwiza kuwa Mpangi Branham kulonga, ke telemina nsuki ya bawu ya kuswaswana. Bawu lwata yimpu to kima mosi to yankaka, samu ti yandi ke banda na kuboka ngolo samu na bansuki ya nkufi, mpe ya beno. . . Beno pakula ve maquillage,” mpe nionso yina mutindu yina. Yawu yina bawu salaka. “Nionso yina yandi tubilaka!”

<sup>169</sup> Muntu mosi tubaka, “Samu na yinki nge lenda ve. . .” Yandi tubaka, “Bantu ke kwikila ti nge kele profete. Samu na yinki nge ke longa ve bakento mutindu ya kuzwa makabu ya nene ya kimpeve, mpe bima mutindu yina, na kisika ya kumeka na kulonga bawu kima ya mutindu yina?”

<sup>170</sup> Mu tubaka, “Kana bawu zola ve kulongoka ABC ya bawu, wapi mutindu bawu ke zaba bantalu?” Beno me mona? Beno sungama, ntete.

<sup>171</sup> Mpe mu ke longaka mingi, ya ke kuma yimbi mingi. Na yina beno ke tuba, “Samu na yinki beno lenda bika ve?” Ve, tata. Ya fwana vwanda na ndinga, mhangi na zulu ya yawu.

<sup>172</sup> Mosi ya muntu ya kulutila nene na ministere bubu yayi, tetikaka maboko ya yandi na zulu ya munu ntama mingi ve, yandi tubaka, “Mu ke sambila samu na nge, Mpangi Branham, kana nge ke bika munu kusala yawu, ti Nzambi ke basisa yawu na ntima ya nge.” Yandi tubaka, “Bika bakento yina swi, na bima yina.”

<sup>173</sup> Mu tubaka, mu tubaka, “Nge ke kwikilaka na yawu, tata? Nge kele mulongi ya busantu.”

<sup>174</sup> Yandi tubaka, “Ya kieleka. Mu ke kwikilaka yawu ve, kasi,” yandi tubaka, “yina me—yina me tala. . .”

Mu tubaka, “Ve.”

Yandi tubaka, “Yina me tala ba pasteur.”

Mu tubaka, “Ba ke na kusala yawu ve.”

<sup>175</sup> Muntu mosi fwana sala yawu. Nzadi fwana luta. Mpusu fwana vwanda ya kubeba. Mu zola ve kusala yawu. Nzambi zaba ti mu zola ve kusala yawu. Mingi na kati ya bawu bakento



ke pesaka madia na bana ya munu, mpe bawu ke pesa luzingu ya bawu samu na munu, kaka. Beno ke banza, mpe lemvo ya Nzambi me mwangana na bisika ya Mpeve-Santu, beno ke banza ti mu lendaka telama swi mpe kumona muntu ya mawa yayi kukwenda na Seko kukondwa kivuvu, kana mu me boka ngolo ve samu na yawu?

<sup>176</sup> Ve samu na kuvwanda muntu ya mayele mingi; kasi mpeve ya yinsi yayi, mpeve ya dibuundu, ve Mpeve ya Klisto, ntangu yayi; mpeve ya dibuundu, denomination, me losa bakento yayi na ngaanda na kati ya mvindu yina kuna. Mpe mu kele kaka ndinga, ke boka, “Basika na yawu. Kwenda ntama na mvindu yina.” Beno bika ve diabulu kusala kima ya mutindu yina na beno. Ya kele yimbi!

<sup>177</sup> Mpe beno ba-Assemblée ya Nzambi, yina ke bika bakento yina, ke bika bakento yina kuzenga bansuki ya bawu, kasi ke yimina bawu na kusala maquillage. Ya kieleka ya ke na Masonuku ve samu na maquillage, kasi ya ke na kunwanisa kuzenga bansuki ya beno. Yandi kele mpe ve ya kulunga na kusambila na ntwala ya Nzambi, Biblia ke tuba. Bakala ya yandi kele na muswa ya kupesa yandi kufwa makwela mpe kubika yandi. Kieleka. Yandi ke kukitalisa yandi mosi na yinza mutindu kento ya kuvedila ve. Biblia me tuba mutindu yina. Yandi ke kondwa buzitu na bakala ya yandi mosi ntangu yandi ke sala yawu. Ya kele kieleka yina Biblia ke tuba. Beno me mona?

<sup>178</sup> Mbote, kasi kento yina me kutula maquillage, beto ke mona kento mosi me sala yawu na kati ya Biblia, kaka mosi. Ya vwandaka Jézabel. Ya kele yina ya vwandaka. Muntu mosi kaka na kati ya Biblia yina me tulaka maquillage, vwandaka Jézabel, mpe Nzambi pesaka yandi madia kaka mbala mosi na—na bayimbwa ya mfinda. Yandi me kuma nsoni, mpe mpe yandi . . . Nyonso, kima nyonso yina zola kutuba kele ya kubokila Jézabel.

<sup>179</sup> Beno lenda sala mutindu yina ve. Beno lenda sala yawu ve. Na yawu yinki ke sala ti beno sala yawu? Mpeve ya diabulu.

<sup>180</sup> Beno ke na kubakula yawu ve. Mu zaba ti beno ke na kubakula yawu ve. Beno kele—beno kele bantu ya mbote mingi. Beno kele mbote. Beno pesa munu diboko, zonga na munu.

<sup>181</sup> Mpe mu zola beno. Ya kele kieleka. Kasi kana mu mona yawu, mu ke vwanda muntu ya luvunu ve. . . Paul tubaka, “Mu me tina ve na kutuba na beno Ndongosolo nyonso ya Nzambi.” Bika ti menga ya kento kuvwanda na zulu ya munu na Kilumbu yina, to muntu ve. Mu me tuba na beno Kieleka. Mpe mu ke yinaka na kusala yawu; mu ke yinaka ve samu ti mu zola ve kusala yina Nzambi ke tubaka na munu, kasi mu zola beno. Mu zola kunyongisa beno ve, na yawu yinki mu ke sala? Kasi kuvedila, Zola ya Kinzambi ke nata beno na kusala yawu.

182 Yesu ata mpe sambilaka samu na kutina kulunsi. “Ya lenda salama ti mbungu fwana salama?” Yandi tubaka, “Kasi, luzolo ya Munu ve, ya Nge.”

183 Mu fwana vwanda muntu yina ke tubaka yayi? Mu ke baka bakento yayi ya ntalu yina kele mbote mingi mpe nionso yina, mpe ke panza bawu kaka bitini-bitini? Mu fwana sala yawu? Mu fwana baka bampangi ya munu ya balongi, mpe bawu ke telama kuna mpe ke tuba na bawu ti bawu zola mbongo mpe denomination kele mbote mingi kulutila na yina bawu zola Nzambi? Munu, na bampangi ya munu ya ntalu yina me tula diboko ya bawu. . . Oh, mu fwana sala yawu? O Nzambi, kubika munu ve kusala yawu.

184 Kasi mu me tina ve na kutuba na beno Ndongosolo nyonso. Ya kele Zola ya kieleka yina me nata munu na yawu.

185 Ya kele samu na yinki Nsangu yayi me vwanda mutindu yayi? Kisika yankaka ve na yinza kele yawu. Wapi kisika ya kele? Mbote mingi. Bawu kele na boma. Beno me mona? Kasi ya vwandaka na boma ve. Ya kieleka. Nzambi ke vwandaka kaka mutindu yina, beno me mona. Mbote mingi. Yayi kele samu na yinki bakento me vwanda ya kusemba mingi na Nsangu yayi? Na kuzabaka ve, ya vwandaka ve ya kumonisama. Ya vwandaka lakisa munu, kasi ya kwizaka ve na munu tii kaka kilumbu yankaka yina. Beno me mona? Beno tala kuna. Mbote mingi. Ya kieleka ya ke lungisa ministere.

186 Ntangu yayi beno vingila fioti. Ya me vwandaka ntete na ntangu yina ya me kuma yinza ya kento? Yinga. Landila disolo, na bilumbu ya Elie, ya vwandaka na kento mosi na nkumbu ya Jézabel. Mpe yandi me yala na zulu ya dibuundu ya Nzambi, yina Biblia ke tuba ti yandi ke vwanda dyaka na bilumbu ya nsuka; mpeve ya yandi, na nzila ya dibuundu, organisation. Mpe yandi ke vwanda kento ya kindumba, mpe mabuundu nyonso yankaka na yandi ke vwanda bandumba, kaka mutindu yandi kele. Ya kele kieleka?

187 Apocalypse 17, me tuba, “Yandi kele kento ya kindumba, mpe yandi kele MAMA YA BAKENTO YA KINDUMBA.” Yina lenda vwanda ve babakala. Ya kele bakento. Beno me mona? Mpe bawu nyonso ba losaka bawu, ya moyo, na kati ya Dizanga ya Tiya, mpe bawu yokamaka. Ya kele kieleka? Beno bawu yayi.

188 Beno tala, ntangu Jézabel yina kotaka na kusalu, ya vwandaka na muntu telamaka na ntwala ya yawu. Nzambi me nata muntu. Beto zaba mpe ve kisika yandi me katuka. Yandi vwandaka ve na lufulu ya ministele. Yandi vwandaka ata mbala mosi ve nganga-Nzambi to kima mosi ve. Yandi basikaka, muntu ya mfinda ya ngolo na nkumbu ya Elie, mpe yandi tulaka disoka na nsimbulu ya yinti, mpe ba yinaka yandi. Yina kaka ve, kasi dibuundu ya yandi ya muvimba yinaka yandi.

189 Mpe kilumbu mosi yandi banzaka ti yandi vwandaka ya kutelama yandi mosi. Yandi tubaka, “Ve, mu kele dyaka na mafunda sambwadi ya kele kieleka na nge.” Beno me mona? Yina vwandaka nkonga yina ya bantu yina ba soolaka, beno me mona. Ya kele ntangu nyonso na nkonga yina. Yandi tubaka, “Kubanga ve, Elie. Mu zaba ti beno ke banza ti beno ke basika na nzila, samu ti ba-denomination me nata beno na zulu ya mongo. Kasi,” yandi tubaka, “Mu kele na mafunda sambwadi yina ke kwikilaka kima mutindu mosi beno ke longaka. Beno me mona, mu kele na yawu.”

190 Na yina na manima ya kilumbu ya yandi, Rome bakaka luyalu, mpe ya kumaka ntangu yina ya vwandaka diaka yinza ya kento, mode nyonso ya—ya bakento, mutindu bawu basikaka na bayimpu ya bawu mpe nyonso, beno me mona. Mpe Nzambi telemisaka yankaka na Mpeve mosi na zulu ya yandi, Mpeve ya Élisée. Ya kele kieleka? Mpe yandi tubaka, “Disoka me vwanda na nsimbulu ya yinti.”

191 Mpe ya vwandaka na mwa kento mosi ya kiboba yina vwanda salaka kuna, yina kwelaka yandi. . . bikaka bakala ya yandi, kwelaka mpangi ya yandi ya bakala, Hérode. Hérodias, mpe yandi vwandaka me pakula mutindu clown ya kilumbu yina, yandi vwandaka kina. Yandi longaka na mwana ya yandi ya kento wapi mutindu kukina. Yandi vwandaka na mwana ya kento, na nzila ya tata ya yandi ya lundi, tata ya lundi; na nzila ya tata, mpangi ya yandi ya bakala. Hérode! Yina vwandaka mwana ya kento ya—ya—ya kento yango. Mpe kuna yandi longaka yandi na kubina, mpe yandi kumaka muntu ya pité ya kieleka, na manima ya mama ya yandi. Mpe yandi banzaka ti yandi lendaka kwela bambala yiya to tanu, kusala nyonso yina yandi zolaka.

192 Mpe awa kwizaka Hérode. Bawu nyonso vwandaka ba-Juif, ntangu yayi beno bambuka moyo. Bawu vwandaka bantu ya dibuundu. Awa me basika Hérode, mpe dibuundu ya yandi, samu na kuwa profete yayi, bantu kwikilaka yandi vwandaka profete.

193 Yandi kwendaka mbala mosi na ntwala ya bawu zole, mpe tubaka, “Ya kele ve ya kulunga samu na nge na kubaka yandi.” Mpe yina salaka ti yandi kudasuka! Beno me mona?

194 Ntangu yayi, muntu mosi ya mutindu nyonso lendaka tuba, “Wapi faso, Hérode? Beto kele kieleka na kyese na kuzwa nge na kati ya dibuundu ya beto bubu yayi.” Kasi Jean ve.

195 Yesu tubaka, “Nani beno kwendaka mona, ntangu beno basikaka samu na kumona Jean? Beno kwendaka mona mosi yina kele nyonso ya kulwata mutindu nganga-Nzambi? Ve, yina lenda, mutindu ya bézé yina mpe ke zika bantu ya kufwa.” Beno me mona? Yandi tubaka, “Yinki beno kwendaka mona? Mupepe, madiadia yina ba ke ningisa na mupepe? Bawu ke tuba, ‘Kwiza awa, Jean. Beto ke futa nge mingi kana nge longa beto. Mpe,

beto, beto kele organisation ya kulutila nene?” Jean ve. Ve, yandi kwendaka mona yawu ata fioti ve.

<sup>196</sup> Yandi tubaka, “Na yina, yinki nge kwendaka kuwa mpe kumona Jean, profete?” Yandi tubaka, “Mpe mu ke tuba, na beno, kulutila profete! . . .beno lenda kuzwa yawu, yayi kele yandi yina profete zonzilaka vwandaka kwiza, ‘Mu ke fidisa munati-nsangu ya Munu na ntwala ya kizizi ya Munu, mpe yandi ke yidika nzila samu na Mfumu.’” Yandi vwandaka munati-nsangu ya Ngwisani. Yandi tubaka, “Ya vwandaka ve na muntu, yina me butuka na kento, mutindu yandi kele nene.” Beno me mona?

<sup>197</sup> Ya kele mutindu ya muntu yina Nzambi vumbulaka samu na kilumbu yina, Elie, muntu ya mfinda. Jean, kima mutindu mosi. Beno me mona? Mpeve ya Élie vwandaka na zulu ya Jean. Mpe Yandi tubaka, ntangu ya ke kuma diaka kilumbu ya kento, Mpeve yina ke vumbuka diaka, “Na ntwala ya Nkwizulu ya Mfumu, ntangu ntoto ke yokama na tiya, mpe bantu ya mbote ke tambula na zulu ya bombi ya bantu ya yimbi, mutindu bombi na yisi ya makulu ya bawu.” Yandi silaka yawu, diaka, na bilumbu yayi. Beno tala, Mpeve-Santu silaka yawu. Ya kele ya kufwanakana na ntangu yina beto ke na kuzinga.

<sup>198</sup> Ya fwana vwanda na muntu ke telama. Yina fwana kwiza, samu ti ya kele MUTINDU ME TUBA MFUMU, Malachie kapu ya 4. Ya kieleka yawu yina Yandi tubaka ke vwanda kidimbu, “Kaka ntete nkwizulu ya Kilumbu ya nene mpe ya mpasi ya Mfumu, Mu ke fidisa nge Élie.” Mpe yinki yandi ke sala? “Kuvutula bantima ya bana na Malongi ya batata, na kuvutula na Biblia,” na ngaanda ya luswaswanu ya denomination yayi, “mpe kuvutuka na Biblia, na Nzambi.” Ya kele yina yandi ke sala. Beno tala wapi ntangu ya nene beto ke na kuzinga.

<sup>199</sup> Baprofete yina vwandaka semba bakento ya bilumbu yayi ya bilumbu ya bawu, mpe bawu zole vwandaka futa samu na yawu na luzingu ya bawu. Disolo ke monisa ti mosi na mosi ya bantangu yina vwandaka yinza ya kento, ntangu bakento vwandaka twadisama.

<sup>200</sup> Beno tala bubu yayi. Beto ke kuzwa mosi, Mfumu ya yinsi, mosi ya bilumbu yayi, beno tala mutindu ya lendaka salama na ntangu yayi. Ntangu yayi, yandi kele Président. Beno me mona? Yandi kele kaka kimonikisi. Awa ntama mingi ve, na mosi ya bayinsi yankaka, yandi vwandaka na lukumu mingi mpe nionso yina na kati ya bantu nionso, tii Mfumu ya yinsi, yandi mosi, tubaka, “Mu kele bakala ya yandi.” Ntwadisi ya yinsi ya Etats-Unis, beno me mona. Yandi ke twadisa bamvwatu, bakento ke landa yawu, beno me mona, kaka mutindu Jézabel salaka. Beno kuwaka dilongi ya munu na zulu ya *Nsambulu ya Jezabel*. Beno zaba. Beno zaba yawu. Beno me mona kisika beto kele ntangu yayi?

<sup>201</sup> Beno me mona yina salamaka awa, sabala mosi to zole me luta, awa na kati ya mbanza? Mulongi ya Luther kubokilaka nganga-Nzambi ya Katolika ya Ntima ya Santu na kukwiza mpe kulonga samu na yandi, mpe yandi salaka yawu, mpe mulongi ya Lukwikilu ya Luther kwendaka na nganga-Nzambi ya Katolika mpe longaka yandi.

<sup>202</sup> Lukutakanu ya Mabuundu kuna ntangu yayi, yina kele lukutakanu na Rome. Mukanda yayi ke zietaka yina nkundi ya munu ya mbote, David duPlessis; ntangu mu telemaka kuna mpe bokaka na yandi samu na yawu, na Fourteen-Mile Creek, ntama mingi ve; na kuzabaka ve ti yandi me losa dibuundu mbala mosi na Babylone, ntangu muntu nyonso ke tuba, “Oh, mabuundu nyonso ke vwanda mosi ntangu yayi.” Yinga, mu zaba yawu, beno me mona, kaka kieleka yina kele ya kusonika na buku ya munu ya profesi na mvula 1933, ti ya ke salama. Samu na yinki, beno ke na kubakula ve ti ya kele Satana yina ke na kuvukanaka kintwadi? Biblia ke tuba yawu. Mpe kaka na manima ya mwa ntangu fyoti, kaka mwa ntangu fyoti, na yina bawu ke kuma mosi, na yina ya ke vwanda nsuka samu na mabuundu yina ke yambaka bantu nionso, beno me mona. Ya ke vwanda na kidimbu ya beno ya kibulu, ya kieleka. Beno me mona?

<sup>203</sup> Kaka mu kele ve na ntangu ya kukwenda na zulu ya yayi, kasi, ya me bikana kaka minuti kumi na tanu na kukuma na ngunga ya kumi na zole. Beno me mona, mu zola kusukisa na yayi, kuzonzila dibanza yayi. Mu ke na kutulaka kaka Masonuku yayi na kati awa kisika beno lenda mona lenda ya kisika beto kele, mpe na manima beto ke sukisa kaka na mwa ntangu fioti.

<sup>204</sup> Ntangu yayi beno tala kaka yina salamaka. Baprofete vwandaka semba bakento yina na bilumbu yina mpe ba vwandaka bokila bawu “bayina ke yinaka bakento.” Ya kele kieleka. Disolo ke lakisa ti ya vwandaka mutindu yina.

<sup>205</sup> Ntangu yayi beno vingila kaka fyoti. Beno ke na kusonikaka Masonuku, beno fwana sonika na yisi ya Ntete ya Timothée 5:6. Biblia me tuba, “Kento yina ke zingaka na—na biese ya yinza.” Ya lenda vwanda ve biese ya Nzambi; na yina ya fwana vwanda mutindu yina, beno me mona. “Kento yina ke zingaka na kyese ya yinza kele ya kufwa na yina yandi ke na kuzingaka.” Yawu yina profete tubaka, Santu Paul, “Kento yina ke zingaka na mutindu yayi ya yinza kele ya kufwa na yina yandi ke na kuzinga.” Mpe kana yandi manga kyadi, yandi lenda zabuka ndilu yina ke kabula kisika ya kele dyaka ve na kisika samu na yandi. Mpe na yina wapi kisika yandi kele, na meso ya yandi ya kupakula, bansuki ya yandi ya kuzenga? Mpe yandi kele na lweka yankaka ya nzila, na mutindu ya kuvutuka na manima ve, mpe ya fwana vwanda na ministele yina ke longama na yandi. Kasi beno bambuka moyo, na ntangu yina, ya me manisa. Ya me salama. Ya kele kutala kaka.

206 Ya ke vwanda na ministele yina ke lakisa mambu ya nene, Joël tubaka yawu, kasi ya ke vwanda ve na ntangu samu na mpulusu. Ya me manisa. Mwana-dimeme me baka Buku ya Yandi, mpe bantu ya Yandi ya kuvulusa me suka. Mutindu Yesu longaka ntete mpe ba mangaka Yandi, mpe na manima kwendaka mpe kutala bayina vwandaka kuna, longaka na bawu yina vwandaka na boloko, lendaka ve kubalula ntima, ata ntangu samu na mpulusu, ministere ya mutindu mosi ke vutuka diaka. Yinki kana ya lendaka vwanda Kubenda ya Tatu? na kuzimbana ya Seko. Yinki kana ya kele kuna? Mu banza ti ya kele ve. Yinki kana ya kele? Beno banza na yawu kaka minuti mosi ntangu yayi. Yinki kana ya kele? Nzambi kukeba beto. Mu kele na bana. Beno me mona? Kasi ya kieleka ya ke talana mbote awa.

207 Samu na yinki vision yango kwizaka ntangu mu vwandaka mwana ya fyoti? Samu na yinki mu me banzaka yawu ntete ve? Samu na yinki transe yango kwizaka kuna na kivinga kilumbu yankaka yina, yandi tubaka, “Yawu yayi”? Ya kele kaka na kati-kati ya . . . myoyo ya kuzimbana. Mpe Yesu longaka bawu, pesaka kimbangi, kasi bawu—bawu balulaka ntima ata fioti ve. Mpe kulutila mingi mu ke longi, ya kulutila yimbi bawu ke kuzwa. Ya kele na ata kubalula ntima ve. Ata kisika samu na yawu.

208 Mwana-dimeme bakaka Buku ya Yandi ntangu, Kidimbu ya Sambwadi vwandaka kaka ya kukubama samu na yawu na kuzibula, Kidimbu ya Sambanu. Beno bambuka moyo, Yandi bambuka Kidimbu ya Sambwadi na beto. Yandi zolaka sala yawu ve. Ntangu Wanzio telamaka, kilumbu na manima ya kilumbu, na kutubaka yawu, kasi kuna Yandi zolaka sala yawu ve na yandi yina. Yandi tubaka, “Ya kumaka swi na Mazulu.” Muntu ve zabaka. Ya vwandaka Nkwizulu ya Mfumu.

“Oh,” beno ke tuba, “ya lenda vwanda ve.” Mu banza ti ya kele ve.

209 Beto kwenda kaka mwa ntama awa. Mu kele na kima ya kusonika, beno me mona. Mbote mingi.

210 Beno bambuka moyo, “Kento yina ke zinga na kati ya kyese ya yinza,” na bima ya yinza, na kusalaka mutindu yawu. Yandi lendaka kwenda na dibuundu mpe kusala mutindu santu, yina kele ve na kima ya kusala na yawu, beno me mona, kasi, “yandi me kufwa na yina yandi ke na kuzinga.”

211 Beno tala yina ba-denomination me sala samu na yandi. Bawu me telemisa diboko ya Ndinga ya Santu, yina me swaswana na Biblia. Ba salaka yandi mulongi. Ba me pekisa yawu na Masonuku. Mpe ke sala yandi kuma ntangu yayi mfumu ya mbanza, muyadi ya mbanza, muyadi ya kizunga nyonso, mpe mulongi na yinzo ya Nzambi.

212 Na yina, yandi kele ya kubwa na disumu nyonso yina salamaka ntete, yandi kele dyambu ya yawu. Kieleka. Ntangu yayi, mu kele ve, mu ke na kuzonzila ve bamuswa. Yandi kele ya

kubwa. Yandi kele yina salaka ti bébé nionso kubutuka mpofo. Yandi kele yina salaka ti ntoni nionso kutimuka. Yandi kele yandi yina nataka disumu, kimbevo, mawa. Ambulance lenda ve kubula kana kento salaka yawu ve. Ata kufwa muntu lenda salama ve, ata disumu ve, ata lufwa ve, ata mpasi ve, kasi kento me sala yawu. Mpe Nzambi pekisaka yandi na kukwenda na chaire samu na kulonga, kasi dyaka bawu ke salaka yawu. Denomination, beno me mona kisika ya kele?

<sup>213</sup> Yandi kele nzambi ya kento. Mutindu dyabulu kele na kisalu! Mbote, bantu ya Katolika ke salaka bawu, bakento, banzambi, beno sambila samu na bawu; ya kele kieleka, nzambi ya kento Marie, mpe nyonso yankaka yina. Mu ke mona kisika na Conseil Oecuménique ba tubaka ti ya ke salama ti bawu ke sambila mwa fyoti mingi na Yesu kana ya ke sadisa ba-Protestant na kukota. Beno me mona? Beno me mona? Oh, ya kele nkisi ya kufika na sukadi! “Ya ke sobaka ve,” ba tubaka. Beno me mona? Ya kele kaka diabulu yina ya ntama. Biblia ke tuba, “Mpe yandi salaka bawu nyonso kuzwa kidimbu na mbunzu ya bawu, bayina vwandaka ve na bankumbu ya bawu ya kusonama na Buku ya Luzingu ya Mwana-dimeme.”

<sup>214</sup> Ya kele Dibundu yina ba soolaka ntete mu ke na kuzonzila, ve bayina kele kuna. Ve, tata. Na kati ya konso kimvuka, Yandi me benda yina Yandi soolaka na ntwala. Yawu yina Yandi ke kwisa baka, na konso nsungi.

<sup>215</sup> Kasi yandi me telama kuna. Yandi yayi. Ya kele yandi; beno longa Ndinga, beno sadila Ndinga, beno kuma nzambi ya kento, mpe dyambu ya disumu nyonso. Biblia ke tuba, “Mu me pesa ve muswa na kento na kulonga, to na kubaka lutumu, kasi kuvwanda ya kutumama mutindu mpe me tuba musiku.” Beno me mona? Mpe yandi lenda sala yawu ve. Kasi ba ke pesa yandi mfumu ya yinsi, muyadi ya mbanza, ya muyadi; ntama mingi ve yandi ke vwanda Mfumu ya yinsi. Kieleka. Beno bawu yayi. Ya kele mutindu, ya kele mutindu ya ke kwendaka, beno me mona. Mpe bantu ke salaka yawu samu ti bawu ke kipe ve Ndinga yayi. Ata mbala mosi ve ti bawu ke mona yawu.

<sup>216</sup> Beno tala ba-Juif yango ya kutelama kuna, bantu ya mayela mingi, bantu ya mbote. Mpe Yesu tubaka, “Beno kele ya tata ya beno, dyabulu.”

<sup>217</sup> Yinki kana mu nataka Yandi na kumekama kaka ntangu yayi na ntwala ya beno? Beto meka yawu kaka muniti mosi, mpe Nzambi lemvo kila munu samu mu me telemina Yandi; kasi kaka muniti mosi, samu na kutalisa beno kima mosi.

<sup>218</sup> Yinki ke salama kana beno tuba, “Mbote, munu, nkembo na Nzambi, mu tubaka na bandinga ya malu-malu! Alleluia! Mu zaba. Mu, yinga, mu—mu me kuzwa Yawu. Lusakumunu na Nzambi. Yinga!” Uh-huh, beno me kuzwa yawu?

219 Beno bambuka moyo na bantu ya Israël. Biblia me tuba, na manima Yandi bokilaka bantu na kubasika, mpe vulusaka bawu na Egypte, Yandi bebisaka bawu samu ti bawu landaka ve Nsangu. Beno me mona? Bawu kudyaka mana ya Mazulu. Bawu kudiaka mana yina Nzambi nokisaka na zulu ya ntoto samu bawu kudia, mpe telemaka na ntwala ya munati nsangu, mpe monaka Dikunzi ya Tiya, mpe kuwaka Ndinga ya Nzambi, mpe monaka yawu kusiamisama. Mpe kuna, samu ti bawu zolaka kukwikila Koré, “Ya lenda vwanda na bantu mingi ya santu. Ya lenda vwanda *yayi, yina, to yankaka*. Beto fwana vwanda ya santu, mpe. Beto fwana sala nionso *yayi*. Bantu nionso kele ya santu.”

Nzambi tubaka, “Kabwana nge mosi na bawu. Kwenda ntama kuna.”

220 Moise tubaka, “Nionso kele na lweka ya Mfumu, kwisa na munu.” Ya kieleka. Beno me mona? Mpe Yandi zibulaka kaka ntoto mpe minaka bawu. Beno me mona?

221 Bawu vwandaka bantu ya mbote, mpe. Kieleka, bawu vwandaka. Bawu vwandaka bantu ya mbote. Yinga, tata, kasi yina salaka yawu ve. “Ya kele nyonso ve yina ke tuba, ‘Mfumu, Mfumu,’ kasi yina ke salaka luzolo ya Tata ya Munu.” “Yandi yina ke banda ve; ya kele yandi yina ke sukisa.” Yawu yina, ya kele ve na nzila ya kuzenga; ba ke katula beno na nsuka ya nzila. Ya kele ve na nzila ya kuzenga. Beno fwana kwisa kaka mutindu Masonuku me tuba.

222 Kana Yawu me tuba, “Beno balula ntima, mpe beno botama na Nkumbu ya Yesu Klisto, mpe beno ke kuzwa dikabu ya Mpeve-Santu,” ya kele na ata kima ya fyoti ve, kupesana diboko, kukuma ya dibuundu to dénomination. Beno ke kwiza Nzila yina! Kana ti beno kufwa na beno mosi, mpe kubutama na Mpeve ya Nzambi, beno kele—beno kele—beno kele ya kuzimbana. Kaka yina. Ya kele ve na nzila ya kuzenga.

223 Beno ke tuba, “Mbote, mu kele ya dibuundu.” Mu zaba. Ya kele mbote. “Mbote, mama ya munu . . .” Mu ke tula ntembe na yawu ve, kasi yayi kele nge mu ke na kuzonzila. Beno me mona? Beno fwana kwiza na Nzila yina, samu ti ya kele ve na nzila ya kuzenga; ba ke katula beno na Lufundusu. Beno ke kwiza na Nzila mosi.

224 Ya kele kaka na Nzila mosi, mpe Klisto kele Nzila yina. Mpe Klisto kele Ndinga yina ke zingaka na kati ya beno, yina ke tezaka nyonso yina Yandi silaka na nsungi ya yawu. Beno me mona? Beno me bakula yawu? [Dibuundu me tuba, “Amen.”—Mu.] Mbote mingi. Beno tala ntangu yayi.

225 Bayankaka ke tuba, “Bantu yayi kele mbote.” Kieleka. Mu ke tuba ve ti bawu kele bantu ya mbote ve. Mu ke tuba ve Santu Cecile mpe bawu nionso vwandaka ve bakento ya mbote; na yawu bawu vwandaka mama ya munu, kasi ya kieleka mu ke



sambilaka ve samu na yandi. Ya kieleka ve. Ya kieleka, mu me monaka bantu mingi ya mbote, kasi ba kele ve banzambi ya bakento. Ba kele bakento, babakala. “Ya kele kaka na Muvukisi mosi na kati-kati ya Nzambi mpe muntu.”

226 Na yina samu na yinki, samu na yinki muntu lenda, muntu ya Pentecote, muntu ya yinza . . . mukanda yina ke zietaka yina Mpangi duPlessis, mpangi ya beto ya bakala ya ntalu, ke na kuzietisa. Ya lendaka vwanda ti bayankaka ya beno me kuzwa yawu. Beno vwanda . . . Yinga, beno me kuzwa yawu. Na Conseil Oecuménique, na lweka ya pape, mpe tubaka, “Ya vwandaka kieleka ya kimpeve.” Yina kele kuswasikisa mabanza ya mpeve, mutindu yina ve? “Oh, Mpeve ya Mfumu wandaka kuna, kieleka ya kimpeve.” Yinga. Beno bawu yayi.

227 Samu na yinki? Samu ti ya kele bweso na kuvukisa ba-Protestant mpe yawu kintwadi, yina beto me nwana bamvula mingi, mpe Biblia me telama mpe me tuba na beto ti ya ke kwiza. Mpe ya beto . . . mosi ya bantwadisi ya beto ya kulutila nene me kota mbala mosi, me tuba, “Ya kele kieleka. Ya kele yina beto ke salaka,” mpe dibuundu ya muvimba ya ba-Protestant ke na kubwa samu na yawu.

228 Mpe kaka kieleka, kana beno ke tala na zulu kuna, MUTINDU ME TUBA MFUMU. Ya ntete, Ndinga me tuba yawu. Na yina Mpeve ya Mfumu tubaka, na 1933, yina tubaka mambu yayi nionso yankaka samu na bayinsi ke kwenda na mvita, mpe mutindu ba-masini ke vwanda, mpe bima nionso ya mutindu yina, ya me tuba ya kieleka yawu yina ke salama na nsuka. Mpe yawu yayi. Ya me kubwaka ata fioti ve. Mpe awa beto ke mona yawu ke ningana.

229 Beno ke bambuka moyo na dilongi ya munu na zulu ya *Nsambulu ya Jezabel* ntama mingi ve? Beno ke bambuka moyo na Élisée kwizaka na nzila na suka yina, samu na kutuba na bawu? Ti, mu longaka na zulu ya yawu. Beno me mona? Mpe wapi mutindu mu zabisaka na ntwala ti ntangu ke kwisa yina Conseil Oecuménique yayi na nsuka ke kuma kidimbu ya kibulu, samu ti ya ke vukana na kibulu. Ya ke na kusalaka yawu. Na nsungi ya munu, mu me zingaka samu na kumona yawu. Mpe awa ba-Protestant, na nzila ya mafuku, ke kubwa samu na yawu. Samu na yinki? Ya kele samu na yina bawu ke na kusosaka.

230 Ba kele bampofu! Yesu tubaka na ba-Pharisien yina, “Beno bantwadisi ya meso ya bampofu. Kana mpofu ke na kutwadisa mpofu,” Yandi tubaka, “bawu nyonso ke kubwa ve na dibulu?” Mpe ya kele kisika bawu ke kubwa. Wapi mutindu mu lendaka kwikila ti muntu yina me telama na munu mpe ke tuba na munu, lendaka vwanda mpe kusala nsamunu ya mutindu yina! Beno me mona, “Ya kele ya kubumbama, meso, na bantu ya ndwenga mpe ya mayela, mpe ke monisa Yawu na bana yina zola kulongoka.”

<sup>231</sup> Mu zaba ti kilumbu mosi ya ke lomba munu luzingu ya munu. Ya kele kieleka. Ya ke sala, kasi awa Kieleka ke zabana. Uh-huh.

Muntu ya ntete yina kufwaka samu na dyambu ya Mpeve-Santu yayi,  
Ya vwandaka Jean Baptiste, kasi yandi kwendaka ve, yandi kufwaka mutindu muntu;  
Na manima kwizaka Mfumu Yesu, ba komaka Yandi na kulunsi,  
Yandi longaka ti Mpeve ke vulusa muntu na disumu. (Ya kieleka?)

Na manima ba losaka matadi na Étienne, yandi longaka na kuteleminaka disumu,  
Yandi salaka bawu kudasuka mingi, bawu pasulaka yandi yintu;  
Kasi yandi kufwaka na Mpeve, moyo ya yandi kubasikaka,  
Mpe kwendaka vukana na bayankaka, bayina pesaka baluzingu ya bawu.

Ya kele na Pierre mpe Paul, mpe Jean ya kimpeve,  
Bawu me pesa baluzingu ya bawu samu Nsangu ya mbote lezima; (Yinki bawu salaka?)  
Ba vukisaka menga ya bawu, na baprofete ya ntama,  
Na yina Ndinga ya kieleka ya Nzambi ke tuba na bukieleka.

Mioyo na nsi ya autel, vwandaka dila, “Tii wapi ntangu?”  
Samu Mfumu kupesa kitumbu na bayina nionso salaka yimbi;  
Kasi ya ke vwanda na mingi yina ke pesa menga ya luzingu ya bawu (Yinga, ya kele kieleka.)  
Samu na Nsangu ya mbote ya Mpeve-Santu yayi mpe kitembo ya Yawu ya mbwaki.

Landilaka kaka na kubasika mingi na menga.

<sup>232</sup> Yinga, ya ke sala yawu kilumbu mosi, kasi mu ke na kuingila ngunga yango ntangu yawu ke manisana.

<sup>233</sup> Mpangi mosi ya kento kuzwaka ndosi. Yandi fidisaka yawu na munu, yandi tubaka, “Mu me mona bawu, dibuundu yina me yidika nzila,” ke kufwa munu, na kinsweki, ntangu yankaka, ntangu mu ke basika na ditoma ya munu, “mu ke kota, ba ke bula munu munduki . . .” kasi yandi tubaka, “na yina Mpeve tubaka, ‘Na ntangu yayi ve, kasi ya ke kwisa na ntuala.’” Uh-huh.

234 Nzambi kukeba munu na kukakula konso kima yina. Mu zaba kima mosi ve kasi Yesu Klisto mpe Yandi komaka Yandi na kulunsi. Beto ke na kuzinga na kilumbu ya boma. Disumu me sala yayi. Yinga. Ba—ba losaka matadi na Étienne. Ba zengaka yintu ya Jean, yandi salaka yawu. Mu zaba ve mutindu beto ke pesa ya beto, kasi ya ke vwanda kilumbu mosi. Mbote mingi, beno tala.

235 Na Santu Jean, kana beno zolaka Masonuku yina na zulu ya yawu. Santu Jean 6:49, kele kisika bawu kudyaka mani, mpe Yesu tubaka, “Mpe bawu kele, mosi na mosi, ya kufwa.”

236 Beno tuba, “Mbote, mpangi ya munu ya kento—ya munu ya kento, mu—mu monaka kento yayi ke kina na Mpeve.” Oh, yinga. Uh-huh. “Mu me mona bawu kusala yawu. Mu me mona yandi kutuba na bandinga ya malu-malu. Mu me mona yandi . . .” Yinga.

237 Yesu tubaka, “Mingi ke kwiza na Munu na kilumbu yina, mpe ke tuba, ‘Mu me sala bima nyonso yayi.’” Beno me mona? “Bawu kudyaka mani na ntoto ya kuyuma,” Yesu tubaka, “mpe bawu kele, mosi na mosi, ya kukabwana ya Seko. Bawu kele ya kufwa.” Yina kele kuzimbana ya Seko. Bawu kufwaka kaka kuna na ntoto ya kuyuma.

238 Beno ke bambuka moyo na Hébreux kapu ya 6, “Bayina mbala mosi me zabana Kieleka, mpe me manga na kutambula na Yawu, ya kele dyaka ve na kubalula ntima samu na bawu.” Beno me mona, kukwikila ya ndilu- . . . Ntangu ba me talisa Kieleka na muntu samu na mbala ya nsuka, mpe ba me manga na kuyamba Yawu; landila Buku ya Hébreux, beno me mona, bawu ke . . . ya kele mpe ve na kima na yinza yina lenda vulusa bawu.

239 Ba me manisa. Ata kubalula ntima ve, ata mpulusu ve, ya kele na kima ve yina me bikana samu na bawu. Ba kele ya kukabwana ya Seko. Biblia me tuba mutindu yina, “Na kuingilaka tiya ya boma mpe nkele yina ke yoka mbeni ya yandi.” Mpe ntangu Kieleka ya Nsangu ya mbote me siamisama, me siamisama na mutindu ya kulunga, mpe na manima ba me baluka mpe me kwenda ntama na Yawu, yimeni. Kaka yina. Ya kele mpasi, kasi mu fwana tuba yawu.

240 Beno bambuka moyo na Bawanzio yina kebaka ve ndonga ya bawu ya ntete, kasi bikanaka kuna na kati ya boloko yina na kati ya mpimpa, kisika yinza ke na kutambulaka bubu yayi na boloko mosi yango, ya kele na ata kubalula ntima ve.

241 Beno bambuka moyo na mwa bamvula me luta, mu tubaka, ntangu mu katukaka na Chicago, “To Amerika ke kuzwa yawu na mvula yayi, to yandi ke kuzwa yawu ata fyoti ve.” Beno me mona kisika yandi me kwenda? Yinga.

242 Ntangu yayi mu ke kukiyufula kana Kubenda ya Tatu lenda vwanda? O Nzambi, ti ya vwanda ntama na yawu! Ya kele samu

na yina Kubenda ya Tatu kele? Ya lenda vwanda? Oh, la la! Beno banza na yawu, bankundi. Beno banza na yawu; mu zola ve.

243 Yesu tubaka, “Luvunu ya mutindu yayi . . .” Kana beno zola kusonika yawu, Matthieu 23, na sambwadi. Mu—mu kele awa, “tanga yawu,” kasi beno lenda mona. “Beno ba-Pharisien ya meso ya kufwa!” Bika . . .

244 Beno me bikana kaka na mwa baminuti? [Dibuundu me tuba, “Amen.”—Mu.] Beto mona. Beto baka yawu, samu mu tubaka “tanga yawu.” Ya vwandaka na kima mosi kuna mu zola kutanga kaka na ntwala . . . Ntangu yayi mu banza ti mu ke zenga kima yankaka, kasi beto—beto baka kaka yayi minuti. Matthieu 23, kaka minuti, mbote mingi, mpe beto ke banda na nzila ya 27. Beno kuwa kaka ntangu yayi. Beno tanga kima ya muvimba ntangu beno ke vutuka na yinzo, kana beno zola. Kaka baminuti fyoti dyaka.

245 Ntangu yayi beno tala mbote awa. Matthieu 23, mpe kubanda na nzila ya 27, “Kyadi na beno, ke pesa beno misoniki!” Ntangu yayi, beno bambuka moyo, yayi kele bantu ya santu Yandi ke na kuzonzaka.

*Kyadi na beno, beno misoniki mpe beno ba-Pharisien, bantu ya luvunu! samu ti beno kele mutindu bantoni ya mpembe (ya kele bantu ya kufwa, beno me mona), bantoni ya mpembe, yina ke monika kitoko na ngaanda, kasi kele ya kifuluka na mikwa ya bantu ya kufwa, mpe ya masumu nyonso.*

246 Luvunu mpe bampusa mpe kuswana, na kati ya bawu; na nganda, “Mu kele Docteur Kingandi.”

*Mpe na yawu beno mpe ke monika ya kusungama na ntwala ya bantu, (beno tala Conseil Oecuménique mpe bantu ya Pantekote ya kuvwanda kuna), kasi na kati ya beno kele ya kifuluka na luvunu mpe disumu ya nkú.*

247 Yinki kele disumu ya nkú? Kima yina beno zaba kele kieleka mpe beno ke sala yawu ve. Yesu, ntangu yayi beno tala mbote yina Yandi . . . wapi nsungi Yandi ke tula yayi awa.

*Kyadi na beno, misoniki mpe ba-Pharisien, bantu ya luvunu! samu ti beno ke tunga bantoni ya baprofete, mpe ke bongisa bantoni ya bantu ya kudedama, . . . (Beno me mona, “Oh, baprofete!”)*

*Mpe kutuba, Kana beto vwandaka na bilumbu ya batata ya beto, beto zolaka vwanda ve ya kubwa na bawu na menga ya baprofete.*

248 “Beto zolaka kwikila Ndinga ya Mfumu kana beto zolaka zinga na manima kuna.” Beno tala mbote.

*Na yina beno kele bambangi samu na beno mosi, ti beno kele bana ya bayina kufwaka baprofete.*

*Beno fuluka na kitezo ya batata ya beno.*

249 Ya kele kaka yina ke na kusalamaka. Ntangu yayi beno tala mbote yina Yandi ke tuba awa.

*Beno banyoka, mpe nsungi ya banyoka, wapi mutindu beno lenda kima na manima ya kitumbu ya difelo?*

250 Wapi mutindu beno lenda sala yawu? Ntangu yayi Yandi ke na kuzonzaka na milongi, beno me mona, ya kele kieleka, bantu ya santu. Wapi mutindu beno lenda telama mpe kuzaba ti Biblia ke zabisa na ntwala mpe ke tuba na bantu yango na kusala yawu ve, mpe lendaka telama mpe kukakula samu na ba-dollars ya mvindu, ya kupola, samu na kuzabana mingi, mpe muntu yina ke bula beno mwa mbata na manima mpe ke bokila beno “Dokotolo”? Wapi mutindu beno lenda tuba ti beno zola bantu yina?

Mu ke longa na ba-bande, mpe. Beno me mona?

251 Wapi mutindu beno lenda, wapi mutindu beno lenda tuba ti beno zola bantu yina, mpe kubika kima ya mutindu yina kusalama? Beno me mona? Beno—beno ba-Pharisien, beno bantu ya kufwa meso, beno banyoka, beno nsungi ya banyoka, wapi mutindu beno ke kima kitumbu ya difelo? Ntangu beno . . . Wapi mutindu muntu lenda bubu yayi, yina zaba ti bima yayi kele yimbi, mpe kutelama kuna samu na kusimba dibuundu ya yandi, samu na kusala dénomination ya yandi kukula, mpe kukondwa kutuba bakento mpe babakala? Wapi mutindu beno ke kima nganzi ya difelo, na yina ba salaka yawu samu na beno? Wapi mutindu beno ke sala yawu? Beno me mona?

252 Beno kuwa, beno kuwa awa. Yinki ya ke vwanda? “Na yawu . . .” nzila ya 34.

*. . . tala, mu ke fidisa na beno baprofete, . . .*

253 “Mu ke,” na bilumbu ya ntwala. Ya kele na ba-Pharisien ya beno yina ke vutuka dyaka. Beno me mona?

*. . . bantu ya ndwenga, . . . milongi: mpe bayankaka ya bawu beno ke kufwa mpe ke koma na kulunsi; mpe bayankaka ya bawu beno ke bula bawu fimbu na ba-synagogue ya beno, mpe ke talisa bawu mpasi na mbanza na mbanza:*

254 Yandi zabisaka na ntwala ti Yandi ke fidisa baprofete ya bawu, na Ndinga ya Mfumu. Mpe yinki bawu zolaka sala? Kima mutindu mosi batata ya bawu kusalaka, samu ti ya kele yina beno kele. Beno me mona, bampeve ke kufwaka ve. Bantu yina kele ya kuyala na bawu ke kufwa, kasi bampeve ke kufwaka ve. Yandi tubaka, “Nge kele bana. Nge kele yandi yina.” Mpe beno tala kaka mutindu bima yayi kele.

255 Wapi mutindu Santu Paul kutelamaka kuna (beno ke kwikila ti yandi vwandaka profete?) mpe bedisaka bakento, na kuzenga bansuki ya bawu; fundisaka ba organisation ya bawu; samunaka

ti muntu nionso yina bakaka mbotika na Nkumbu ya Yesu Klisto fwana kwiza mpe kuzwa mbotika dyaka. Ya kele kieleka.

256 Mpe bubu yayi bawu ke kakula mpe ke lembika yawu. Bawu me zaba ata luswaswanu ve, na mutindu nionso. Ya kele kiadi. Kana ngunga me suka, mu lendaka tuba yayi, beno me mona: ba vwandaka meso ya kufwa, yina ba soolaka na ntwala samu na kuvwanda ya kufwa meso. Nzambi vwanda na kyadi. Ba lendaka ve kumona yawu.

257 Yesu tubaka, “Benno kele bantu ya kufwa meso. Benno bampoyo ya misoniki mpe ba-Pharisien ya kufwa meso, benno bantu ya luvunu! Ntangu benno ke tanga Ndinga mosi yina bawu nionso me tanga, mpe awa benno ke kwisa samu na kufundisa Munu. Mpe mu kele kieleka yina Ndinga tubaka ti ya ke vwanda na kilumbu yayi. Mu zolaka vwanda Munati-nsangu ya kilumbu yayi. Mu kele Mesiya,” Yandi tubaka, na bampova mingi. “Mu kele Mesiya. Mu me kondwa kusiamisa yawu? Kana mu me sala ve yina ba sonikaka samu na Munu, na yina benno fundisa Munu. Mpe benno bampoyo ya ba-Pharisien ke twadisa bantu ya benno mbala mosi na kima ya mutindu yina, mpe ke fidisa nkonga ya muvimba.” Yandi tubaka, “Mbote, mpofo ke na kutwadisa mpofo.” Yandi tubaka, “Nge kele . . .”

258 Nge tubaka, “Oh, kana beto zolaka zinga na ntangu ya Santu Paul, yinga, mu zolaka vwanda na lweka na Santu Paul.”

259 Benno bantu ya luvunu! Benno me mona? Samu na yinki benno ke tambula ve na lweka na Malongi ya yandi? Benno zolaka sala kima mutindu mosi na yina benno salaka ntangu yayi, samu ti benno kele bana ya batata ya benno, batata ya benno ya ba-organisation: ba-Pharisien, ba-Sadducéen, mpe bantu ya kusungama. Yawu yina—yawu yina. Uh-huh. Mu ke tuba na benno, mpe—mpe na ngunga yina beto ke na kuzinga, beto ke kukiyufula kana yayi lendaka vwanda Kubenda ya Tatu? Kaka minuti ntangu yayi, benno me mona, Yesu tubaka, “Yayi me kuzwa kitumbu ya kulutila nene.” Benno me mona? Ya kele ve ya mpasi?

260 Mutindu Americain ya nene, kilumbu mosi, ntangu mbeni vwandaka pene-pene ya kunata yinsi yayi, ya kele na muntu mosi na kati-kati ya ngunga ya mpimpa, yina telamaka na zulu ya mpunda mpe kulumukaka na nzila, vwandaka boka, “Mbeni ke na kwiza!” Ya vwandaka Paul Revere.

261 Mu kele Americain, mpe. Mpe mu ke tambula na zulu ya mpunda, na ngunga ya kati-kati ya mpimpa yayi, mu ke tuba ve ti mbeni ke kwisa, kasi yandi kele awa! Yandi ke kwisa ve; yandi kele dezia awa! Yandi me nunga dezia. Mu ke na boma ti ya me nunga; lunungu, ngunga yayi ya kati-kati ya mpimpa.

262 Benno bambuka moyo, na Tucson, Bawanzio sambwadi, yina Nsangu vwandaka, “Kusukisa dinsweki ya Nzambi.” Na mbala mosi na manima ya yina, na kukulumukaka na ndandani ya myongo . . .

263 Beno nyonso kuwaka na zulu ya myongo. Beno tala. Mpangi Fred kuzwaka bafoto mosi ya yawu, mpe Mpangi Tom. Mpe mu kuzwaka mwa bafoto, mwa ba-film, nyonso. Beto ke lakisa yawu awa kilumbu mosi, kulakisa beno kaka kisika ya vwandaka. Beno nyonso zaba disolo.

264 Beno tala mbote, bansongi tatu. Yandi tubaka, “Beno tala ya Ntete, ya Zole, mpe ya Tatu.”

265 Mpe Mpangi Fred kele na foto ya mutindu yankaka na yawu, ntangu yandi na Mpangi-kento Marthe lutaka. Matuti me basika na poto-poto ya ntoto, mpe bumbaka bayankaka nionso, mpe ya vwandaka talisa kaka Bakubenda Tatu; mosi *awa*, mosi *awa*, mpe mosi *kuna*. Beno me mona? Sambwadi!

266 Beno tala mbote, ya Ntete, tatu. Tatu kele ya kulunga. Ya kele ntangu ministele kubasikaka.

267 Kubenda ya Zole vwandaka kuswasikisa mabanza ya bampeve, profesi. (Ya ntete vwandaka kubeluka ya bambevo.) Ya Zole vwandaka profesi yina basikaka, mpe yawu zabaka kinsweki ya mabanza, ntangu Ndinga Yawu mosi monisamaka. Yina, yina kele lemvo.

268 Kasi, beno bambuka moyo, ya sambwadi kele nsuka. Yayi lenda vwanda Kubenda ya nsuka, ya me manisa? Ya lenda vwanda? Beno banza na yawu ntangu yayi. Beno banza kaka. Wapi kisika beno kele? Beno me mona? Sambwadi kele ntangu nyonso nsuka. Kubenda tatu!

269 Ministere ya Yesu me vwanda na Bakubenda Tatu. Beno zaba yawu? Beno tala! Mpe beno vwanda ya kusungama, kana beno vwandaka ntete na luzingu ya beno, ntangu yayi mwa minuti fyoti, baminuti fyoti.

270 Kubenda ya Yandi ya Ntete vwandaka belusa bambevo. Yandi kumaka muntu ya kuzabana mingi. Muntu nyonso kwikilaka na Yandi, na kumonanaka mutindu. Ya kele kieleka? Ntangu Yandi kwendaka belusa bambevo, muntu nyonso zolaka ti Yandi vwanda na dibuundu ya bawu.

271 Kasi kilumbu mosi Yandi balukaka mpe bandaka na kupesa profesi, samu Yandi vwandaka Ndinga, mpe Yandi vwandaka Profete yina Moise tubilaka. Mpe ntangu Yandi kwendaka tuba na bawu, mpe tubaka na bawu mutindu bawu vwandaka zinga, mpe bima yina bawu vwandaka sala, Yandi kumaka kieleka ya kuzabana ve. Yina vwandaka Kubenda ya Yandi ya Zole.

272 Mu ke kukiyufula kana ya me fwanana diaka? Beno banza kaka muniti mosi. Ya lendaka vwanda? Kubeluka ya Ntete, muntu nionso. Ya Zole: “Oh, ya lendaka vwanda Yesu Kaka. Ya lendaka vwanda Béélzébul, ya lendaka vwanda . . .” Ya kele kima mutindu mosi bawu salaka kuna. Beno me mona? Bampeve mosi yina ke zinga na mutindu mosi ya bantu, ke bedisaka bantu yina lenda kuzwa mpulusu ve, samu ti bawu vwandaka ya

kufundisa na ntwala; bawu, mutindu Judas Iscariot, butamaka mwana ya kuzimbana.

Beno ke tuba, “Judas?” Kieleka.

<sup>273</sup> Beno bambuka moyo, yandi vwandaka musambidi ya kieleka, kasi yandi lendaka ve kukwenda nzila nyonso na Nsangu. Yandi lendaka baka kitini ya yawu, kasi yina yankaka ya yawu yandi lendaka ve na estomac. Ba lenda baka kubeluka ya nzutu mpe bima ya mutindu yina, kasi ntangu ya me kuma na Nzambi yina me bokila bampadi na luzingu, kuna ya kele mingi ya mudindu samu na bawu. “Ya lenda vwanda ve!” Yina vwandaka Judas. Mpeve ya Yandi lenda zinga tii na kisika yina. Yandi lenda ve kusala yawu na manima ya yawu. Beno me mona?

<sup>274</sup> Ba lendaka baka Moise mbote mingi ntangu yandi zibulaka Mubu ya Mbwaki, mpe nionso yina mutindu yina. Kasi ntangu ya kumaka na kutuba, ba vwandaka ve, bayankaka nyonso vwandaka ve kusala *yayi to yina, to yankaka*: “Yandi ke salaka yandi mosi Nzambi, na zulu ya beto.” Beno me mona, bawu zolaka kwenda na yawu ve, Koré mpe bayankaka. Na yawu, bawu zolaka kuzwa organisation, na yawu Nzambi me mina kaka bawu.

<sup>275</sup> Ministere ya Yesu, ntangu Yandi vwandaka belusa bambevo, “Yandi vwandaka Profete ya kitoko, ya Galilée! Samu na yinki, Yandi ke na kufwa meso samu na kumona. Yandi me vumbula mpe bantu ya kufwa. Beto kele na mambu tatu ya yawu. Yandi me vumbuka na lufwa.”

<sup>276</sup> Kasi kilumbu mosi Yandi balukaka, Yandi tubaka, “Beno nsungi ya mpidi. Beno ke sukula na ngaanda ya plato. Beno ke monana mutindu santu, kasi kati ya beno, beno kele kima mosi ve kasi nkonga ya banioka.” Oh, ntangu profesu yina kwendaka, samu na kufundisa organisation yina, na manima yawu sobaka. Bawu mangaka Yandi. Ya kele kieleka. Mpe na nsuka, na kumangaka Yandi, bawu komaka Yandi na kulunsi.

<sup>277</sup> Kasi beno lenda ve kufwa Ministele. Ya ke na kulandila na kuzinga. Beno lenda tula munati-nsangu na kulala, kasi beno lenda ve kutula Nsangu. Uh-huh. Ya kieleka. Yandi zingaka. Mpe beno tala ntangu Kubenda ya Tatu ya ministele ya Yandi kwizaka. Ya Ntete vwandaka kubelusa bambevo.

<sup>278</sup> Ya Zole vwandaka semba ba-organisation, mpe vwandaka pesa profesu; yina bawu salaka, yina bawu vwandaka, mpe yina vwandaka kwiza. Yinki kele, yinki kele, ke kwiza; mpe yinki vwandaka, yinki kele, mpe yinki ke kwiza. Ya kele yina Yandi salaka. Ya kele kieleka?

<sup>279</sup> Kasi Kubenda ya Yandi ya Tatu vwandaka ntangu Yandi longaka na bantu ya kuzimbana yina zolaka kuzwa dyaka ve mpulusu. Ba vwandaka kuna kisika meso yango ya nene, ya kupakula vwandaka, “Ooh, ooh!” Yandi longaka na myoyo na difelo, bayina ndimaka ve kyadi, kasi vwandaka ya kukabwana



ya Seko na Mvwindulu ya Nzambi. Kasi dyaka bawu zolaka bakula yawu, yina Yandi vwandaka, samu ti Nzambi salaka Yandi kuna.

<sup>280</sup> Mu ke kukiyufula kana ministere ya Yandi me basika mutindu mosi na bilumbu ya nsuka, mutindu ya vwandaka? “Mutindu Tata fidisaka Munu, mutindu mosi Mu ke fidisa beno. Beno mpe ke sala bisalu yina Mu ke sala.”

<sup>281</sup> Ya kuzimbana, ba lendaka ata fioti ve kuzwa mpulusu. Ba me manga mawa. Yina vwandaka Kubenda ya Yandi ya Tatu.

<sup>282</sup> Ntangu yayi ya kele na kyuvu mosi? Kubenda ya Yandi ya Ntete, Yandi belusaka bambevo. Ya kieleka? Ministere ya Yandi ya Zole, Yandi vwandaka pesa profesu. Ministere ya Yandi ya Tatu vwandaka longa na yina me zimbana ya Kukonda nsuka. Bamongo tatu, mpe nionso yina; yina me zimbana, ya Kukonda nsuka!

<sup>283</sup> Ministere ya Noé, ba-ministere nionso, salaka mutindu mosi. Noé longaka. Ya kieleka kaka. Yandi kotaka na nzaza. Mpe ntangu yandi kotaka na nzaza, ya vwandaka na bilumbu sambwadi yina kima mosi salamaka. Kimbanga ya yandi longaka na bayina ba fundisaka.

<sup>284</sup> Sodome na Gomorrhe! Yesu tubaka ti bawu zole ke kwiza. “Na ntwala ya nkwezulu ya Mwana ya muntu, mutindu mosi ya ke vwanda mutindu bilumbu ya Noé, mutindu mosi ya ke vwanda na bilumbu ya Sodome.” Yandi tubilaka Noé.

<sup>285</sup> Noé vwandaka na Bakubenda Tatu, mpe ya Tatu vwandaka ya kuzimbana na manima kielo vwandaka ya kukanga. Samu ti, Nzambi bika yawu vwanda kaka kuna, kisika muntu ve lenda kota to kubasika. Bawu vwandaka na kati. Samu ti, (mutindu na mungo ya sambwadi) mungo ya zulu mingi, ya kele kisika Yandi tulaka nzasa, na zulu ya mungo. Beno me mona? Ya kele kieleka?

<sup>286</sup> Na bilumbu ya Sodome, Kubenda ya Ntete vwandaka Lot ya kusungama. Mpe Biblia ke tuba, “Masumu ya Sodome vwandaka kwamisa moyo ya yandi konso kilumbu,” mutindu bakento yina salaka mpe vwandaka sala.

<sup>287</sup> Beno ke bambuka moyo, “Mutindu ya vwandaka na bilumbu ya Noé.” Yinki bawu vwandaka sala? “Kudya, kunwa, kukwelana, kupesa na makwela.” Bakento, beno me mona, bakento. Yinki yawu vwandaka na bilumbu ya—ya Sodome? Bakento.

<sup>288</sup> Mpe nsangu ya Ntete vwandaka Lot. Ba sekaka yandi.

<sup>289</sup> Na yina ba fidisaka mizabisi yankaka, zole na kati ya bawu, mpe bawu kulumukaka. Yina vwandaka Kubenda ya Yandi ya Zole samu na Lot . . . samu na Sodome.

<sup>290</sup> Kasi beno tala Yandi yina kwendaka na nsuka, ya vwandaka na kyadi ya kulutila mpe ya kulutila. Kuna ya sukaka nyonso, kuna na ntangu yina. Munati-nsangu ya tatu yina kwendaka

kuna, Kubenda ya Tatu, yinki Yandi vwandaka? Wapi mutindu ya ministele Yandi vwandaka na yawu? Yandi vwandaka na musolami, mpe tubaka na bawu yina vwandaka salama na manima ya Yandi. Ya kele kieleka? Kasi ntangu Yandi kotaka na Babyлоне, to na Sodome, Yandi zolaka kumona . . .

<sup>291</sup> Mpe Abraham, na kubokaka, “Kana mu lendaka kuzwa makumi tanu ya kusungama?” Yandi kulumukaka tii na “kumi ya kusungama?”

Nzambi tubaka, “Yinga, tala kumi ya kusungama.”

<sup>292</sup> Bika mu tuba na nge kima mosi, mpangi-kento, na mwa ntangu fioti. Beno lenda vwanda muntu ya mutindu ya ntama, kasi beno kele na kima yina ntinu ya kento yina ya sexe kele na yawu ve. Nge ke na kima yina yandi lenda vwanda na yawu ata fioti ve. Ya kieleka. Beno lenda vwanda na bilele ya nkulu, kulwata mutindu mama. Ba lendaka tuba, “Beno tala exalté yina ya ntama.” Beno vwanda na boma ve. Yandi kele na kima yina mwa ntinu-kento yina ya sexe, yina kele na yinza ya muvimba ke tala yandi kuna, yandi me kuzwa yawu ve. Yandi lenda ata mbala mosi ve kuzwa yawu. Yandi kele ya kuzimbana, ya Seko. Yandi kele ya kubedisa. Beno me mona? Yandi kele ata fioti ve . . . Beno kele na bumuntu; beno kele na ngolo. Yandi kele na kima mosi ve. Yandi kele na pambu yina ke nataka mioyo ya kuzimbana na difelo. Bampofu ke kotaka na yawu. Ntangu yayi, beno kele na kima mosi.

<sup>293</sup> Beno zaba, beno lenda vwanda ya kusonama ve na zulu ya buku ya dibuundu, kasi ya lendaka vwanda luzingu ya beno ya kusungama yina me kanga nganzi ya Nzambi na yinza bubu yayi. Yinza ke kwikila yawu ve. Beno kento yina ba ke bokilaka exalté, beno mwa bakala yina na mpasi zaba kima mosi, kasi beno ke boka na Nzambi, kilumbu mpe mpimpa, samu na masumu ya yinsi, beno lenda vwanda yina ke kanga nganzi. “Kana mu lenda kuzwa kumi, mu ke keba bawu. Kana mu lenda kuzwa kumi!” “Mutindu ya vwandaka na bilumbu ya Sodome, mutindu mosi ya ke vwanda.” Beno me mona yina mu zola kutuba?

<sup>294</sup> Ve, “Kana mu lenda kuzwa ba-Methodiste kumi, kana mu lenda kuzwa ba-Baptiste kumi, kana mu lenda kuzwa ba-Pentecotiste kumi, kana mu lenda kuzwa ba-athlète kumi, kana mu lenda kuzwa bantalu kumi, kana mu lenda kuzwa milongi kumi.”

<sup>295</sup> Kasi, “Kana mu lenda kuzwa kumi ya kusungama!” Ya kele na Mosi ya kusungama, ya kele Klisto. Klisto vwandaka zinga na kati ya Mosi, na kumi yina, beno me mona, “Mu ke keba bawu.”

<sup>296</sup> Kasi Munati-nsangu yina ya nsuka longaka bayina ba fundisaka. Beno ke tuba . . . Yandi kwendaka kuna. Masonuku ke tuba ve yina salamaka, kasi tiya kubwaka na suka yina landaka, kieleka, na manima Yandi salaka bidimbu yina, kaka na mbala

mosi na manima Yandi salaka ministele ya Yandi ya profesi. “Samu na yinki Sarah me seka?”

Yandi tubaka, “Mu salaka yawu ve.”

Yandi tubaka, “Yinga, nge me sala yawu.” Beno me mona?

<sup>297</sup> Ntangu yayi, kaka na manima ya yina, Yandi kotaka na Babylone, to kotaka na Sodome. Yandi monaka bawu ata fioti ve, na yawu tiya kubwaka. Yandi monaka Lot mpe bana ya yandi zole ya bakento, yandi tubaka, “Basika awa na ntangu yayi.” Beno me mona? Ya basikaka. Yandi kwendaka kuna. Beno bambuka moyo, Yandi vwandaka na nzila ya Yandi kuna. Yandi fidisaka mizabisi na ntwala ya Yandi, kasi Yandi kulumukaka Yandi mosi, kieleka, samu na kutala kana kima nyonso yayi vwandaka kieleka. Mpe Yandi monaka yawu ya kufuluka na yinki? Bakento ya kupakula bizizi. Nsangu samu na yina ba fundisaka. Yinki bawu salaka? Ba sekaka yawu.

<sup>298</sup> Yinki bawu ke sala bubu yayi? Kima mutindu mosi. “Mu kele ya ba-Assemblée. Mu kele ya ba-Unitaire. Mu kele—mu kele. . . Mu kinaka na Kimpeve. Nkembo na Nzambi, mu ke tuba na. . .” Mbote mingi, kwenda na ntwala. “Mu ke zenga nsuki ya munu kana mu zola. Mu ke sala *yayi*. Mu ke—mu ke tuba kaka *yayi*. Mu fwana botama ve na Nkumbu ya Yesu. Mu—mu ke kipe ve yina yandi me tuba. Paul kele kiboba yina ke yinaka bakento, na mutindu nyonso. Ya kele. . .” Mbote mingi, beno kwenda na ntwala.

<sup>299</sup> Mosi ya bilumbu yayi, kana beno me kuzwa ntete ve, beno ke sabuka ndilu yina. Beno ke vwanda diaka ve na nsatu ya kusala yina kele mbote. Beno me kuwa yina mu me tuba? Ya kele dyambu. Mpangi ya bakala, mpangi ya kento, beno me bakula yina me tubama? Beno ke zabuka ndilulu yina, mpe beno ke zola ata fioti ve kusala yawu. Beno ke kuwa dyaka Nsangu ya mbote, kieleka, kasi beno ke ndima Yawu ata mbala mosi ve. Beno lenda ve kundima Yawu. Kasi ba ke longa Nsangu ya mbote na bayina ba fundisaka, bayina kele ya kuzimbana ya Seko, lenda kuzwa mpulusu ve, dyaka ve. Beno kele yimeni na kisika yina, mpe beno zaba yawu ve. Beno banza ti beno ke na kuzinga na biese, mpe kufwa na yina beno kele moyo.

<sup>300</sup> Oh, beno kuwa. Bayina nyonso kumangaka Nsangu ya ngunga, ntete beno sala, nsangu ya mbote ba longaka na bayina ba fundisaka, ntete, na ntwala bawu kwenda; kukondwa kyadi. Noé, kangaka, vwandaka kimbangi. Nzambi kangaka kielo, na manima ya Kubenda ya Tatu. Na manima ya Kubenda ya Tatu na Sodome, myelo vwandaka ya kukanga. Ya vwandaka dyaka ve na kyadi. Ba zwaka kumi ve. Mpe ba longaka Nsangu ya mbote na bantu yina zimbanaka, yina zolaka kuzwa mpulusu ve, samu ti ya vwandaka kaka. . . Ya vwandaka mutindu yina na konso nsungi, konso nsungi ke manga Nsangu na ntwala ya lufundusu.

301 Bawu me sala dyaka yawu? Ya kele kumonana ya Dikunzi ya Tiya yina kwisaka awa na zulu ya nzadi? Ya kele yina ke talana na Nsangu yina ke semba bakento, mpe ke vutula bima na ndonga, mpe ke semba milongi yina ke kwenda na lweka ya denomination na kisika ya kubikana na Ndinga? Ntangu, Nzambi me siamisa na mutindu ya kulunga ti ya kele Yandi, mpe ve mwa muntu ya mawa yina zaba kima ve yina longokaka ve mutindu muntu. Ya kele Nzambi! Mpe beto me kuma ntangu yayi na kisika yina Kubenda ya Tatu ke vutuka dyaka na bantu ya kuzimbana, ya Seko?

302 Ya vwandaka ntendulu yina vision yina pesaka munu, mutindu mu vwandaka mwana-bakala ya fyoti kuna? Mpe mu kwendaka na Wesete, mpe kuna kele Kulunsi ya wolo ya Nsangu ya mbote yina ke sema, me zabisa kidimbu ya Mazulu, kaka kieleka. Beno bambuka moyo, Kulunsi vwandaka na kati ya kifwanusu ya nene, mutindu—mutindu pyramide, mpe, yina ba tungaka. Beno me mona? Ya lenda vwanda ti ya kele kitini ya yintu kisika yawu me suka, mpe kubanda *awa* mpe sukaka na yintu?

303 Mutindu pyramide, kwisaka na Luther, Wesley, Pentecote, mpe na manima ya ditadi ya yintu. Ya lenda vwanda mutindu yina? Kana ya kele mutindu yina, wapi kisika beto kele? Yawu, yayi lendaka vwanda. Mu banza ti ya ke mutindu yina ve, kasi ya fwana vwanda. Ya ke vwanda mutindu yina. Beno bambuka kaka moyo, ba-ministere ya bawu fwana vwanda mutindu yina, ya ke vukana kaka mutindu mosi, na yankaka. Ya fwana kwisa. Mpe Nzambi ke sobaka ve. Beno banza na yawu!

304 Beno tatika konsiansi ya beno na meno ya beno ya kimpeve, mpe beno tala kisika beto kele. Yinki kana ya kele mutindu yina, mpe beno kele kaka mutindu beno kele? Na yina beno ke tambula kaka mbote... Beno me manisa, bayina kele na ngaanda. Na manima ba bakaka Buku na Mwana-dimeme, Kidimbu ya Sambanu me monisama mpe Bidimbu nionso, ya me suka. Ya lendaka vwanda. Mu banza ti ya kele ve. Ya lendaka vwanda. Mbote mingi.

Ntangu yayi, samu na yinki Kubenda ya Tatu yayi me lutisa ntangu mingi?

305 Beno tala, Kubenda ya Ntete mpe Kubenda ya Zole kwendaka katuka mosi na yankaka. Mu zabisaka na ntwala, beno ke bambuka moyo, ntangu mu bandaka ntete, pene ya Ntete. Mpe mu tubaka, “Ya ke vwanda na ntangu yina Yawu ke zaba mpe binsweki ya ntima.” Beno ke bambuka moyo? Bantu yikwa? Samu na yinki, beno nionso ke bambuka moyo na yawu, na balukutakanu ya munu. Mpe nkokila mosi mu kwendaka kaka na Lweka, kuna, mpe mu kwendaka na estrade; mpe Mpangi Baxter, mafunda mingi ya bantu. Mpe muntu mosi kwisaka na estrade, [Mpangi Branham me fina misapi ya

yandi—Mu.] mpe yawu vwandaka kuna. Mpe kubanda yina ya vwandaka mutindu mosi.

<sup>306</sup> Kasi ya me kuma bamvula kubanda mu me basika na bilanga ya kulonga, bamvula yiya, pene ya tanu kubanda mu me basika. Yinki ya kele? Yinki salaka yayi? Ya vwandaka samu na yinki ti ya vwandaka mutindu na mbandukulu, na Genèse, “Nzambi kele na mvibudulu”?

<sup>307</sup> Beno bambuka moyo, ntangu Yandi salaka yinza, kilumbu ya sambwadi Yandi salaka kima ve. Yandi pemaka. Beno me mona? Nzambi vwandaka na mvibudulu na mvula ya sambanu yina, na kuzolaka ve ti muntu kufwa, kasi bantu nyonso lendaka kwiza samu na kubalula ntima. Nzambi vwandaka na mvibudulu.

<sup>308</sup> Dyaka, mpe, na Genèse 15:16, kana beno zola kusonika yawu, 16, 15. Yandi tubaka na Abraham, “Kuna na yinsi yina ya ba-Amoréen, disumu ya bawu ya nkú,” bawu vwandaka Bantu ya makanda ntangu yayi. “Mu lenda nata beno ve na kati kuna ntangu yayi, samu ti disumu ya nkú ya ba-Amoréen, Bantu ya makanda, kele ntete ve ya kufuluka. Kasi mu ke sambisa bawu. Mu ke kwisa na nsungi yina ya yiya, mpe kuna mu ke sambisa yinsi yina na nkawa ya kisengo.” Ya kele kieleka?

<sup>309</sup> Ya me vwanda ntangu mingi, ti Nzambi kele na mvibudulu, ministele ntangu nyonso, na nzila ya bande mpe nyonso yankaka, me kombula yinza ya muvimba, samu na kutala kana ya kele na mosi dyaka? Kasi mu banza ti yina ya nsuka me kota ntama mingi ve. Ya me vwanda disumu ya nkú yina me vwanda—me vwanda ntangu ya yinda? Kana Yesu kele mutindu mosi, yina Yandi kele, Hébreux 13:8, Nsangu ya Yandi fwana vwanda mutindu mosi. (Kukubama na kusukisa.) kimalu ya Yandi fwana vwanda mutindu mosi.

<sup>310</sup> Kana Kubenda ya Ntete mpe ya Zole kele kukondwa kyuvu! Ya kele na kyuvu na dibanza ya beno na zulu ya Kubenda ya Zole mpe ya Zole? Ya salamaka kaka mutindu Yandi tubaka? [Dibuundu me tuba, “Amen.”—Mu.] Na yina samu na yinki kyuvu ya Tatu? Beno me mona? Samu na yinki beno ke kukiyufula Yawu? Zole ya ntete talisamaka na nzila ya Masonuku. Mu me siamisa na beno na suka yayi ti ya Tatu me talisama na nzila ya Masonuku, mpe.

<sup>311</sup> Beno tala na yinza, beno mona kisika yandi kele. Beno tala mutindu bawu me manga Kieleka, mpe mutindu ya me talisama na mutindu ya mbote, kitini ya profesu. Ntangu yayi wapi kisika beto kele? O Nzambi, tala kyadi! Yina ke sala ntima ya munu kubenda na kati. Wapi mutindu samu na yawu? Wapi kisika beto kele?

<sup>312</sup> Beno bambuka moyo, bansongi ya mongo sambwadi yayi na zulu kuna, ba lendaka tuba na beno. Ya kele. . . Ya kele ve na nsongi ya mongo yankaka na zulu ya yawu. Ya kele na ndilu ya Kukabula bamongo ya Matadi. Ya ke kwenda mbala mosi

na ntoto ya kuyuma, katuka kuna. Seko kele ya kuvwanda. Bansongi sambwadi, kaka na Ndilu ya Kukabula bamongo ya Matadi. Ya kele kieleka na kati-kati ya mbote mpe yimbi. Mpe na nsuka ya yawu, Kubenda ya Tatu vwandaka Kubenda ya nsuka ya ndandani ya bamongo. Ya kele kieleka? Beno me mona? Mbote mingi.

<sup>313</sup> Noé kotaka, na yina na manima ya bilumbu sambwadi, kima mosi ve salamaka, beno me mona. Na bilumbu sambwadi lufundusu kwizaka. Kana kaka . . . Beno kuwa ntangu yayi, samu na kumanisa. Kana kaka, na ntangu ya Noé, bawu zolaka zaba kidimbu yina! Kana bawu zabaka kaka! Ntangu yayi mu ke sukisa. Kana bawu zolaka zaba kaka kidimbu yina, yinza na kilumbu yina! Ti, Nzambi me siamisa awa, na nzila ya kutanga ya Masonuku, ntama mingi ve, Yandi bebisaka bantu yina.

<sup>314</sup> Kukondwa kyadi; ba fidisaka kyadi na bawu na nzila ya profete. Bawu zolaka kwikila yawu ve. Nzambi kele na kyadi, kasi, Yandi fidisaka kyadi kasi bawu zolaka kuzwa yawu ve. Yandi ntangu nyonso ke fidisaka kyadi, ntete.

<sup>315</sup> Yinki ke salama kana bawu zabaka ti kidimbu yina vwandaka kidimbu ya ntangu ya nsuka? Mpe ntangu bawu monaka, na mbala mosi, mpulusu katukaka. Muntu ve, beno me mona. Kaka, kima ya ntete beno zaba, kyelo vwandaka ya kukangama. Kana bawu . . . Ya vwandaka kaka na muntu mosi yina zabaka kidimbu yina, ya vwandaka Noé na kimvuka ya yandi. Ya vwandaka kaka yina zabanaka. Ntangu mwelo yina kuvukanaka, Noé zabaka yawu. Noé zabaka ti ya vwandaka nsuka. Yandi zabaka yawu. Ya kieleka. Kana beno zabaka kaka kidimbu!

<sup>316</sup> Oh, kana bawu zolaka zaba kaka kidimbu yina, ntangu ba monaka Yandi yayi kukota kuna, ya vwandaka na zulu kuna na Abraham!

<sup>317</sup> Kana bawu zabaka kaka ti Billy Graham ya kilumbu yina, kwendaka kuna, yandi na Oral Roberts, mpe longaka nsangu yina na bantu ya kufwa meso! Kana bawu zaba kaka, ba-Methodiste ya ntama ya kusungama mpe ba-Baptiste ya ntama kuna vwandaka kidimbu samu na bawu na kilumbu yina, Lot, na ntangu masumu vwandaka yangisa moyo ya bawu. Na yina yinki ba-Methodiste mpe ba-Baptiste kotaka? Mutindu Lot salaka, kima mutindu mosi. Kasi ya kudedama, na ngaanda kuna, me basika. Kieleka.

<sup>318</sup> Yinki kana ya vwandaka ntangu Billy Graham kwendaka kuna? Beto ke kwenda na lukanu, beto ke dia chewing gum, ke bulana mosi na yankaka, mpe ke seka, bansuki ya kuzenga, bizizi ya kupakula, mpe ba ke sala kima mosi ve samu na yawu. Mu vutukaka kilumbu yina vwandaka landa, mpe Billy tubaka, “Mu ke kuzwa mafunda makumi tatu ya bantu; mu ke vutuka na mvula mosi, mpe mu lenda tala ve makumi tatu.”

319 “Oh, mu bakaka lukanu. Mu—mu—mu ke kwenda ve na difelo; mu ke kwenda na Mazulu, beno me mona,” ke landila na kutambula kaka na disumu. Kana bawu zolaka kaka . . .

320 Mpe kuna Nsangu ya mbote yina ba longaka na Ngolo, mpe bidimbu mpe mambu ya ngitukulu, na Dikunzi ya Tiya na zulu ya yawu, mpe nyonso yina ke na kulandila kaka kieleka, mpe ba zabisaka bawu na ntwala mpe ba ke vwanda. Kana bawu ke . . . Bawu tubaka, “Nkonga ya ba-exalté. Ya kele mabanza ya bantu. Mutindu mosi ya ndoki. Diabulu, yawu yina kaka Yawu kele. Beno kwikila Yawu ve. Ya kele ve na organisation ya beto. Beto kele na kima ya kusala na Yawu ve.” Kana bawu zabaka kaka kidimbu! Kana bawu zabaka kaka!

321 Yesu tubaka, yandi tubaka, “Kana beno zabaka kaka kilumbu ya beno, Jérusalem. Kana beno lendaka zaba kaka! Kasi,” yandi tubaka, “ntangu yayi nge me bikana na ya nge mosi.” Beno me mona? “Kana beno zaba kaka. O Jérusalem, Jérusalem, bambala yikwa mu zolaka vukisa nge, mutindu nsusu ya kento zolaka fuka bana ya yandi, na balufundusu yina ke na kwiza kaka! Kasi beno zabaka ve kilumbu ya beno.” “Beno yina losaka matadi na bapofete, mpe kufwaka bantu ya kudedama, kana beno zolaka zaba kaka kilumbu ya beno! Kana beno zabaka kaka, mpe vwandaka na Masonuku ya beno, mpe zabaka ti nkwezulu ya Munu vwandaka kidimbu ya nsuka ya beno. Ntangu yayi beno kele mpofo. Ntangu yayi ba me semba beno. Ntangu ya beno me suka.” Mpe ya vwandaka. Ya kele kieleka. “Kana beno zabaka kaka ntangu!”

322 Beno tala, ntangu Yesu salaka nsamunu yina, yinza landilaka kaka na kukwenda na ntwala. Beno me mona? Yinza landilaka kaka, na mutindu ya mbote. Samu na yinki? Samu bawu zabaka ve ngunga ya bawu.

323 Yinza landilaka kaka, ntangu Noé kotaka na nzaza. Yinza landilaka kaka na kukwenda na ntwala. Bantu ya masawula, na kilumbu yina, bawu vwandaka kaka na bafeti ya kuvukisa banzutu. Bawu ke kudya dyaka, ke kunwa, ke kwelana, ke sala bima yina bawu ke salaka bubu yayi. Kaka kieleka, na mutindu ya mbote. “Ha-ha! Exalté yina ya ntama kangaka kyelo. Ntangu yayi, beno me kuwaka ntete kima ya mutindu yina? Ha-ha! Beno zaba yina yandi ke tuba? Beto nionso ke vwanda ‘dinda.’ Buzoba! Wapi masa kele?”

324 Bantu ke sekaka Nzambi, na bilumbu ya Noé. “Mutindu mosi ya ke vwanda na nkwezulu ya Mwana ya muntu.” Mbote mingi. Noé zabaka kidimbu. Kima ya mutindu mosi na bilumbu ya Lot. Bima mutindu mosi na bilumbu ya Yesu. Mutindu mosi ya kele bubu yayi. Ba ke vweza ntangu ya bawu ya nsuka . . .? . . .

325 Mutindu mosi na Sodome, bawu zabaka yawu ata fioti ve. Ntangu Munati-nsangu yina vwandaka ya kutelama kuna, Nsangu ya Nzambi, ba sekaka kaka bawu mpe mekaka na

kubebisa bawu na bisalu ya bawu mosi. Ya kele kieleka? “Kota mpe vukana na beto. Vwanda mosi ya beto.” Ya kieleka? “Kota mpe kota na beto, vwanda mosi ya beto. Nge ke vwanda mosi ya bana-babakala. Kwisa, kota na beto.” Beno me mona? Bawu zabaka ata fioti ve kidimbu ya bawu.

<sup>326</sup> Bawu zabaka yawu ve ntangu Nsangu yina vwandaka landila, ti ya kieleka. . . Ba lendaka ve kumona yawu, ti tiya mpe nganzi ya lufundusu, mutindu Nzambi, tiya ke talaka na tiya ya soufre vwandaka kuna na mazulu. Ba lendaka ve kumona yawu. Minati-nsangu lendaka. Uh-huh. Lot zabaka yawu, mpe. Yandi zabaka ti ya vwandaka kuna. Ya kieleka.

<sup>327</sup> Mutindu mosi ya kele bubu yayi, kaka mutindu mosi. Nganzi ke na kumata, ba-bombe atomique kele na zulu, bima nionso kele na nsuka. Ya kele mutindu mosi ntangu yayi.

<sup>328</sup> Beno tala, bantu, beno kuwa. Beno zaba. . . Beno ke tuba, “Mpangi Branham, oh, wapi mutindu samu na nyonso ya yawu?” Beno zaba, bantu lenda landila na kulonga Nsangu ya mbote mutindu bawu ke salaka ntangu nyonso, yina bawu ke bokilaka Nsangu ya mbote, yawu lenda mana. Bawu salaka na bilumbu ya Noé. Bawu salaka na bilumbu ya Lot. Bawu salaka na bilumbu ya Yesu. Ya kieleka?

<sup>329</sup> Mpe ba-Juif, na manima Yesu tubaka na bawu ti nganzi. . . “Nge me manisa. Nge me manisa. Ya kele dyaka ve. Nge me manisa.”

<sup>330</sup> “Oh,” yandi tubaka, “exalté yina. Wapi lukolo Yandi me katuka? Wapi kisika Yandi me katuka, na yawu?”

<sup>331</sup> Beno bambuka moyo, Yandi vwandaka ya kukubama kuna samu na Kubenda ya Yandi ya Tatu. Uh-huh. Ya kele kieleka. Yandi tubaka, “Bambala yikwa mu me zola kuvukisa nge!”

<sup>332</sup> Lot salaka lubokilu ya yandi ya nsuka. . .to, mu zola tuba, Wanzio salaka, munati-nsangu, muntu nyonso yina Yandi vwandaka. Nzambi talisaka samu na kilumbu yayi, Nzambi talisamaka na nzutu ya muntu, salaka kidimbu ya nsuka, salaka kusalu ya nsuka. Kuna nyonso sukaka.

<sup>333</sup> Noé longaka dilongi ya yandi ya nsuka; kielo kangamaka na manima ya yandi. Yawu yina kaka. Bawu sekaka yawu, mpe sawulaka yawu.

<sup>334</sup> Beno banza, bantu lenda landila na kulonga! Conseil Oecuménique lenda vukana na dibuundu ya Katolika, kaka mutindu bawu silaka na kusala. Ba-organisation nyonso lenda kwiza, kasi kidimbu ya kibulu kele yimeni kuna. Bawu ke baka yawu, na yawu. Beno me mona? Mpe bawu ke tuba, “Oh, alleluia, nkembo na Nzambi, bantu mingi vulukaka na nkokila yina me luta.” Bawu salaka yawu? “Bawu binaka na Kimpeve. Bawu zonzaka na bandinga.” Yina zola kutuba kima mosi ve. Beno me mona? “Oh, bawu kele bantu ya lembami mpe ya lutondo mpe



ya kukikulumusa. Yinga, tata. Bawu kele na mbuma ya Mpeve.”  
Yina ke kidimbu ve. Ata fioti ve.

335 Bika mu pesa beno mbuma ya Mpeve, na kati-kati ya Yesu mpe ba-Pharisien, beno mona nani vwandaka na mbuma ya Kimpeve. Yinki ke salama kana mu telemaka, na yina mu bandaka na kutuba na mwa ntangu fioti me luta, samu na kutelemina Klisto na ntangu yayi na mwa ntangu fioti? Nzambi lemvo kila munu samu na kutuba yawu, beno me mona, kasi kaka samu na kutalisa beno kima mosi.

336 Yinki kana mu kwiza na beno mpe kutuba, “Benoni tuba, beno dibuundu, nani kele nkundi ya beno? Nani ke lakisa mbuma ya Kimpeve? Nganga-Nzambi ya beno ya mbote ya kiboba. Nani ke kwizaka na beno na lupitalu ntangu beno kele ya kubela? Nganga-Nzambi ya beno ya mbote ya kiboba. Ya kele kieleka. Nani ke defisaka beno mbongo ntangu beno kele na mpasi, mpe mumbongo ya beno ke tambula mbote ve? Benoni kele bamambele ya dibuundu ya yandi, beno kwenda ve na nganga-Nzambi ya beno ya mbote ya kiboba mpe yandi ke defisa beno mbongo? Benoni me mona? Ya kele ntangu nyonso ya kufuluka na zola mpe lutondo, mpe ke lakisa mbuma ya Kimpeve? Nganga-Nzambi ya beno ya mbote ya kiboba.

337 “Nani yina me longukaka bamvula mpe bamvula, na ba-synagogue awa, kisika nkooko ya nkooko ya nkooko ya nkooko ya nkooko ya nkooko ya yandi katukaka, nzila nyonso? Nani me longuka mpe me kuzwa . . . me sala ngolo mpe me kuzwa ba-diplome ya doctorat mpe ba-Doctorat ya Droit, samu na kuzaba Ndinga yayi, mpe me telama awa mpe me vulusa yawu na beno konso Lumingu na suka na kati ya dibuundu ya yandi? Nganga-Nzambi ya beno ya mbote ya kiboba.

338 “Nani kele kimpumbulu yayi, yina ba me bokila, ‘Yesu’? Wapi lukolo Yandi me katuka? Wapi lukolo Yandi me basika? Wapi kisika kele kalati ya Yandi ya kimvuka? Wapi organisation Yandi kele?

339 “Yinki yandi ke sala ntangu beno nyonso kele na nsamunu ya dibuta? Nani ke kwisa na beno? Nganga-Nzambi ya beno ya mbote ya kiboba, samu na kumeka na . . . Mpe nge ke na kuswana samu na nkalani yayi awa, mpe nganga-Nzambi ya nge ya kiboba ke kwisa mpe ke vutula beno na ngwisani. Yandi tubaka, ‘Benoni nyonso kele bana ya Nzambi. Benoni zolaka sala yawu ve.’ Ya kele yina yandi . . .

340 “Yinki kele Yesu yayi ya Nazareth ke na kusala? Yandi ke buka nyonso. Yinki Yandi ke na kusalaka? Yandi ke semba organisation ya beno. Yinki Yandi ke sala? Yandi bokilaka nganga-Nzambi ya beno ‘ntwadisi ya mpofu ya mpofu.’ Yandi bokilaka yandi ‘nyoka na kati ya matiti.’ Yandi bakaka munkayulu yina Nzambi tumaka, mpe bwisaka bamesa ya kufuluka, mpe losaka mbongo, mpe talaka bawu na nganzi. Benoni

me monaka ntete nganga-Nzambi ya beno kutalana mutindu yina?" Ntangu yayi wapi mbuma ya Mpeve? Uh-huh. Uh-huh.

<sup>341</sup> Ve na nzila ya kuzonza na bandinga. Ve na nzila ya kubina na Kimpeve. Ve na kukotaka na dibuundu. Ve na mbuma ya Kimpeve; Science Chrétienne lenda talisa beno yawu, beno me mona, mpe kumanga mpe Yesu Klisto vwandaka Nzambi. Yina ve.

<sup>342</sup> Kasi ya kele Ndinga, na kuzingaka! Yawu yayi. Kana bawu zolaka tala kaka, Yandi vwandaka Mesiya. Yandi vwandaka Ndinga ya moyo, yina me monisama.

<sup>343</sup> Mpe bakala yina kele na Mpeve ya Nzambi na kati ya yandi, to kento mosi, ke zingaka Ndinga yina, ke zingaka na kati ya bawu. Yina kele ntima me bula, yina ba soolaka na ntwala, samu Ndinga ya Mfumu ke kwisa na bawu, mpe ba kele Ndinga samu na bantu. "Mikanda me sonama yina ke tangama na bantu nyonso." Ya kele kieleka? Kubenda ya Tatu ke banda?

<sup>344</sup> Bantu yina ke na ba-bande, ya kele beno yina ke na kuwa bande yayi, Mu ke zola ti beno tala dibuundu yayi na ntangu yayi. Uh-huh. Mu banza ti beno ke kuwa mutindu mosi.

<sup>345</sup> Yinki kana ya kele mutindu yina? Beno tala Masonuku ya kukota awa. Ya lendaka vwanza? Ya kele Kubenda ya Tatu samu na kulonga na ya Seko yina me manga Nsangu ya mpulusu?

<sup>346</sup> "Mbote," beno ke tuba, "dibuundu ke na kwenda . . ." Yinga, bawu ke sala yawu. Bawu ke landila kaka, kaka mutindu mosi.

<sup>347</sup> Kasi, beno bambuka moyo, ntangu nyonso yayi, Noé vwandaka na nzasa. Kento ya makwela kele ya kutula kidimbu na kati ya Klisto, mambele ya nsuka me vuluswa. Kidimbu ya Sambanu me basika yawu mosi. Kidimbu ya Sambwadi ke vutula Yandi na ntoto. Mwana-dimeme kwizaka mpe bakaka Buku na diboko ya kibakala ya Yandi, mpe vwandaka mpe tubaka yina Yandi vwandaka me kuzwa, yina Yandi vulusaka. Ya kieleka? Ya ke vwandaka ntangu nyonso Kubenda yina ya Tatu.

<sup>348</sup> Tatu kele kulunga. Ministele ke kwizaka na kulunga ya yawu ntangu ya ke vukisa dyaka Klisto na kimuntu, na kati-kati ya bantu, mutindu ba zabisaka yawu na ntwala, "Mutindu ya vwandaka na bilumbu ya Lot."

<sup>349</sup> Oh, beno banza, bantu lendaka landila na kulonga, na kubanzaka ti bawu ke na kuzwa mpulusu, na kukwikilaka ti bawu ke na kusalaka mbote, na kukwikilaka ti ba-organisation ya bawu ke na kukula, ya kieleka, mpe ata mpe ve minzenzi ya kivuvu. Mpe kana vision yina vwandaka yawu, mpe ya vwandaka mpasi mingi samu na bakento, beto me kuma na ngunga yina. Kielo me kangama, me kwenda, yimeni Buku kele na diboko ya Yandi. Beno banza na yawu.

<sup>350</sup> Bika mu tuba na beno yayi kaka ntete beto sukisa ntangu yayi. Mu ke sukisa. Ba ke tubaka disolo mosi, salamaka na

Irlande, na ntwala ya bamasa. Ya vwandaka na ndandani ya nene ya matadi na lweka ya kumu, mpe kuna na zulu ya myongo yayi ya nene. Mpe ya vwandaka na bakala mosi, yina vwandaka tambula kuna na zulu ya ndandani ya matadi yayi kilumbu mosi, kaka—kaka na ntangu ya kumata ya masa. Mpe ya vwandaka na muntu mosi ya lukumu yina zingaka na zulu ya mongo, yina zabaka ti balundindi yayi. Yandi zabaka wapi ntangu ya kilumbu kumata ya masa yina zolaka kwisa. Yandi zabaka wapi ntangu kumata ya masa yina zolaka kumata. Muntu yayi vwanza kipe ve wapi ntangu. Yandi vwandaka mosi ya bayayi yina zaba nyonso. Yandi vwandaka na dibanza ya yandi mosi. Yandi vwandaka atileti ya mayela mingi, muntu ya mayela mingi, muntu ya mayela mingi, kasi yandi zabaka kaka ve ntangu ya kumata ya masa. Yandi zabaka ve yinsi. Yandi zabaka ve ti ntangu kidimbu vwanza ya kusungama, ntangu ngonda pesaka mukongo ya yandi na ntoto.

<sup>351</sup> Mpe ntangu Nzambi ke katula Mpeve ya Yandi na ntoto, mpangi, yandi me kwenda, ya me suka.

<sup>352</sup> Ngonda yina lendaka katuka na kisika ya yawu, bamasa ke fuluka na ntoto mutindu ya vwanza ntangu Nzambi bandaka yawu, na Genèse 1. Kasi ngonda vwanza kuna, mpe ntangu yawu ke balula kaka yintu ya yandi, kufuluka ya masa ke banda na kumata.

<sup>353</sup> Kiboba ya bantu ya ndwenga yayi yina zingaka kuna na mvwandulu ya yawu, zabaka wapi ntangu ya vwanza. Muntu yayi zabaka ve. Yandi longukaka yawu ata fioti ve. Yandi vwanza kipe yawu ve. Mpe muntu ya ndwenga yayi ya ntama kwizaka na mbangu, mpe tubaka, “Tata ya munu ya mbote, nge ke kwenda ntama. Vutuka, na nswalu. Ya kele na kibaka. Beno lenda ve kumata kibaka. Beno ke kufwa. . . Ya kele bidimbu ke na kulandana, ntangu. Kufuluka ya maza ke mata na mbala mosi, mpe beno lenda vutuka ve. Beno kwenda ntama ve.”

<sup>354</sup> Mpe bakala yango balukaka, mpe sekaka yandi, yandi tubaka, “Kwenda keba kisalu ya nge mosi. Mu zaba yina mu lenda sala mpe yina mu lenda sala ve.” Mpe kufuluka ya masa nataka yandi. Beno me mona?

<sup>355</sup> Ya lendaka vwanza na nsukinina kulutila yina beto ke banza. Beno me mona? Ya ke simba beno. Beno kwenda ntama mingi ve. Beno sala yawu ve, bantu. Kana beno ke kwikilaka ntangu nionso na munu mutindu kisadi ya Nzambi, baka ndinga na munu na suka yayi, kana beno me salaka yawu ntete ve. Ya lendaka vwanza yimeni ntangu me luta. Masonuku mingi ke lakisa yawu mutindu yina. Ntangu yayi, beno bambuka moyo, mu ke tuba yawu ve. Mu zaba ve. Kasi beno tala kaka.

<sup>356</sup> Mpe mu zengaka ba-page kumi awa, yina mu vwanza na boma ya kutuba na beno. Beno me mona? Beno me mona? Mama Wood kele mbangi ya yawu, mpe Tata Wood. Ntangu mu

kwendaka na suka yayi samu na kumona bawu, mu tubaka, “Mu—mu lenda tuba na bawu yawu ve, mu lenda kwenda ntama na yawu ve. Mu ke tula kaka Masonuku yayi mingi, mpe mu ke bika yawu na bawu, samu ba ke kanga yawu na bande.” Ya ke kwenda.

<sup>357</sup> Mpe bantu ke seka Nsangu yayi. Ya kele nyonso ya kulunga, ya ke luta ke vutuka, mosi ya bilumbu yayi. Beno kwenda na ntwala, beno vwanda kaka mambele ya dibuundu. Beno zenga bansuki ya beno, beno pakula kizizi ya beno. Kwenda na ntwala, mpe baka “Tata, Mwana, mpe Mpeve-Santu,” kana nge zola, yawu, sala Banzambi tatu mpe kuvwanda mumpani. Kwenda na ntwala, kangama na organisation ya nge. Sala yawu, kana nge zola.

<sup>358</sup> Yandi tubaka, “Mu binaka na Kimpeve, mu zonzaka na bandinga; mu kuzwaka Yawu.”

<sup>359</sup> Mu me monaka bampeve ya yimbi kusala kima mutindu mosi. Mu me monaka bandoki ke zonza na bandinga mpe ke tendula yawu; mpe ke sonika na bandinga yina me zabana ve, ke tendula yawu; yina kunwaka menga na mukwa ya yintu ya muntu, mpe bokilaka dyabulu, binaka na kimpeve.

<sup>360</sup> Ba-Musulman ke kina na mpeve, mutindu yina, tii kuna bawu lenda baka ba-tsubu mpe kutula yawu na nsi ya misapi ya bawu; mpe kubaka lansi mpe kulutisa yawu na kizizi ya bawu, mutindu yayi, mpe ke basisa yawu, mpe ata ditonzi mosi ya menga ve ke basika na yawu.

<sup>361</sup> Ba-Indien ke tambula na zulu ya tiya, makulu mwasi, na ba-centimetre makumi yivwa; mpe yiya-, ba-centimetre makumi yivwa to nkama mosi na makumi zole; ba ke pelisa tiya, tii kuna makala ya tiya ke kuma mpembe; mpe ba ke yokama ata fioti ve na makulu, mpe ke manga ti ya kele na kima mutindu Yesu Klisto.

<sup>362</sup> Ve, ve, nkundi. Ya kele Ndinga yina ke tubaka yawu. Bantu mpe Ndinga fwana vwanda mosi. Beno me mona? Yesu mpe Ndinga vwandaka mutindu mosi; Yandi vwandaka Ndinga. Mpe ntangu Yesu ke zinga na kati ya muntu, yina ke sala yandi mpe Ndinga mutindu mosi. Ve. . . Luzingu ya beno ke tuba yina beno kele.

<sup>363</sup> Ntangu yayi beno kukitala kaka beno mosi na kitala-tala ya Nzambi, beno tuba, “Wapi mutindu mu ke tala na suka yayi?” Na yina beto ke sambila.

<sup>364</sup> [Mpangi mosi ya bakala ke zonza na ndinga yankaka. Mpangi yankaka ya bakala me pesa lutendulu: “Bana ya munu, bubu yayi, mu ke tuba na beno. Yinga, mpe munu, Nzambi ya Ngolo nionso, me tala na zulu ya ntoto bubu yayi. Mu me mona yimbi yina kivangu yayi me kuma. Yinga, mu ke mona disumu yina bakala yayi, bubu yayi, ke na kubalukaka. Yinga, nge zaba ve ti mu me sala kima ya nene samu na nge? Yinga, Mu me tinda

muntu mosi na kilumbu yayi ya nsuka, yinga, ti yandi fwana vwanda yinwa samu na nsungi yayi. Kasi mu ke tuba na nge, kilumbu yayi, bantu ya Munu, mingi me seka na nkumbu yayi. Yinga, ba me balula mikongo ya bawu na zulu ya bima yina yandi zonzaka. Kasi mu ke tuba na nge, bayina ke kuwa Bandinga yayi, mu ke sala ti balusakumunu ya nene kubwa na zulu ya bawu. Mu kele Nzambi ya Ngolo nyonso. Mu ke futa, kilumbu yayi, samu na bayina ke kuzwa kieleka Bandinga yayi, me tuba Mfumu.”—Mu.]

. . .vwandaka yenga-yenga ntama na Nzambi,  
Ntangu yayi mu me vutuka na yinzo;

Beno sambila, kana beno me sambilaka ntete ve!

Zibula maboko ya Nge ya nene ya zola,  
Mfumu, mu me vutuka na yinzo.

Nkwizulu . . .

365 Na yina beno ke landila na kuyimba, mu zola kuyufula beno kima mosi. Ya kele na kisika mosi na kati ya ntima ya beno yina ke monana ti ya kele mpimpa na disumu? Kana ya kele mutindu yina, ntangu yayi kele ntangu ya kuyambula yawu, kaka ntangu yayi, kana ya kele na kyadi dyaka.

366 Yayi, mu banza, mutindu yina ve. Mu banza ti ya kele kuna ve. Kasi ya ke talana ve mutindu ya lendaka vwanda? Beno kuwa yina Mpeve-Santu me tuba na kati-kati ya bantu, na manima mu me manisa, “Ya kele Ndinga samu na *beno*.”

367 Mpe kana ya kele, kana beno kele na mpimpa na luzingu ya beno, beno zola kwisa awa ve pene-pene ya autel ntangu yayi, na yina beto ke landila na kuyimba? Kaka ntangu yayi, kana ya kele na boma, kana ya kele na kisika mosi, beno katula yawu dyaka ve.

368 Beno tula kivuvu mpe beno tula kivuvu ti yayi ke mutindu yina ve; kasi ya ke vwanda, mosi ya bilumbu yayi, mpe ya lendaka vwanda bubu yayi.

Ntangu yayi, Mfumu, mu ke na kwiza . . .

369 Na mupepe ya mbombo ya beno ya kati-kati! Kana bantu yina ke kuwa bande lendaka mona kaka yina ke salama awa ntangu yayi; ke vukana kaka na mosi na yankaka, ke boka, ke katuka bisika nyonso.

370 Vision yina, ntangu mu vwandaka mwana-bakala ya fioti, ya kele ngunga yango? Yayi kele ntangu yina ya kulemba mingi, ya boma . . . difelo ke na kuvangama kaka awa na zulu ya ntoto?

371 Ba-autel mpe ba-couloir, mpe nionso yina, kele ya kifuluka ntangu yayi. Kana beno lenda kwisa ve na autel to na ba-couloir, na kati ya bankama yayi awa, beno telama kaka, kana beno tuba, “Mu ke zola kutelama mpe kusambila, kaka bantu lendaka zaba,” to kufukama, nionso yina beno me zola. Oh, la la! Ntangu

yayi na mpasi beno lenda mona muntu ya kuvwanda kuna. Ya kele bantu yina kele ya kutelama bisika nyonso.

<sup>372</sup> Bika mu tuba mutindu yayi: Nzambi kubika ve, Nzambi kubika ve yina mu me tuba ya vwanda ntangu yayi. Bika mu bakula yawu, muntu nionso; Nzambi kubika ve. Ya kele. . . Mu ke na bana yina kele ve na kati. Mu ke na bana-bakento zole mpe mwana-bakala mosi. Mu ke na bampangi ya babakala. Mu ke na bantu ya munu yina kele ve. Nzambi kubika ve ti lemvo yina kubika beto; ti nyonso yayi ke vwanda kaka na lufulu ve.

<sup>373</sup> Ya kele na lemvo yina me bikana, Mfumu? Ti mu vwanda na foti na yayi, Mfumu. Ti ya vwanda na foti na ntangu yayi. Ti munu, ya kele ve, ti bantu lenda dyaka kuzwa mpulusu. Pesa yawu, Mfumu. Mu ke sambila, mpe pesa bantu yayi na Nge ntangu yayi, na Nkumbu ya Yesu Klisto.

<sup>374</sup> Muntu nyonso kusambila ntangu yayi, kaka mutindu. . . Yinki kana ya vwandaka? Ntangu yayi, mu zaba ve ti ya kele, kasi yinki kana ya vwandaka? Beno sambila na mutindu ya beno. Beno sambila kaka mutindu beno zola kusambila. Kaka yinki kana yayi vwandaka kieleka, yinki beto ke sala, bankundi? Yinki beto ke sala? Yinki, yinki ke salama? Ntangu yayi beno sambila, beno nionso. Beno boka kaka—kaka, beno sambila kaka mutindu beno zola. Beno boka kaka na Nzambi, na mutindu ya beno mosi. O Nzambi!

. . . Maboko ya nge ya zola,  
O Mfumu, mu me vutuka na yinzo.

<sup>375</sup> “Mfumu, mu vwandaka na dibanza ya kusala yawu ntama mingi ve. Mu vwanda vingila mingi, Mfumu? Yayi kele, ya me suka? O Nzambi, zibula maboko ya Nge ya zola mpe yamba munu. Kima mosi na kati ya ntima ya munu ke lombi yawu, Mfumu. Zibula mbala mosi dyaka. Kana nkumbu ya munu vwandaka na Buku ya Mwana-dimeme, tuba na munu ntangu yayi, Mfumu. Bika mu kuzwa yawu malu-malu yayi. Pardo sala, Nzambi.”

Mu me vutuka na yinzo, mu me vutuka na  
yinzo,  
Oh, ata mbala mosi ve (Mu ke kwenda dyaka  
ve, Mfumu.) na yenga-yenga;  
Zibula maboko ya Nge ya nene ya zola,  
O Mfumu, mu ke na kwiza. . .

<sup>376</sup> Biblia ke tuba, ntangu bawu ke zaba Yesu, ti, “Mosi na mosi ke dila mutindu mwana ya bawu ya bakala kaka mosi me kufwa.”

Me vutuka na yinzo,

<sup>377</sup> Beno na ngaanda, beno na matoma ya beno, na yisi ya kitembo, beno bayina kele ya kutelama pene-pene ya yinzo ya nene, mingi na kati ya beno, beno telemisa kaka yintu ya beno

na kati ya yinzo ya nene, beno tuba, “Mfumu Nzambi, tala munu kyadi.”

Zibula . . .

Beno vwanda ya kufwa ya kusungama, bankundi! Beno banza na wapi ntangu beto ke na kuzingaka! Wapi kisika beto kele?

. . . zola

Mfumu, mu me vutuka ntangu yayi na yinzo.

Me vutuka na yinzo . . .

<sup>378</sup> Mfumu Yesu, mu me sala nyonso yina mu zaba. Mu me sala nyonso yina mu zaba. Pesa, Mfumu, ti myelo ya kyadi kele dyaka ya kufunguka. Na kati ya bankama yayi, na kutala bankama vwandaka sosa Nge na ntangu yayi, katula konso disumu, Mfumu, mpe nata bawu na kati bubu yayi.

<sup>379</sup> Mu—mu ke lomba, na ntima ya munu nyonso, na yina beto ke mona kaka ve muntu kuzonza, kasi, Masonuku Yawu mosi ke nata beto na ngunga yayi. Mpe vision yina, ya mwana-bakala mosi ya fioti, na kumonaka bantu yina na mutindu yina; mpe ntangu yayi, beno banza, ti difelo yawu mosi, kyadi me katuka na ntoto, mpe ntangu yayi difelo yawu mosi kele awa, mpe bantu, Mfumu, kele na kati ya kondisyo yayi ya mpasi.

<sup>380</sup> O Nzambi ya Ngolo, na zulu ya Dibuundu yayi ya Kusolama, mu ke sambila, Nzambi, ti Nge ke mwangisa balusakumunu ya Nge, ti bawu lendaka kuzwa ministele ya kimbangi, ti mutindu Lot kuzwaka, mutindu Noé kuzwaka, mutindu Yesu kuzwaka, samu na kuzimbana ya Seko, kana ya kele kuna; ti bawu mosi kele ya kutula kidimbu na kati ya Kimfumu ya Nzambi, kasi ke pesa kimbangi na Yesu Klisto na kuvwandaka mutindu mosi mazono, bubu yayi, mpe kukonda nsuka. Pesa yawu, Mfumu. Ti Nge kuzwa ndombolo ya beto, na yina beto ke zonga na Nkumbu ya Yesu.

<sup>381</sup> Beno sambila kaka mutindu beno zola kusambila ntangu yayi. Beno sala nswalu ve. Beno sala nswalu ve. Yinki kana beno kele nkumbu ya nsuka na kukwenda na Buku?

. . . Mu me vutuka na yinzo.

Mu me vutuka na yinzo, mu me vutuka na yinzo,

<sup>382</sup> Mpangi Neville, mata mpe sambila samu na bawu. Pasteur ke sambila ntangu yayi na beno na yina beno ke na kusambila. Mu ke yimba.

Zibula maboko ya Nge ya nene ya zola,  
Mfumu, mu me vutuka na yinzo.

Mu me vutuka na yinzo, mu me vutuka na  
 yinzo,  
 Ba ke yenga-yenga diaka ve; (Yinga, Mfumu.)  
 Zibula maboko ya Nge ya nene ya zola,  
 Mfumu, mu me vutuka na yinzo.

Mu me vutuka na yinzo, mu me vutuka na  
 yinzo,  
 Samu na kuyenga-yenga diaka ve;  
 Zibula maboko ya Nge ya nene ya zola,  
 Mfumu, mu me vutuka na yinzo.

<sup>383</sup> [Mpangi Neville ke landila na kusambila: “Mpe ti mosi na mosi, Mfumu, sepela, kilumbu yayi, ti Nge kele Nzambi ya Ngolo nyonso. Kana yayi kele kusukisa kyadi, ti ya vwanda mosi na mosi, mosi na mosi.”] Pesa yawu, Mfumu. [“Ti ya vwanda ntangu yayi, Tata. Mpe ti ngemba ya Nzambi, yina me lutaka ntangu nyonso na lubakusu, ti ya kwiza dyaka na kuvingilaka bantima.”] Yinga, Mfumu. [“Bika yayi kuvwanda ngunga.”] Yinga. [“Beto ke kwikila ti Nge me kuwa na Mazulu.”] Nzambi, pesa yawu. [“Nionso yina kele na kibumbulu samu na beto, kana ya me kumana, na yina, Mfumu, beto me zaba yina kele ya nsuka.”] Yinga, Mfumu. [“Kasi, kana ve, ti Mbangi kukwiza.”] Yinga, Mfumu. [“Bika ti bayayi yina me kwiza, ti bawu tala ngemba kilumbu yayi.”] Pesa yawu, Mfumu. [“na nzila ya Yesu Klisto. Mpe na Nkumbu ya Yandi beto me sambila. Amen.”—Mu.]

<sup>384</sup> Mfumu Yesu, mu ke sambila ti Nge ke vulusa Becky na Sarah na Joseph, mpe bayankaka, mpe, Mfumu. Kubika yayi ve kusalama na bana ya munu, Mfumu. Kubika ve yawu kusalama na bampangi ya munu ya babakala mpe bankundi ya munu. Pesa yawu, Mfumu.

<sup>385</sup> Beto zaba ve, beto zaba ve, kasi beto ke na kumonaka kima mosi, Mfumu. Ya kele kidimbu yina ke ningana kaka ntangu yayi na ntwala ya beto? Pesa yawu, Mfumu. Nata beto nyonso pene-pene ya Nge, na nswalu, Mfumu. Beto zola Nge mpe beto kele na nsatu ya Nge. Ti ya vwanda, Tata, Mpeve-Santu pesa beto ngolo na bantima ya beto ntangu yayi.

<sup>386</sup> Beto ke sambila ti beto lenda vwanda bambangi samu na Nge na ngunga yayi, samu beto zaba ti yayi fwana salama. Ba zabisaka yawu na ntwala na kati ya bansungi, mpe beto fwana kutana na yawu, ti beto me kuma na ntangu ya nsuka ntangu beto ke mona bidimbu yayi ke na kumonika. Beto zaba, mpe ba me tubila beto yawu na bamvula mingi ntangu yayi, ti kima yayi ke salama. Ntangu yayi beto ke mona yawu kaka na kyelo ya beto, nganzi ya nene ya Nzambi yina ke na kutambulaka na babala-bala, ya ke na kunataka yina ba me zenga ve nzengolo. Kisika ya kele ve na Menga na zulu ya kielo, wanzio ya lufwa ke kwiza kutala; mpe bawu ke landila kaka na kuzinga, kasi ya kufwa na yina bawu ke na kuzingaka,



kukondwa kyadi, kukondwa Nzambi, mpe lenda kuzwa ata mbala mosi ve mpulusu.

<sup>387</sup> Nzambi, wapi mutindu beto ke tonda Nge samu na bayina me vuluka! Mutindu beto. . . Wapi mutindu ya lusakumunu ya nene ya kele na bantima ya beto, na kuvwanda na kati ntangu yayi, na yisi ya Menga, na yina wanzio ya nsuka yina lutaka na yinsi, na kubasisaka. . .

<sup>388</sup> Bayina katukaka na yisi ya menga, bawu kufwaka kukondwa kyadi. Yina vwandaka benda ya nsuka ya Moise. Ya ntete, ntwenya mosi ya bakala vwandaka zonga na Israël; ya zole, kwendaka samu na kukuula bawu; ya tatu, vwandaka nsangu ya nsuka. Bimangu kusalamaka, Moise vwandaka na nzila ya yandi na yinsi ya nsilulu, na bayina ba vulusaka. O Nzambi, tala kyadi, mu ke sambila, na Nkumbu ya Yesu.

<sup>389</sup> Ntangu yayi mu ke zola kuyufula yayi: Beno bayina ke na kusambila, beno bayina ke kuwa ti beno kele na kyadi, mpe ti (Nzambi) beno ke tala ti beno kele na kati ya Kimfumu ya Nzambi, beno ke kuwa ti—ti beno me vwanda ya kukangama na mutindu mosi na yankaka, ti na Klisto beno ke na lukwikilu ya kukwikila ti beno kele Muklisto, beno me butuka mbala ya zole mpe beno me zaba ti beno kele Muklisto, mpe kukondwa ntembe. Mu ke zola ti beno nionso kutelama, beno yina zola yawu, beno kwikila yawu, kyadi yina me vwanda na beno ntangu yayi, mpe beno kele Miklisto, mpe beno—mpe beno ke kwikila ti—ti Menga me tulama na ntima ya beno, mpe—mpe—mpe ba me lemvokila beno masumu nionso.

<sup>390</sup> Yayi vwandaka kima mosi ya mpasi mingi samu na kutuba na beno. Mu ke vutula matondo mingi, mpe mu ke mona bantu na bisika nionso. Mpe beno, mu—mu ke mutindu yina. . .

<sup>391</sup> Mu zaba ve ti kima yayi kele kieleka, kasi ya fwana vwanda mutindu yina, ntangu yankaka. Beno me mona, ya fwana kuma na yawu, mpe ya lenda vwanda ntangu yayi. Beno me mona? Na mutindu nyonso, yinza ke landila kaka. Bantu ke kwisa kaka na autel, ba ke boka kaka, kasi ya ke sala ata mbote ve. Beno me mona? Ba ke kwenda, beno me mona, ya ke vwanda kuna. Ya ke vwanda na kyadi ve. Beno bambuka moyo na yawu. “Mpe kivinga ya santu ke fuluka na mulinga.” “Yandi yina kele mvindu, yandi kukuma diaka mvindu; yandi yina kele ya kusungama, yandi kele diaka ya kusungama; mpe yandi yina kele ya santu, yandi kele diaka ya santu.” Ya kele dyaka ve na kyadi, ntangu Mwana-dimeme ke baka Buku; kaka yina, ya kele nyonso ya yawu. Mpe ya ke talana mingi mutindu ya lendaka vwanda ntangu yayi.

<sup>392</sup> Ya lendaka vwanda ti beto kele na kilumbu yankaka; ya lendaka vwanda bubu yayi kele kilumbu yango. Ya lendaka vwanda ti mbasi kele nsu- . . . Ya lendaka vwanda na nkokila yayi kele nkokila ya nsuka. Ya lendaka vwanda ti yayi kele mvula ya

nsuka. Mu zaba ve, bankundi. Mu ke tuba na beno, mu zaba ve. Ba ke tuba na munu yawu ata fioti ve.

<sup>393</sup> Kasi ntangu Nzambi ke baka nkumbu yango ya nsuka mpe ke vulusa yawu na Buku yango ya Luzingu, ya kele nyonso ya yawu. Beno me mona, ya lenda vwanda dyaka ve, na mutindu nyonso. Ya lenda vwanda dyaka ve, na mutindu nyonso. Kaka yina. Ya me suka.

<sup>394</sup> Bantu yikwa zaba ti ya kele kieleka? Mbote mingi. Ya kele—ya kele kieleka. Ntangu yayi yina beto ke kuwa . . .

<sup>395</sup> Mpe mu ke mona dibuundu yayi yina mu longaka mpe kebisaka, bamvula nyonso yayi, mpe kumona Nsangu mutindu yayi ti mu . . . ti mu—mu me kotisa yayi na mutindu ya fioti. Mpe beno bambuka kaka moyo, mu ke tuba yawu samu ti beno bakula yawu, mutindu ya *fyoti*; mwa bima yankaka lendaka ningisa beno kaka bitini-bitini, beno me mona. Kasi mu me zimbana yawu, mu me mona ti mu ke sala yawu, samu mu me ndima ve. Kana mu ke kwikila ve kisika mu ke na kutwadisa, mu ke tambula na malembe, beno me mona, kasi mu ke tuba kaka na beno.

<sup>396</sup> Beno kuwa. Beno kele na kyese ve? Ya lenda vwanda na kima ya kulutula nene, yina beno lenda banza, yina beno me sala na luzingu ya beno?

<sup>397</sup> Yinki kana yawu me manisa ntangu yayi? Yinki kana yawu nyonso me salama? “Oh,” beno ke tuba, “Mpangi Branham, mu banza . . .” Yinga, mu zaba. Ba lendaka landila na kukwenda na ntuala. Ba salaka yawu, konso ntangu. Mu me tendula yawu mpe mu me siamisa yawu na nzila ya Masonuku, beno me mona, yinza landilaka kaka na kutambula kuna, kasi yawu kusalamaka. Beno me mona?

<sup>398</sup> “Bulawu ya kulonga ke vulusa bayina me zimbana. Mpe ya kele bulawu, samu na bantu. Ya kele ndwenga ya Nzambi.” Beno me mona? Nzambi kele Mpeve. Yandi ke salaka na mutindu ya kimpeve, beno me mona, mambu ya Yandi ya ngitukulu samu na kusala; na mutindu ya mbote. Kasi, beto kele bantu, beto kele na nsuka. Beto zaba ve; beto ke tala kaka na yina beto lenda mona. Kasi Kima mosi na kati ya beto . . .

<sup>399</sup> Ntangu beno ke basika na kivinga yina awa, kana beno me monaka yawu ntete ve na luzingu ya beno, ya me monaka ntete ve nsemo ya kilumbu, beno ke zaba ti beno me luta na kivinga yayi awa, na kati ya nsemo ya mwini to kima mosi. Ya vwandaka tiya. Beno lenda kuwa yawu. Kana ya kele ve na sense ya nzutu ya beno samu na kutuba yawu, beno lendaka zaba, oh, ya kele ve na sense ya kumona yawu. Ata nzila ya kumona bayinti ya ntinta ya vert, samu na kumona nkadulu; beno vwandaka na kumona ve, muntu ve vwandaka na yawu. Beno ke zaba ti beno ke vwanda na mvwandulu ya kima mosi; nsatu ya beno ke tuba na beno yawu. Beno ke zaba yawu. Kana mu meka na kutuba na

beno, “Ya kele mwini. Ya ke lakisaka. Ya ke lakisaka bima,” beno me mona, beno ke zaba ti ya vwandaka kuna samu ti beno lenda kuwa yawu na mitindu ya beno ya kutala. Ya kele kieleka?

<sup>400</sup> Ntangu yayi, beto zaba ti Klisto kele awa. Beno me mona? Ya lendaka vwanda ti beno ke mona Yandi ve na meso ya beno. Beno me mona? Ya lendaka vwanda ti beno ke mona ve. Kasi na nzila ya vision, mu ke tuba na beno, Yandi kele awa. Beto ke kuwa Yawu. Beto zaba ti ya kele na Kima mosi awa yina basense ya beto ke tubaka ve. Ya kele Mpeve ke tuba yawu, ti Klisto kele awa.

<sup>401</sup> Mu ke tala ti Yandi me vulusa beto. Mu ke tala ti bankumbu ya beto kele na Buku ya Yandi. Mu ke kwikila ti beto me kuzwa mpulusu na nzila ya Menga ya Mwana-dimeme.

Mu zola beno, mpe mu zaba ti beno zola mosi na yankaka.

Oh, nsinga ya ngwisani kusakumuka yina ke  
vukisa  
Bantima ya beto na zola ya Baklisto;  
Ngwisani ya mpeve mosi  
Mutindu yina ya Zulu.

<sup>402</sup> Beto ke vwanda kaka na nsatu ya mutindu yina mosi na yankaka. Beno me mona, beto fwana, beto fwana vwanda na nsatu ya mutindu yina mosi na yankaka. Beno me mona? Samu ti, mutindu beto zola mosi na yankaka, beto zola Nzambi. “Nge lenda yina mpangi ya nge ya bakala yina nge me mona, mpe tuba ti nge zola Nzambi Yina nge me mona ve?” Beto fwana zolana mosi na yankaka. “Zola ya kulutula nene kele na muntu ve kasi na Yandi yina pesaka luzingu ya Yandi samu na mbeni ya Yandi, ti bawu lenda kuma bankundi ya Yandi.” Oh!

<sup>403</sup> Beno zaba nkunga yina, *Nsinga Ya Ngwisani Kusakumuka?* Ya ke kitoko ve? Nsinga ya ngwisani kusakumuka! Nge lenda pesa beto note samu na yawu, mpangi-kento, kuna? Bikwa yawu bula mwa ntangu fioti.

<sup>404</sup> Yinki ke salama kana yawu manisa? Yinki ke salama kana Kubenda ya Tatu, kukwisa na ntangu yayi, samu na kulonga bantu yina me zimbana? Yinki kana bifwanikisu nyonso ke lakisa ntangu yayi? Mpe beto kele na kati, mpe beto kele na kati, ya ke vwanda mbote ve? Wapi mutindu ya kubundana!

Oh, nsinga ya ngwisani kusakumuka yina ke  
vukisa (Yawu yayi yinki yawu ke salaka:)  
Bantima ya beto na zola ya Baklisto;  
Ngwisani ya mpeve mosi  
Kele mutindu na . . .

<sup>405</sup> Yinki ya vwandaka? “Kubundana na mpeve mosi ya mabanza.” “Kimfumu ya Nge kukwisa. Luzolo ya Nge kusalama.” Beno me mona?

406 Beto ke meka na kusala Nzambi mwana ya bakala yina ke pesaka siansi, muntu yina ke zimbanaka to kima mosi, “Nzambi, sala *yayi*, sala *yina*.”

407 Yesu tubaka, “Sambila, ‘Kimfumu ya Nge kukwiza. Luzolo ya Nge kusalama na ntoto, mutindu yawu kele na Mazulu.’” Na yina, Mazulu me kulumuka na beto, mpe beto kele—ba me zangula beto na Mazulu, mpe beto kele ya kuvwanda na bisika ya Mazulu ntangu yayi na kati ya Klisto Yesu. Beto nionso ke kwikila ti Nsangu kele Kieleka, ti Yesu Klisto, Mwana ya Nzambi, ke vulusa beto.

408 Beto kanga meso ya beto ntangu yayi mpe beto telemisa maboko ya beto, na yina beto ke yimba yawu.

Nsinga ya ngwisani kusakumuka  
Bantima ya beto na zola ya Baklisto;  
Ngwisani ya mpeve mosi  
Ya kele mutindu . . . (Landila na kubula yawu.)

409 Ntangu yayi, kuseka mosi ve. Yayi kele ve ntangu ya kuseka. Na mudindu ya kieleka, na yina nkunga yina ke na kubula, beto pesana mbote na muntu yina kele pene-pene ya beno, beto tuba, “Nzambi sakumuna nge, Muklisto,” na bukieleka.

410 Nzambi sakumuna nge, Mpangi Neville. [Mpangi Neville me tuba, “Nzambi sakumuna nge, Mpangi Branham.”—Mu.] Ya me kuma na bamvula makumi tanu na yivwa. [“Ya kieleka.”] Ntama mingi!

Nzambi sakumuna nge, Mpangi-bakala . . . ? . . .

Ntangu yayi beto telemisa maboko ya beto na zulu ya Yandi.

Ntangu beto ke kabwana,  
Ya ke pesa beto mpasi na ntima;  
Kasi beto ke vwanda kintwadi na kati ya  
ntima,  
Mpe na kivuvu ti beto ke kutana diaka.

411 Ntangu yayi beto kulumusa bayintu ya beto, mpe, kintwadi, na kuzabaka ve yina bilumbu ke na kwiza, na ntangu yayi, na kuzabaka ve ti ya me suka. Mu zaba ve. Mu lenda tuba ve. Mu lenda tuba ve. Mu zaba ve. Kasi na ntwala ya mambu yina beto me tubila na suka yayi, beto sambila kisambu Mfumu me tuba na beto. Mpe kana ya kele, “Kimfumu ya Nge kukwiza. Luzolo ya Nge kusalama.” Beto sala yawu kintwadi:

Tata ya beto yina kele na Mazulu, bika  
Nkumbu ya Nge kuvwanda ya santu.  
Kimfumu ya Nge kukwiza. Luzolo ya Nge  
kusalama na ntoto, mutindu yawu kele na  
Mazulu.

Pesa beto bubu yayi madia ya beto ya konso kilumbu.

Mpe lemvočila beto bayimbi ya beto, mutindu beto mpe ke lemvočilaka bayina ke salaka beto yimbi.

Mpe kukotisa beto ve na mpukumunu, kasi katula beto na yimbi; samu ti Kimfumu kele ya Nge, mpe ngolo, mpe nkembo, kukonda nsuka. Amen.

<sup>412</sup> Ntangu yayi na bantima ya beto ya kukulumusa. Biblia ke tuba, “Bawu yimbaka nkunga, mpe bawu kwendaka.” Beno bambuka moyo, ntangu bawu salaka yawu na Masonuku, ya vwandaka samu ba komaka na kulunsi ministere ya Zole ya Mfumu ya beto, mpe Kubenda ya Tatu vwandaka ya kukubama na kukota. Bangunga fyoti na manima ya yawu, Yandi kulumukaka na difelo mpe longaka na bayina zimbanaka yina mangaka kyadi ya bawu.

<sup>413</sup> Note ya *Lukwikilu Ya Munu Ke Tala Na Nge*.

Lukwikilu ya munu—ya munu ke tala na Nge,  
Nge Mwana-dimeme ya Calvaire,  
Mvulusi ya kinzambi;  
Wa munu na ntangu mu ke sambila,  
Nata ntama masumu ya munu nionso,  
To beno bika munu e- . . . kubanda bubu yayi  
Mu vwanda nyonso ya Nge!

Na ntangu mu ke tambula na kati ya mpimpa  
ya luzingu,  
Mpe bampasi ke kuma mingi pene-pene ya  
munu,  
Vwanda Ntwadisi ya munu;  
Bika ti mpimpa kusoba na nsemo,  
Kusuna masa ya meso, katula boma,  
O bika ti kubanda bubu yayi  
Mu vwanda nyonso ya Nge!

<sup>414</sup> Mfumu sakumuna beno, kusala Mwana ya Yandi mpe lemvo kulezima na zulu ya beno. Mpe Mfumu kupesa beno Luzingu ya Kukonda nsuka, mpe kuvwanda na beno awa na yinza yayi, mpe yinza yina ke kwisa na manima. Mpe, Luzingu ya Kukonda nsuka, bika ti beno sadila Yandi na ba-aion nionso ya ntangu yina ke kwisa.

<sup>415</sup> Kana yayi kele ntangu, mpe beto me kuma na kisika yina, mu ke na nsoni ve ya yina mu me longa. Mpe kana konso mulongi fwana telama na dibuundu ya yandi mpe kuvwanda ya kufundisa, na yina mu monaka na vision, Mu ke vutula matondo samu na Nsangu ya mbote yina mu me longa, samu ti ya kele Nsangu mosi ya mbote yina Paul mpe bayankaka longaka.

<sup>416</sup> Mu ke na kiese samu na beno. Mu ke na kiese ti beno me ndima Klisto mutindu Mvulusi ya beno. Beno zola Yandi, mpe beno sambila.

<sup>417</sup> Mpe mu ke mona beno na manima ya midi yayi, kana Mfumu zola, na ngunga ya sambwadi, awa na dibuundu. Nzambi sakumuna beno. Beto me manisa.



*MIOYO YINA KELE NA BOLOKO NTANGU YAYI* KNG63-1110M

(Souls That Are In Prison Now)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 10 ya Ngonda ya kumi na mosi, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)